

西陲今略

史部地理類

摭目卷七十五存目作秦島志
四卷不著撰人名氏入邊防之屋

國朝纂修
字質人

西陲今略

無卷數分五冊
今合

梁質人西陲三書序

從義書社先生集卷二十八

秦僻居西土廣輪甲天下天下之邊鎮九而秦有其四故
全秦安危天下係焉史載洪武初李文忠鄧愈諸將渡
臚胸掃幹難馳崑崙之西於是立瓜沙青海七衛以為
外藩貢河州都司以收朶甘烏思藏設金牌以行茶馬法
守東勝牧馬察罕腦兒以控制朔漠為邊陲計何其深
也及其後合中國之力西罷於哈密之廢興北不能按復
河套彝人交訐關中大擾兵民失業迄無寧居固不待綏
寇之數噤已知國威之不振矣夫安攘之計不講於西秦
則禍流於天下建瓴之勢自古為然也言邊事者代不乏
人余讀南豐曾子固元豐類藁載其先諫議公致書
有西陲要紀十卷行世惜其書不傳吾友梁君質人份

亦南豐人也以文章名於時顧為人魁竒好奇計多立義
聲居山率鄉人十數禦千餘賊賊不敢犯身臨行陣自詡
為知兵性又畏流俗人知乃衣短後衣策匹馬遊幾徧天
下念秦為周漢唐都王者宅中必當復營豐鎬因西首
秦關周覽久之三歷塞垣由西安而東北至於榆林北至
於孟夏西北至於西寧河州又西北至於涼甘肅登嘉塔望
合黎之山西絕嘉陵南浮漢又南至於興安東升太華三
峰又東出潼關函谷以歸迴旋萬里窮西秦之疆境所至
記其道里山川阨塞城堡兵衛之形蕃部羣族之眾法
制戰守饋餉屯牧風俗之宜著西陲方略二卷圖說四
卷今略八卷傳之其人以供來茲噫梁君之為秦謀以及
天下者可謂至矣夫據天下之首河環東北山塞西南重

險之固號稱天府而屢受不固震及疆場者何哉其
患不在無險患在有險而無備也王者苟能奮揚威
武則當收燉煌守河外三城復故疆土不則閉關謝西
域毋疲中以事外此二者百世不易之道也若明之季既
不能張撻伐之威又不能畫疆自守於受貢虛名邊備
漸弛使三百年之金甌始壞於西陲之王莽終淪於西陲
之寇外攘失策內乃不安故至此極也使得梁君書戰有
以戰守有以守以此謀秦吾知犬戎不足以禍周匈奴不足
以困漢突厥吐蕃回紇之屬不足以病唐彼西夏之微又
豈能僭稱大號與宗相終始哉曾諫議之書不知於梁
君三書何如也當過南甌豆而問之

秦邊紀略卷一

全秦邊衛

行是後秦首領也
日秦是紀略卷一上非其何則作者言西陲今不可致也
也今此錄入以補西陲之缺而存其異同也

今天下可患者獨西夷也西夷之患必始西陲西陲當唐虞時禹敷土所及雍州之地服在侯甸聞况聲教及源沙靡不即敘未嘗如後世之遠斥埃阻甲兵以自守也秦築長城因河為塞起臨洮達九原上郡而河西乃雍州故壤夫已棄之秦之塞亦狹小矣漢武帝元狩二年始於河西置武威酒泉二郡元鼎六年又置張掖燉煌二郡是為河西四郡至昭帝始元六年置金城郡是為河西五郡且開西域遠出玉門萬里外置都護唐亦因之二代幅隕可謂廣矣下逮於宋舉長安故寨多棄而不能守固不逮秦無論唐漢及明興使耿炳文收河湟馮勝取甘肅而於嘉峪關盡至介以界華夷其燉煌無論數千里委之外藩

不知古玉門陽關者安在遑問都護長史之置然較之秦則亦過之迄於中葉夫東勝而秦漢唐之沃野千餘里在河山之內所謂河套者公然為穹廬歷二百餘年矣今之疆域率由明舊可攷而知也其地南始於階州而河州西而西寧折而北而莊浪又西而涼州甘肅州東而靖虜宣夏極於榆林皆邊衛也其塞則或山或河或長塹其緣沿道里則六千九百里有奇其邊吏或專閫或分符或偏裨荷戈之士合五萬有奇時或更張而靡定也其人則漢人土人雜以黑番回回黃番番僧眾寡不一要皆在疆域之中其環於外者則西夷西夷所環始河湟盡宣夏蓋河州之南阻蜀山宣夏之東限河套也考西夷之雜錯西陸者部落數十種而數十年間受羈縻不敢大肆憑陵者種類區分力敵而勢均內懼相兼而謀不協無有能統屬之者是

以苟安於無事今且有如冒頓者強兵習戰東討西征擊月氏
樓蘭烏孫等數十國控弦之士數十萬錯雜塞下之夷靡皆頓
首稱臣望風從命嗚呼可懼也已夫遠有冒頓之禍近有門庭
之寇苟任捍禦者狃於無事不免棘門灞上之不戒則西陲之
憂曷有已哉

右一篇漢書邊紀略幸補鈔以足其舊

西華公暇五月從門人孫小山編修卷之假金無題目
撰人急差數蓋乾隆甲子鈔本近三在厥驛見一鈔本
題曰秦邊紀略五卷索直版印即未開成爲門人李
密差銘收得與四庫存目卷數不同首葉有小注稱
江右黃君所撰既而見定州王氏刻載韓某書題曰
吾李培撰培即李燦剛主之弟也第燕人某何以詳
於甘肅而反昭於宣勤其非李作不問可知猶尋至李
氏後人誤以其祖書耳此書撰人見廣陽雜記且見
引於西域水道記其卷秦邊紀略不新類不可讀亟
從編修仿鈔之而紀其詳於卷首光緒癸巳

月順

李文

後見半畝園中李公作秦邊紀略但爲全書開首一篇餘均與
前書同其後不復有他書矣

河州

河州晉所名也漢曰大夏隋曰枹罕唐曰安鄉宋曰寧河明因晉而名之蓋黃河入中國始於河州禹之導河積石是也

衛古西羌地漢為大夏郡屬金城隴西二郡晉為河州亦曰枹罕縣隋初為河州尋改枹罕郡唐為安鄉郡又曰安昌縣宋曰寧河州亦曰枹罕今州西有枹罕故城州南六十里有寧河城明洪武初鄧愈收復河州洪武五年置河州府十二年置河州衛屬臨洮府今因之黃河發源於星宿海遠崑崙遠流入中國先河州次蘭州又次靖虜至寧夏繞河套折而東南入榆林黃甫川出套經秦晉豫齊魯淮而入于海積石即今積石關在衛西一百三十里漢宣帝置河關縣隋置河關郡宋積石軍駐其地稱積石城

馬。

河州雖亦邊地、雜於西羌、然自有郡縣以來、未嘗淪於夷者何也、河州東有臨洮之府、北有蘭莊之阨、南有洮州之塞、西有西寧之環、四塞內地、獨以一隅臨邊、非如他衛孤懸斗立者比也。
衛本羌地、今之生番熟番、皆西羌種類也。臨洮府在衛東北一百九十里、莊浪衛在衛西北、由喇嘛川黃河西渡四百里、蘭州在北、由洮河黎子山一百八十里、洮州在南、由和政驛二百八十里、寧夏衛在西、由永凌寺渡黃河、經古鄯川口四百六十里、由積石黃河上渡、經巴暖三川、瞿曇寺四百五十里、衛西南一隅通河曲、河曲本在黃河內、明正德間、夷人據之、以至於今。

且不特地利也、衛之兵雖少、其民甚強、其土人甚盛、其熟番皆

轄於土官其黃衣僧皆聽命於國師其弓矢及矛比屋皆有無事則耕牧為生有事則相為守助其馬則蕃庶羌人畜牧尤多明制立茶馬司於是其土地所生有麥有糜有豆有青稞且移粟以資湟中然則四境之內襟山帶河兵食足矣雖亦臨邊可謂內地宜乎不淪于夷也

衛今設副戎一、又起台堡保安堡歸德堡守備三人或云其先世夷人居中土已久服食男女與中國無別且久與漢人通姻與漢人言則操漢人音又能通羌夷語其實心為漢非羌夷所可及云西寧莊浪者亦然衛西番二十四族皆轄於蘇韓哈王四土官黃衣僧即番人而為僧者衣帽皆黃衛番僧甚多所在動以千計寺有一國師皆襲封其最尊者有金印蓋洪武間國番僧公哥監藏已藏卜等

入貢、於是賜詔封國智妙覺弘教大國師、使其統治僧民、衛出馬特多、由土人熟番、回回生番、俱以尊牧為業、按洪武七年、立茶馬于河州、弘治間、楊一清言、唐時回紇入貢、即以茶易馬、宋熙寧間行之、所謂採山之產、易廐之良、無害而有利者也、我朝納馬、謂之差發、如田之有賦、身之有庸、非虐使于番、因納馬而酬茶、體尊名順、非互市交易之比、且西番為中國藩籬、其人本非我之孝子順孫、徒以資茶于我、絕之則死、故俯首服從、此制番之上策、前代略之而我朝獨得之者也、頃自金牌制廢、而私販盛行、失利已久、豈徒邊方乏騎乘之用、將來番無資于我、跳梁自恣、將生意外之憂、撤藩籬之固、甚非計也、今茶馬互市亦同於昔、官茶易馬、每揀頭八封茶十二、易皇馬一騎、揀頭六封

茶八、易營馬一、騎、揀頭四、封茶六、易驛馬一、騎、六衛雖不產稻、而麥、豆、雜糧、隨地皆有、屯糧多至二萬六百八十石、可以知之矣、麥、豆、雜糧、輦載驢馱以往西寧者、不絕于路、衛治西至黃河四十里、北至黃河八十里、

河州在昔至今、不淪于夷、而明中葉以來、乃有竊據一隅、觀變而動者、咸脇從我屬番、殺掠我兵民、焚燒我積聚、要盟我城下、往往有之何也、

武宗正德四年、大落赤據工川、常犯河州、真相據祁刺、川亦犯河州、今西夷達達、嘉往牧、捏工川及南岔灘部落、三千有奇、康熙十四年、圍衛城一月、康熙二十二年、又犯衛地、

西南有二十四關、關之外有甌脫之地、名河曲焉、亦謂之九曲、

之地世所謂小河套是也雖在河內千里間地無居人近有起台遠有保安尤遠有歸德鎬堡屯兵于其中會滄海一粟之不足宜夷之盤據滋蔓于河曲而為我河州患也

麻山關、安龍關、大馬家灘關、小馬家灘關、鴉塘關、斗石關、思巴思關、殺馬關、喬家叉關、西耳關、槐樹關、閃半關、土門關、朵只巴關、牟尼關、老鴉關、別藏關、雀家關、石嘴關、樊家關、五台關、積石關、紅崖關、今所謂二十四關也、關皆山、險林木茂密、關之東則河州內地、關之西則小河套、即九曲之地、亦曰河曲、蓋黃河曲折傍岸之總名也、起台堡在衛西二百里、保安堡在衛西六百七十里、歸德堡在衛西一千二百里、三堡皆在河曲地、各堡僅一守備、其兵民俱非漢人、乃土人云、三堡之兵分地偵探、此舊例也、

夫西南之間內有二十四關以為扼塞而猶有夷患者何也蓋二十四關崇山峻嶺茂木深林蹊徑狹隘有山川之險矣關東二十四族之番雜土人回回而居有民人之衆矣苟相地而置兵因形而乘陣夷固不能以飛越灼灼明矣今河州起臺之兵盡壞分守之一關之間寥寥數人焉民雖強不可以勝戰地雖險不可以無兵乃經畫之疎顧至於此是猶使三尺之童當戶而捍虎狼之入也豈可得哉

二十四族熟番專事中馬每族有土官爲長以統束之二十四關自麻山而西北至石嘴皆河州之兵防守自老鴉而北皆起台之兵防守

二十四關外雖千里空虛地然有起台保安歸德三堡而夷猶盤據蔓延者何耶淮南王曰非強不能服非威不能制當明初

興鄧愈招諭河州。雖絕遠如朵甘思、烏斯藏、咸慕義來歸。況疆域之中如河曲者乎？夷不敢居河曲，則設官置戍于三堡，不過遠為偵候耳。乃其衰也，亦卜刺據青海而火落赤真相遂分據。捏工川、莽刺川、騷動河州，迄無寧歲。何有于三堡？三堡獲于瓦全幸矣。責墟及以障滔天之水，當無若是之苛也。

明洪武三年，左副將軍鄧愈追元珠王至西黃河，詔諭河州土番諸國。元帥何鎖南、普化兒只江來卜納剌等皆納印請降。于是河州以西，朵甘思、烏斯藏等部來降，以指揮韋正守河州。其時城邑空虛，人骨山積。韋正日夜撫循軍民。河州遂為樂土云。朵甘思、烏斯藏俱詳于後。

河曲之地，漢時本西羌燒當、唐鍾存等所居。明正德間，夷人大落赤據捏工川，真相據莽刺川。其時亦卜刺已據

西寧之青海相為犄角侵暴河湟云亦卜刺詳後四衛中
按柳工川在衛西南八百三十里荊刺川在衛西南九百
二十里皆河曲地也火落赤真相等竊據既久侵犯頻仍
陝西巡撫田樂于神宗萬曆二十三年調兵青海一敗之
于西寧之大小康驢再敗之于衛之輝避河口于是部落
散亡逃于海腦之西火落赤奔烏斯藏真相不知所終而
青海四衛間惟卜兒孩一部落為獨盛久之使其子居河
曲今住牧河曲之達爾加黃台吉乃卜兒孩之孫云
河曲之間如是乃以三堡有用之兵置之無用之地不妻而去
之何也夫楊矩棄九曲地悔不可追曹鳳請廣設屯田隔羌夷
之路殖穀富邊省轉輸之役考之于古棄之不可也

唐楊矩以九曲之地盡與吐蕃吐蕃就之以廣畜牧侵犯

內地、矩悔懼自殺。漢曹鳳曰：燒當居大小榆谷，土地肥美，又近塞內，南得鍾存以廣其衆，北阻大河，因以為固。又有西海魚鹽之利，緣山濱海，以廣田畜，故能強大，宜復建西海郡縣，規固二榆，廣設屯田，隔塞羌夷交關之路。于是和帝拜鳳為金城西部都尉，開田二十七部，夾河與建威相首尾云。

河曲不宜棄，然自明以來，不築城障，列亭以守，何也？夫河曲與延綏之河套，皆在黃河內者，河曲千里間，空虛無際，不若河套三面環河也。自古無城郭，不若河套之多州縣也。山谷沮洳，不若河套之平行也。荒蕪既久，土瘠沙深，不若河套之膏沃也。僻在一隅，不若河套之當西北衝而介于秦晉也。輕重難易，不待智者知之，河套可守，固已棄之，而何有于河曲不毛之地？雖欲

守之其誰守之

河套在寧夏之東榆林之北其地自秦漢以來皆郡縣其上地肥美大宜耕種明武宗正德間漸為夷據及王

換余子俊築榆林邊遂弃之于夷詳後近疆中

棄之不可守之無功何也夫長駕遠馭者視乎勢立疆守土者因乎時因時制宜者在乎知通變河曲未有夷患則置三堡以蔽河州也棄之不可為當日言也夷已據之而拘牽舊制以三堡為告朔之餼羊是寇在門戶之內乃守于通衢之上雖不之棄甚于棄焉守之無功為近日言也

衛迤西九十里為老鴉關又九十里為起臺堡又七十里為上北莊又九十里為撒刺坡坡為三堡之關鍵其地生番頗衆今土官韓清見銃束之又一百三十里為金銀又

九十里為邊堵。又一百一十里為保安堡。堡孤懸塞外。肘腋生番。一線通道。又西四百里為歸德堡。而中華地盡。然則計將安出。甲驅夷遠去。增三堡之戍。拓三堡之城。善之善者也。然其勢有所不能也。撤保安之兵。退守二十四關。以與起台相犄角。則河州西南兵益多而守乃固矣。

保安堡守備一員。馬步兵一百二十八名。其地產金。碣子。毯毯。堡皆土人。距控工川一百五十里。今其兵皆土民。無一漢人者。餉則衆共分之。糧即所應輸者抵之。而一守備孤處其中。若贅疣然。且近為其豪王喇夫且所脅。常居衛。不敢赴汛也。

歸德密邇西寧。割以屬之。則往來應援。庶乎不阻。此皆不得已而權宜之計出焉。

歸德堡元以為歸德州置土番宣尉司明成祖永樂四年
建歸德守禦千戶所統治屬番中茶馬堡五穀俱產城中
皆土人堡東至河州一千二百里北至黃河八十里又二
百八十里即西寧衛南至四川打箭爐六百里東北至控
工川七百里東南至莽刺川六百里今堡設守備一員所
千戶一員兵皆土人其往來衛治因河曲皆達爾加部落
及生番住牧道路中梗久借徑於西寧迺遠始得達云

若夫河州內地也據險守塞講武務農加惠土民撫恤屬番馬
入于廐可也糧齎于夷不可也苟守斯土者加之意焉則河州
庶其無患而河西隴右亦藉蕃藪之固矣

西寧衛、雍正初年、改衛為府、附西寧一縣、碾伯縣屬焉、

西寧南連河套、西接青海、北倚祁連、疆域而外、遐荒絕域、靡不可通、無梯航之勞、且海河地盡肥饒、祁連宜于畜牧、夷未有不徙家相就、樂得為鄰者、

西寧之南、二百里許、即黃河、黃河南北之隙地、亦謂之河套、與寧夏榆林之河套不同、青海即西海、在西寧之西、四百里、海周十餘里、祁連山在西寧之北、三百餘里、其山延長千里、跨涼甘肅之南、連西域烏斯藏諸國、西北連金山、及回回諸國、西連哈烈諸國、無所不通、唐楊矩以九曲肥饒之地與土番、土番就之以廣畜牧、北魏袁翻曰、西河土地沃衍、大宜耕種、夷常歌曰、寧我祁連山、使我六畜不蕃息、蓋其上積雪不消、其下冬暖夏涼、水草大善、故宜於畜

牧、今青海為達賴黃台吉所住牧、滾卜川為達爾加台吉住牧、大通河為麥力幹黃台吉住牧、今西寧邊外、凡西域諸國駱駝馬驢往來不絕于道、西寧有總戎五營、全設額兵五千、外有城守兵五百、鎮海營參戎一、古鄯三川遊戎二、各堡守備四、統兵七千名、西寧有四川、四川者、南北東西之川口也、東川之南則達爾加部落、其北則麥力幹部落、南川口、西川口、則達賴部落、西寧土司所轄僅萬人、祁土司所轄十數萬人、其他土官吉納阿陳等所轄合萬人、土人所居、悉依山傍險、七聚相保、自守甚嚴、莫敢犯其疆域者、此明制之最善、蓋亦本之五代與、五代用土豪為衆所服者、封之州邑、征賦所入、足以贍兵養士、由是邊鄙無虞、且給以衣祿金帛、又以土人補將校、使勇者貪于祿

而富者安于家也、北川外漢人之作奸犯科、及逼于不得已者皆在焉、夷無苛政、凡為盜者、以九九罰之、如盜馬一匹者、罰馬九匹而已、殺人者不死、以家所有之半、為償命錢而已、存淫者、出牛羊頭畜為遮羞錢而已、其盜而涉于疑似、殺而非兵刃、姦而非強、且不得首馬、夷之微斂、若豆麥青稞、若牛羊駝馬、但十分而取一、不及者不取也、歲一取之、謂之^沙沙、往來番文、必附饋遺之物、輕則皮毛、重則羊馬而已、謂之壓番文、又謂之手信、附近番子有明歲時納茶馬者、謂之熟番、其散出山外、易有無于熟番者、謂之生番、有十三族、皆熟番也、曰申藏、曰章哏、曰隆奔、曰巴沙、曰羊哏、曰申中、曰隆卜、曰西納、曰果迷卜哏、曰阿琪、曰嘉爾耶、曰巴哇、曰即爾嘉、皆羌也、先零罕开之遺種也、十三

族謂之十三大族其後小族甚多如刺卜族紅冒族之類不可勝計今西寧誌悉去其籍不可詳數矣海夷當嘉靖時常入寇邊番族受其害者燒帳房掠羊馬擄婦女殺丁壯番皆畏之願為部屬然後攻土民殺漢人敗官兵無所不至今諸番分納各夷添巴不中中國茶馬已判然為夷屬萬曆間夷犯內地驅番為導引前鋒番既獲利為害河湟甚于夷矣莊浪在東北三百七十里河州在東南四百五十里涼州在北由莊浪七百一十里甘州亦在北由莊浪一千一百九十里莊浪東南則大通河西北則邊外洮河之西南則河套甘涼之南則祁連山北則塞外所謂環夷而守也

曰西寧據蘭靖寧延之上游當莊涼甘肅之左腹王韶謂欲取

西夏當先復河湟火落亦謂晉兵牽制西寧精兵搗河洮臨鞏則五郡皆囊中物由是觀之西寧為重于河東西有較然矣

按西寧之東南皆近黃河而黃河由蘭州而下經會川縣靖虜衛寧夏鎮以至榆林故曰西寧據上游也甘涼肅如人吐舌然咽喉之地必經莊浪而西寧當莊浪之西南故曰當左腹也宋王韶平西夏疏曰欲取西夏先當復河湟則夏人有背腹受敵之憂蓋宋時河西諸郡皆為夏所割據也明火落亦謀于夷王俺答曰留一部于海西以為牽制潛渡精兵直渡洮河破其臨鞏則河西諸郡不攻自下五郡皆囊中物矣

曰西寧之重如此而歛之難計將安出曰惟有鑒有明之得失而已西寧萬山環繞三硤重圍有明于凡走集蹊徑則重門擊

析罔或怠焉、非善守乎、夷馬近疆、人皆得奪首功而邀重賞、非善禦乎、予四衛以名號、貢馬有常期、安插有地、因俗為教、而吉凶與之同患、不足以服異類之心乎、土司授以世官、恩有加而賄不索、不足以服向化之心乎、此有明之得也、及其中葉、大反初政、亦卜刺等、據有青海河套之間、廢四衛而不能復、掠諸番而不能救、疆場騷動、迄無寧日、豈惟西寧貼在危亡、即河東亦同于累卵、而當事者痛飲于危牆之下、歌笑于漏舟之中、此中晚之失也、非鄭洛招番、田樂主剿、則西寧為左袒久矣、由此觀之、鑒戒不較然乎、

按西寧四境、皆重岡複嶺、東有大石硤、小石硤、西有西石硤、捐之三硤、明制夷人近邊、不論漢人番人、能斬夷一首、級者、官賞銀五十兩、故夷遠避于沙漠、莫敢近焉、四衛者、

曰曲先曰罕東曰安定曰阿端是也有明皆加以指揮及
千百戶之職每歲一起西寧茶馬司互市明制各番皆使
部落有數中馬有額安插有地保護有方又因其俗信佛
擇番僧中為番所敬信者創立寺宇封以國師禪師之職
其番中之豪而有力者授以指揮千百戶以統率諸番族
馬明初以土司招番有功賜之鐵券予以世襲明正德四
年小王子丞相曰亦卜剌與阿爾克斯據掠四衛奪據其
地嘉靖間俺達永邵卜又據之明季卜兒孩據青海大通
河今沿邊之夷皆卜兒孩之子孫也河套即西寧之東南
黃河套也套有掘工川嘉靖間大落赤據之莽剌川真相
據之自亦卜剌竄居西海曲先阿端皆逃散祇罕東安定
徙近沿邊四衛遂廢萬曆十九年經略鄭洛招回生熟番

七萬五十人。化為良族。二十三年。巡撫田樂與夷絕款。調兵青海。先敗青把都于昌寧湖。次敗賓免等于松山。又敗永邵卜真相等于西寧之西南。川口遂清。青海西寧乃得稍安焉耳。

西寧邊堡

巴暖三川 西寧東南二百五十里

古鄯驛 西寧東南二百六十里 巴暖三川北一百三十里

巴川堡 西寧東南一百三十里 古鄯驛西三十里 西北至上川口四十里 西至下川口三十里

下川口 西寧東二百七十里

上川口 西寧東一百八十里 下川口西北一百二十里

老鴉城 距西寧城一百一十里 上川口西五十里

碾伯城 西寧東一百四十里 老鴉城西四十里

平戎驛 西寧東七十里、礮伯西四十里

西寧衛 在鎮海營東五十里

南川口 西寧南四十里

西川口 西寧西三十五里、南川口西北三十里

銀塔寺 西寧西南三十里、西川口北十里

鎮海營 西寧西五十里、銀塔寺北四十里

多巴 西寧西五十里、鎮海營西北五里

北川營 西寧北七十里、多巴東北七十里

威遠堡 北川營東七十里、礮伯城西一百里

冰溝堡 西寧東北二百二十里、威遠東一百八十里

西寧近疆

巴羊戕川 西寧東南一百七十里、羊戕驛南一百餘里

歸德硤

西寧東一百二十里南川營東四十里歸德之孔道也

東西俱爾灣皆在鎮海西七十里

青海西寧西四百里接界

罕東衛

青海東北西寧西北三百餘里

曲先衛

罕東衛北大通河南西寧西北三十里

安定衛

青海北曲先西南西寧西南五百八十里

阿端衛

曲先西南西寧西南四百八十里

白塔兒

西寧西北九十里北川口西二十里

紅崖溝

西寧北一百五十里係松林硤之口外

掌吉兒壑峴

西寧東北碾伯之西二十里

棹子山

水溝堡北三里

大通河

祁連山南西寧西北

西寧邊堡

巴暖三川十八堡之統名也。東南連河州，東北接蘭州，西北通碾伯，黃河塙限於東，小文山阻乎西，大通河流其北，其延袤二百里，平原築堡臨壑，附巖則置寨，臨流則甃石，山巔平則削四壁，續斷垣於山上，為城可耕可牧可守。然漢土雜居，番夷環處，沿山西行，直走湟中，然皆無人迹之徑也。北至古鄯驛一百三十里。

三川十八堡，皆明副使及官所築。在嘉靖十六年，其地切近黃河，踰則河州之積石關，大通河源出祁連山，流千餘里，會湟水而入黃河，有明於三川之大山下開門起，鹹水溝止，築濬邊壕，有分水嶺，東南之水經美都溝而溉三川，其嶺北之水，則經巴川暖川溝，趨大通河焉。冰雪湮後，其

水溉田疇。故棗黎成林、膏腴相望。其地水草大善。明設宗水監四院。曰永州、曰黑城、曰清水、曰美都三川。蓋孽牧土人、皆李土司所部。熟耆生耆目不可考。夷即達爾加之部落。在三川之南。控工等川是也。三川有遊戎。西至西寧二百五十里。

古鄯驛。河湟之孔道。唐為鄯城縣。東連馬營。南障雪山。四境山環重岡。複嶺路通兩碛。湟中東南之保障也。自是而西。皆湟中。大路。蓋萬山深處也。西至巴川三十里。

驛為河州西寧之大道。其東悉皆土人。番族語言不通。非河湟人則罕由之矣。馬營寺在東七十里。皆番僧。雪山在南百里。山高積雪。因而名焉。鄯城縣。唐高祖時所置。西寧之水名湟水。故稱西寧曰湟中驛。明置兵九百名。增至一

千五百名、今議置遊戎、既而復裁驛、西北至西寧二百六十五里、

巴川堡土人所居、東接古鄯、西通黑山、北臨大通河、河山之水皆可導以溉田、土人自守倍于兵民、漢人無居此者、山高而地瘠也、西北至上川口四十里、西至下川口三十里、

巴川土人屬治土司所轄、古鄯在東三十里、黑山在西二十里、黑山亦土人所居、分水嶺之水、經紐東溝、米刺溝、而至巴川溝焉、堡西北至西寧二百三十里、

下川口亦土人所居、東南沙井、北接紅古山西之間、車不能方軌、人不能成列、田疇有水可引、高高下下、稼穡艱難、瓜菜非饗殮物也、西北至上川口二十里、

沙井驛莊浪在東一百里、自下川口取道馬回子坡、虎頭

崖則至沙井矣、紅古城亦屬莊浪、在下川口北五里、自下川口西至西寧二百七十里、

上川口土司李氏之所居也、明初李南哥率衆南歸、使之招番討叛、大有功績、賜鐵券虎頭符、今其精銳土人尚以萬計、朱邪赤心盡忠于唐、後裔之昌宜哉、其地南接巴川堡、西接虎刺害、北限河水、東通蘭州、高山深谷、可四達焉、西至老鴉城五十里、巴川在南五十里、虎刺害城子亦土人耕種、在西三十里、自古鄢而向西寧、必由之路也、北抵黃河五里、東由莊浪地、直達蘭州、今設有把總、西至西寧衛一百八十里、

老鴉城莊浪之驛遞也、漢土之所雜居、東接上川口、北連棹子山、西抵瞿曇寺、南臨河而北負山、依山為隘、則甜水溝據險扼要、以絕夷氛、勝番關稽察出入、以備非常、無容緩也、南近阿壩、

阿壘之南、黑番聚集、而添巴外貢、不宜防與、自老鴉而趨莊浪、則東北四十里有冰溝、若趨西寧、則西四十里有碾伯、

老鴉城、莊浪西寧、必由之大道也、由大山硤、踰山、抵上川口五十里、桌子山屬莊浪、由白崖子抵山一百里、山皆黑番所居、翟璽寺在西七十里、由紅水店虎狼溝抵寺、寺皆黑番所居、永樂間造、極其莊嚴、河即湟水、發源西北之熱水山、流數百里、遠西寧而通大通河、會于黃河、在西寧境、謂之湟水、俗名西寧城河、渡河一里、即阿壘堡、黑番即十族中之番也、自城至西寧一百八十里、城有把總、

碾伯城、或作碾北、南涼之樂都縣也、明洪武十一年、置碾伯衛指揮使司、倉學所驛、建置紛然、亦湟屬之大鎮焉、東接老鴉西連威遠、南通南林、北抵勝番剌防、可謂八達矣、湟水南流、而城

園就圯則脩築之當議者背負崇山而土官溝各隘邊壕不修則板築之宜急者也西至平戎驛四十里

南涼禿髮烏孤于此置樂都縣威遠堡在西北一百里由岡子溝至南林大山六十里剌防溝即西番溝在北四十里勝番關亦在北四十里南門外即西寧河碾伯邊隘有土官溝蘇家大窰夏兒把營等處舊皆築邊濬濠其他榨澗斬斷崖石者甚多不可勝數城有守備西至西寧衛一百四十里

平戎驛南北皆夷也南極石扎巴北盡紅崖溝南北百里皆為綏服西寧孔道不絕如綫幸而土番雜居有鄉田同井之風趙充國得屯田可墾者二千頃在此也大硤在東小硤口在西四十里而小硤則漢之湟硤唐之省章城古之綏遠關馬往來要

害控制咽喉于是乎在而皆不聞設官置戍何哉西至西寧四十里

石扎巴在南九十里黑番所住牧也石扎巴之北四十里有撒刺兒破內入平戎之路也石扎巴之南五里有巴羊藏川西夷達爾加部落所住牧也紅崖溝在北一百里即松破破口外黑番兒間隆族所住牧紅崖溝之南有白馬寺內入平戎之路也紅崖之北踰山十里則大通河乃西夷麥力幹部落所住牧也

西寧衛漢初為龍居郡霍去病逐羌築龍居塞因名龍居郡趙充國伐先零罕开請置破羌縣魏置西平郡晉隋因之唐亦不改宋初為鄯州西平郡既失復收改為西寧郡明初長興侯耿炳文下河西改為衛湟水西來浩疊東扼為得形勢然衛孤縣

天末而歷代得失每在五郡之先豈盡無援之故與衛之輻輳殷繁不但河西莫及雖秦塞猶多讓焉自漢人土人而外有黑番有回回有西夷有黃衣僧而番回特衆豈非互市之故哉城之中壯驪黃伏櫪常以萬計四方之至四境之牧不與焉羽毛齒革珠玉布帛茗烟麥豆之屬負提輦載交錯于道路出其東門有不舉袂成雲揮汗成雨乎雖帶甲五千而外加以城守之兵足以控制巖疆防閑奸宄然奸每生于峻防之地亂恒伏于不見之間則利為之階也西至鎮海五十里南至南川四十里湟水源出熱水山北流五百里經伯顏川與那孩川遠衛城北又東南流五百里黃河伯顏川在西北五十里那孩川在城北數十里浩疊今其地不可考或以為即小硤口焉五郡即武威張掖酒泉燉煌金城也而西寧在河西不

尙錢珠嚴之下
官接自大梓坡
八至乾溝關

與五郡之屬者、漢以之屬金城也、金城今蘭州、湟城內外
皆輻輳而城東為最、黑番雖半食力為人役、回回皆擁資
為商賈、以及馬販屠宰之類、文有倉事通判經歷、武有總
兵五營全設、故至五千名之兵、又有城守營都司、

南川口各堡之總名也、營在水泉兒塞、明副將達雲與夷戰於
閼門之間、申中等族尾於閼門之外、殺夷甚衆、京觀可築、東有
歸德硤、圯塌城溝西有王溝兒硤、直接青海、南閼門之外申中
刺卜番族而南、遠抵黃河、直通河州之歸德、故西寧之受禍者
南川居多焉、昔于各隔塞交關之路、扁鍵殊嚴、霽乎、綢繆之計、
此其時矣、北至銀塔寺十里、

祁廷諫有明授指揮使、朵爾只失結有明授指揮僉事、大
康纏在西寧城西七十里、又西二十里為小康纏、嘉靖間

海夷乞款後、復犯邊愈甚、及田樂為巡撫、知必不可款、乃徵河西各路兵、洗清青海、西寧兵與夷戰于大康驢、大勝、殺賊甚多、海氛遂息、乾河等山口、舊皆有邊、猶牆挑壕、斷斷山崖、築砌石台、以備夷騎、刺撒西林、尤為要害云、東至西寧城三十里、

銀塔寺、一名塔兒寺、寺有樹葉形如人、謂之千佛樹、又謂之寶

貝佛、其實即菩提樹也、廣東亦有之、其葉經舂澣則如絹如紗、其紋有如雲如人者、海夷達賴將銀裏樹、每歲六月、不分番夷、盡集于寺禮拜、寺無隙地、霍英所謂以拜佛為名者也、至此者、北由北川關門、西北由鎮海多巴、西由西石硤西納川口、北迭溝口、東南由南川口、寺北至鎮海四十里、東北至西寧三十餘里、鎮海營、茶馬互市之通衢也、東距西寧南、連銀塔北近多巴而

今峰下當接
燧不設以者車
書一統乎云々

接北川、西踰黃河而通石硤。蓋青海而川大通有夷住牧。以是
為西寧門戶。馭于斯戰于斯。所有來矣。故營之初制距海纔
四十里。所謂西海郡者是也。有明移置于此。而四衛猶居海壩。
貫為外藩。嗣鎮海之外藩皆為外侮。營西至石硤。天險與夷共
之。東西拘爾摩。盡為要荒。思冬灣伏兵之地。今峰自大輝坡以
至乾溝關。土山石崖。續以短垣。墩台相望。靡不周至。猶且有青
海二川之夷。荼毒乞答。真伏羌等堡。猶且敗績于王溝兒硤。奏
凱于捏耳朵硤。况昔西海孔熾。而申中各族納其添巴。其所謂
隔塞交關者。曾不苦折柳之可懼。狂夫也。西北至西川口三十
里。

歸德硤在東南三十五里。番族住牧。圪塨城溝在東四十
里。王溝兒硤在西三十里。青海亦謂之西海。昔達賴黃台

吉于北住數馬、南川間門外南二十里、申中族堡寨、西四十里、刺卜族堡寨、南川南二百四十里、即黃河、渡河即河州之歸德堡矣、大樺皮、北至西寧城七十里、有明時西海之夷、有亦卜刺、繼有永邵卜卜兒孩等占據、擅工川莽刺、川謂之二川、有明時火落赤據之乞答真、田家寨在西寧城南四十里、伏羌堡、在城南五十里、明副將李魁禦夷于王溝兒硤、敗、劒死之、副將連雲追夷于捏耳朵硤、斬夷甘把都爾恰、捏耳朵硤、在西寧城南一百里、熟番十三族、皆納夷添巴、南川總堡有守備。

西川口、土司西祁之所居也、東西二祁所轄之王民各號稱十萬祁氏、蓋祁廷諫、尉爾只失結之後、所居在三祁寨、而西寧之共夫大厦者、非李祁土司而誰也、効命之賞未行、苞苴之索未

猶有重捍以備
之者下皆持乎
綢繆之計

已何以服土人之心哉且西川之西張天討于大小康纏者不
款之效也今之乾河打草灘哈爾各山築亭障猶有行焉者乎
刺撒西林時為出入衝要猶有重捍以備之者烽燧不設以為
車書一統乎彼荐食上國之心包藏禍心而未已也西渡河五
里為多巴

西寧在東五十里考之各書皆謂去西寧五百里六百里
未嘗至其地也或謂就古鎮海在青海傍者而言亦不可
知營銀塔在南四十多巴在西北五里北川口在北七十
五里湟河在西一里踰河即多巴西石碛在西二十里西
海在西三百里王莽使卑禾羌獻西海地遂置西海郡為
中國地高適詩青海只今將飲馬黃河不用更防秋蓋言
屬內地也明

置軍東安定、從道沿邊、而四衛、廢東西、拘爾灣、在黃河東者、為東拘爾灣、在西者、為西拘爾灣、皆黑番堡寨、距鎮海七十里、昔鎮海渡河而西、皆屬達賴、黃台吉、參力幹、黃台吉、設營有叅將、

多巴、或作多霸今之夷廠也、在湟河之西、其地名不著于昔、蓋新創也、居然大市、土屋北連、其廛居遠、末則黑番也、出而貿易、則西寧習番語之人、馱載往來、則極西之回與夷也、居貨為賈、則大通河、西海之部落也、司市持平、則宰僧也、至于那顏、獨無之多巴、豈非內地、而顧為夷之壑、斷哉、北至北川七十里、

宰僧、夷之頭目、言長官也、達賴所部、宰僧一、參力幹之所部、宰僧一、家居多巴、主市者、那顏、漢人稱之、長官也、多巴西二十里、始出柞、內為草地、則夷廠在內二十里、東南至

鎮海五里、東至西寧五十里、

北川營亦總堡名、東踰馬圈、西接刺銀、北有東西閘門、閘門之外、白塔兒、回之叛亡而附西夷者、及漢人之亡命咸、萃淵藪焉、邊堵而外、築室耕田、即與以十左氏、不能易之、苟有中行說、郭藥師、以及張吳元、吳輩、則為害于國者、豈淺鮮哉、西寧之最可慮者、不在斯乎、東至威遠七十里、

營在新城堡東、渡河二里為毛家寨、更東十里為上馬圈、堡又東五十里為威遠堡、皆內地也、西踰大山六十里為刺銀、則達賴參力幹牧地、皆外地也、東西閘門在營北十里、順治戊子、回回叛亂、逃亡于此、漢人及回築高屋莊、田置水磨、斗車、種麥、豆、青稞、凡牛種皆參力幹所給、而歲納添已、若種毛、其地積年百數十里、村堡相望、中有

白塔因謂之白塔兒。自南川以至北川。雖有邊牆。高者不過三五尺。卑者可緣牆而工也。或隘口及頃圯者。亦積薪于下。布土于上。西寧極邊之地。始如是。布置其稍遠于邊者。則如此。布置且無之矣。北川有守備。南至西寧八十里。威遠堡。即東川也。亦堡之總名。川地廣而隘口多。指不勝屈。其黑松林硤。雖兩山壁立。而中有通衢。昔常遇以邊堵。閣隆寺。閣門之外。即屬龍荒。啟閉何常。盡慎耶。自威遠而東。復至礪伯岐而合也。由礪伯而老鴉。必由之。大道若夫合而岐者。老鴉而東北。則有冰溝焉。自堡至冰溝。一百八十里。

東川營在威遠堡營。就在沙塘永樂間。改為廣牧。其川特寬。美地茂草。有二監八苑。二監者。甘泉。祁連也。八苑者。廣牧。麒麟。紅崖。溫泉。西寧。大通。永安。古城是也。陝西共六監。

莊浪甘州各一、而西寧有四馬、暖川三川各一、而威遠獨有五馬、黑松林硤、南至西寧一百里、爾閣隆寺、黑耆所居也、在營北二十里、東至碾伯一百里、碾伯至老鴉四十里、老鴉至冰溝四十里、營有守備。

冰溝堡在小山之巔、土人所居、北負桌子山、南面荒山、中通一徑、乃莊浪必由之孔道也、舊有硤梓邊溝壕澗、斬斷石路、以防不虞者、今不期怠而怠矣、自是而東北、由大通河、則莊浪之西大通矣。

桌子山、黑耆所居也、堡有把總、西南至西寧二百二十里、羊他石在東北二十里、西大通又在羊他石之東北三十里、西寧邊地自巴暖三川至于冰溝、几十有七所、九百二十里、其長城或有或無、整或險或平、不能執一論也。

西寧近疆、自西寧東南接河州界起、迤而西、折而北、直接莊浪界止、巴羊戡川、在西寧之南、其水發源于南山、涯流而入黃河者、川近內地、善水草、昔為番族住牧、今河曲之夷、部落既多、冰堅可渡、恒牧于茲焉、

巴羊戡川、在西寧東南一百七十里、平戎驛南一百里、川地平、水不深、蓋西寧南山一派耳、黃河在川東南九十里、本番族住牧、及夷人據、番乃北徙于石扎巴、其地今夷人達爾加部落所住牧焉、

歸德硤、在西寧之南、南川口之東南也、硤為歸德堡之孔道、故名、河南與歸德堡、今往來常假西寧道者、必由是硤、番族居之、而斗租石賦、不入縣官、顧聽于夷、何哉、

歸德硤、在西寧南一百二十里、在南川營東南四十里、今

黑番住牧其番類未詳皆納夷添巴

東西俱爾灣在西寧鎮海之西夾湟水涯深也湟水東流之灣乃北流俱爾灣舊為內地安插黑番自青海四衛俱為夷有黑番外向又何足怪

東西俱爾灣在鎮海營西七十里湟水發源塞外熱水山東趨西寧灣水東西者一在湟東一在湟西也四衛為夷有在明正德年間灣今有黑番住牧

青海即卑禾海在西寧之西其週千里其味鹹其魚斑黑其中有海心山山有寺喇嘛或居之其山縱牝馬或得龍駒其海非近寒冰合人畜不得渡環海之地廣野瀾漫其西北一隅咸沙磧不長寸草其地北川之所匯也豐草之所生也華夷之所通也其南則可達松潘茂州其東則至西寧河洮其西則通西域

各國哈密山出烏斯藏尤近其北熱水祁連諸山祁連之陰則
莊浪甘肅矣青海之地吐谷渾據于漢吐番滅之王莽受卑未
地始為中國置郡為西海周海亭燧相望蓋夸耀焉或曰今海
北四十里有郡遺基云或云是明之鎮海營也明初置四衛于
沿海為外藩故洮河莊湟無夷患四衛之廢則亦卜剌敗惟卜
兒孩一部獨全夷推為卜失免汗今之漫延于青海間者皆卜
失免之苗裔也中國人不察等之四衛誤矣

青海在西寧西四百里唐詩所稱青海者是也唐書載哥
舒翰築神威軍于青海上西海者從王莽所置郡而言也
然北海不誤名西海按北魏涼州刺史袁翻曰西海在酒
泉北去高車所居金山千餘里正北夷往來之衝漢家行
軍之舊道土地衍沃大宜耕種可為重戍鎮防西北云由

此觀之、則西海在五郡之北、今字羅撒之西有海、謂之西海、至于青海在五郡之南、且周匝纔千餘里、不及中國一湖、豈足當四海之一乎、王莽以青海為西海、蓋夸大其事、以為美名耳、海岸周一千二百里、水深而鹹、不可飲、馬海中魚甚多、而不大、無鱗、背負黑點、海中窮海心山、週百里、山有寺、無住持僧、或喇嘛有德行者、冰合而往、至則周行、誦梵咒、欲離北山、亦待冰合、然亦罕有往者、世傳海龍冰合、縱牧馬于海心山、或縱牧海岸、可得龍種云、海岸皆有水草、西寧之西、百谷之水所注、獨海之西北一隅無水草、故皆不收畜其地、松潘茂州皆四川地、河州洮州皆在海東南、自海而往松潘茂州、必渡黃河、其里至則可考、亦通四川之打箭爐、哈密在西北、金山即沙陀、在海之西、今噶

爾旦所居之地。或云自海至金山納六十程云。烏思藏在西南。今達喇嘛所居。熱水山在西寧西三百里。在莊浪西南。祁連山在西寧西北。在涼川甘肅南。遠近不一。不可里計。青海東至西寧四百里。東北至莊浪六百里。北至涼州之黃城兒。行十日。北至甘州之偏都口。行十有二日云。今近海四十里有城牆基址。相傳明初立鎮海營于此。四衛廢。乃移營于西寧西南五十里。然無可考。明正德間。夷亦卜刺乃擁衆萬餘寇涼邊。又請居哈密。至西域貢為中國外藩。議者不許。四年。乃侵青海之四衛。掠諸番。盡有其地。則因夷人中之有才能者。中國不善用之耳。而永邵卜兒孩之屬。皆依焉。及拉力民。轉答。往來海工。火落赤。真相黨。延於南。賓兔。宰僧。青把都兒。犄角於北。所以洮河。湟莊。

多夷患也。亦卜刺據青海二十餘年。為吉所襲。惟卜兒孩
獨全。遂稱卜失兒罕。盤據四衛。今之達賴黃台吉。卜兒孩
之子。麥力幹達兒加黃台吉。皆卜兒孩之孫也。青海今夷
人達賴黃台吉住牧。

罕東衛在青海東北。有明置之。以處西羌別種。初西羌知天命。
稱臣獻馬。乃賜之冠帶。給金牌。歲一至西寧茶馬司。彼此互市。
于是封鎖南吉刺思為指揮。傳其兄塔力襲數世。無他變。衛無
城郭宮室。以櫬帳為廬舍。逐水草。孳牧畜。與曲先安定阿端輔
車相依。而各分地。要不離乎青海左右。及亦卜刺阿爾免斯來
侵。殘掠其衆。罕東之人。徙就西寧沿邊流為生番。為降夷衛。乃
名存實亡矣。

衛在西寧西北三百餘里。明洪武十年。鎮南吉喇思貢。

馬來降、因置罕東衛、乃以其目為指揮僉事、領其部落中
馬歲赴互市、永樂三年、鎖南吉刺思死、因其兄塔力襲為
指揮、以奴奴為指揮僉事、正德四年、亦卜剌及阿爾克斯
據其地、罕東之人皆徙近內地、衛遂虛、按罕東衛在青海
罕東左衛即沙州、在甘肅之西、相距二千里許、世之著書
者、以二衛合而為一、不知多一左字、相去懸殊、即留心邊
事如王濬、二衛亦不能辨、以此言之、邊地考據、豈易言哉
今遺賴黃台吉征收

曲先衛在罕東衛北大通河之南也、元置曲先元帥府、明因之
而置衛焉、以土人散西思為指揮、傳至黑麻兒、貢獻不絕、互市
相安、及明中葉、夷人外訐曲先之衆竄于窮荒、或依土魯番去
而海上饒野、為他人有矣

衛在西寧西北三百里、元置曲先答林元帥府、明永樂四年、置曲先衛、以散西思為指揮同知、領其衆賜冠帶、給金牌、歲赴西寧茶馬司互市、正統初、以黑麻凱為指揮、常遣其部目火丁赴京貢獻、亦卜剌之亂、曲先達從、今參力幹部落往牧

安定衛在西海北、曲先之西南也、元遣揚州樂戶謂之撒力畏兀兒、元末、自哈密而徙青海、明初、煙帖木兒貢鎧甲刀劍、內附、乃以樂戶之後分為先帖里二族、頃之置衛、合二族為安定衛、給茶中馬、與三衛同、而分地獨寬、二族獨多、及邇夷忌舉族徙西寧邊外、相依仍舊

衛在西寧西南三百八十里、元封哈忽失里為武威王、遣揚州樂戶一族以快其心、遂以樂戶之族為撒力畏兀兒

久之其人同回夷之俗然必養犬豕以自別元末乃同阿
端之人徙于青海其族特衆有不樂徙者則留居哈密焉
或以永樂時遷揚州樂戶為阿克鐵木兒者誤也煙帖木
兒乃安定阿端之玉人貢在洪武七年正德間亦卜刺之
亂衛人或遷甘州或就西寧沿山流為黑番衛地今遺類
部落任牧

阿端衛在曲先西南蓋韃靼別種自哈密遷青海與安定之人
同屬于煙帖木兒者也明初効順來歸亦分二部曰阿端阿真
未幾合阿真于阿端而置衛焉給牌印號紙與三衛同數傳後
不能守其分地遂徙徽外

衛在西寧南四百八十里初阿端與安定皆居哈密族雖
各別部本無分元末遷青海明初煙帖木兒再入貢即分

安定阿端為二部、洪武八年、以煙帖木兒所部凡屬夷種
皆為阿端、以別于樂戶之族、中為互市、同于三衛、及亦卜
剌奪其地、其人分散、遂逃沙漠、衛達廢、今達賴部落住牧
多巴、在西寧西五十里、今互市地也、黑番回回、築土室成衛、為
逆旅主人、凡九曲、青海、大通河之夷、為居壟斷、達而西域回夷
為行賈者、皆于是乎在、世以西寧市口在鎮海北川、惡知所謂
多巴耶、

多巴、在鎮海西北五里、北川南七十里、多巴、復見者、舊為
四地、今為市口也、世所傳西寧市口者、為鎮海北川、即律
例亦不載、及多巴、豈為市口未久乎、今皆番回居住、主市
者夷人、達賴下宰僧一、麥力幹部宰僧一、中國反不設官
焉、

白塔兒在西寧西北川營之口外也。山環地衍其土沃潤其道西域錯雜厥革貂鼠白狼艾葉豹獐獐獐玄狐牛皮鹿麋羊羔厥貨寶鐵金鋼鑽球琳瑯玕瑣福五花毡撒黑刺阿魏哈刺苦木綠葡萄瑣瑣葡萄厥牧馬駱駝犏牛羆牛牦羊羆羊厥居士屋平房木几榻厥人則漢回錯雜各為村落弓矢佩刀未嘗去身厥貢則輸之于夷夷亦蒞以宰僧革麥粟力役之征如民牧焉四方之夷往來如織以舊事于北川今近于多巴惟白塔兒為道主也。

白塔兒在西寧西北九十里北川口西二十里地有塔疊及聖之故謂白塔兒其地之皮及貨皆自至西域非白塔兒所產但聚于斯耳多巴亦然銀鼠白如雪其毛似晉但微短淺而細膩通之狼皮以白為貴艾葉豹其毛青而白

其斑微黑、不似金錢豹之甚、捨猢猻及土豹、沙狐之皮聚而分之、可爲四種、其腹天馬、其領烏雲豹、其腋金邊、其背則沙狐皮也、狐皮以玄色爲最貴、牛皮即香牛皮也、木牛皮、夷以香物製之、加紫紅色茵之、夷以爲靴、則蛇毬不敢近、以爲襪、可避諸蟲、其香雖久不散、瑣福徽黑刺、五花毡皆羊毳織成、產于尖刺恩、安各魯、撒馬兒罕、諸國、阿魏、物之最臭者、西域諸國皆產、塞外各獸頗多、不能盡載、然西塞獨無虎、故不及之、多巴北地之屋、皆高堂大厦、且有倉廩、有小河、激水轉碓于內地、易驢以轉磨、其人男耕女織、且有老學究授四書毛詩章句者、其地之漢人、則西寧之必命、回回、則順治八年之板黨、各仍其俗、共居于此、其添巴則納參力幹、分地給種、皆參力幹所謂宰僧、夷目總名

紅崖溝在西寧北黑松林硤之口外也。山石穢赤，夾道稍寬，溝長十里許，左右多峻小澗，多泉水。羌人牛羊于是焉牧，自亦卜刺亂後，族類多散處莊澤間，其安土重遷者，今西夷臣矣。

紅崖溝在西寧北一百五十里，平戎驛北一百里，咸遠營北四十里，黑番爾加洞族住牧，納夷人添巴，其族甚衆，有居莊浪之西山連城者，五百餘家，皆為中國中馬，不納夷人添巴，居紅崖溝者，其一派也。

掌吉兒壑峴在碾伯之西，兩山峭峙，壁立千尋，罡風起則峴中水六月冰，冰其地西達青海北，由他共石趨西大通峴，無居人，湟莊番族之遊牧者或一至焉。

掌吉兒壑在碾伯西二十里，他共石在峴之東北二十里，又三十里為莊浪之馬營，又八十里為黑古城，又六十里。

為弓犯城又二十里為羅羅城又二十里為豐樂堡又二里至西大通堡焉

桌子山在莊浪之交冰溝堡之北山頂之平如几席然自麓至山腰蜿蜒十里許多茂草冰溝土人歲植牧馬番亦依山而牧云

桌子山在西寧冰溝北三里上先密族于此住牧

大通河在祁連山南西寧西北也河源發于祁連東南流莊浪南山之水雜注之西寧北山之水又注之流數百里經西大通河堡北東流而入黃河或云即可可川屬道元所謂浩疊水也河水迤邐源遠流長不能執一地以名遠近惟源北接涼州東連白塔南通青海西界甘州水不甚深其地可耕可牧毡裘之君長在焉且他夷所居不遇施糴帳逐水草耳惟河源之夷為

東為稼茅覆灰墁有宮室之規而夷人曾不深居乃有牧無度非稟性使之然與河源之間招納流亡牧羊孽馬溉種深耕為根本地旦黃城酸茨河三角城白塔寺兒咎卜等青海之部落凡受令咸聽于此亦足徵其為一都會矣

大通河源在西寧西北三十里在涼州之黃城兒南二百餘里青海北五百餘里甘肅大馬營之東南二百八十里西大通堡屬莊浪河經其南大通河北屬西寧河經其北河流數百里涼莊湟地皆有大通河而源則在咎卜寺西二百里於湟莊涼甘為適中其地在萬山內間廣平衍有土可耕水草大善夏涼冬溫舊為塞外棄地順治十六年麥力幹於此開地伐木陶瓦大營宮室使其長子南力木居之而麥力幹往來于黃城酸茨之間其長子招集流亡

種麥豆畜牛馬。竟如內地。與黃城、酸茨、三角、白塔、皆卜。及
青海之曲先衛。皆其部落。凡事悉來稟命。其誕生。罔不畢
集。今南力木部。落所住牧。

右西寧境內外番夷壤地。附西寧諸隘口。合十有六焉。

小硤口 西北至西寧三十里

大硤口 西北至西寧六十里

哈喇只山口 西至西寧一百五十里

木恰兒硤 北至西寧九十里

歸德硤口 北至西寧一百一十里

旦思貢口 北至西寧一百五十里

西石硤 東至西寧一百五十里

經納硤 東至西寧一百五十里

刺撒兒硤

東至西寧一百五十里

北石硤口

南至西寧一百里

插把硤

南至西寧一百里

西石硤口

西南至西寧一百二十里

紅崖子山口

西南至西寧一百五十里

撒兒山口

西南至西寧一百五十里

西番溝山口

即刺防溝也西南至西寧二百里

黑松林山口

西南至西寧二百五十里

莊浪衛 雍正初年改衛為平番縣

莊浪衛漢之允吾縣前涼之廣武郡也東距黃河南環大通西界烏梢北築新邊其地狹其山寬其土瘠兵民而外土司十萬熟番之戶三千其于河東西為蘭州門戶涼湟堂與甘肅之咽喉靖夏之捷徑車馬絡繹鼓擊肩摩乃諸郡之統會九遠之莊遠也

允吾音雲鴉漢為允吾縣昭帝六年置屬金城郡前涼張氏允吾縣屬廣武郡唐初為涼州地宋為元昊所據元為莊浪縣明洪武十年改置莊浪衛而平涼府所屬莊浪與此不同蓋彼為縣此為衛也黃河在東二百二十里渡河為蘭州即河東也大通河在南一百二十里新邊在此二百里烏梢嶺在西一百二十里土司姓魯本軍卜失加

之後、自明初世襲指揮、今襲職魯宏其子名帝臣、所部精銳有三萬餘人、又有土司姓毛、明伏羌侯毛忠之後、亦有土兵、莊浪衛以保障者、非兵之力、土司之力也、蘭川在東二百二十里、自紅城子野狐嶺苦水沙井驛、金城、關渡、黃河鎮、遠浮橋、即蘭州也、由蘭州至西安一千四百里、西寧在西三百七十里、涼州在西北三百四十里、莊浪在涼州之東、故曰堂與、甘州在西北八百二十里、肅州在西北一千二百四十里、莊浪為甘肅饒道、故曰咽喉、莊浪東北至三眼井、與靖虜之蘆塘相連、自蘆而東七百五十里、至寧夏、蓋便道也、故曰捷徑、凡甘肅涼州之趨河東者、舍莊浪便無他途、故曰統會、

漢收五郡、通西域、率由河漢、故允吾為散地、僅屬于金城、有明

考道里之迂直通四郡者由蘭州而渡黃河故莊浪重而置衛
焉其制文武官必備卒必精其民居中土兵居外地外而熟番
又外而生番其四境之外東蘭西涼西南湟中皆接連疆界易
以防閑其可患者莫如北之大松山此有明之故轍也松山重
岡連阜水草特多垣禦未設之幾特內地之甌脫耳成化間夷
人火篩取道內侵數載一至或一歲一至及單于稽首稱臣諸
邊與之互市蓋霸靡一于塞外之地未嘗開市于腹裏也莊浪
貪皮馬之細忘經遠之艱往事不懲私與互市故大松山數百
里地為賓免阿赤免王廷拊扼背吭久假不歸遂成夷藪及其
東市西剽道路寇攘河東西幾梗呼吸乃縮地築長塹登埤乘
塞亦已晚矣

漢霍去病收河西五郡通西城其出師皆由河州而至西

寧馬莊浪之官、文有監司、經歷、武有叅戎、凡西寧之官兵
皆屬焉。火篩夷人名有明嘉靖間、俺答等蹂躪大通、深入澤
潞、宣大抵紫荆關、且西略延慶、東寇遼陽、無歲不被兵自
其孫把漢那吉歸義後、封俺達為忠順王、弭兵者十數年、
各夷目皆內附、所謂五單于、稽首是謂、邊郡雲中、上谷、榆
林、朔方是也、阿赤免初款于中衛、而私互市于松山、皆隆
慶以後事、長塹、即今所謂舊邊也、築松山于外焉、

初、河湟洮岷之間、青海兩川之夷、蜂屯蟻聚、而莊浪獨安者、夷
處湟西南、而莊浪在湟東北也、湟河各守其地、亦無大患、及松
山已據、夷之南北通、而右臂續、彼招此引、大肆鴟張、犯西寧者
三、寇洮河者再、當斯時也、豈惟河西同于累卵、而莊浪且陷在
危亡矣、惟伏兵扒沙、伏兵連罕、聊固吾圉、不猶奉漏卮而灌焦

耶苟非籌邊老臣、拓築新邊、則莊浪之禍尚可言哉、

青海即西海、兩川即河州之二川、正德間、夷人亦卜剌等相繼據青海、火落赤等據二川、萬厯間、夷犯西寧、洮河、副將李魁、李聯芳、遊擊李芳皆先後禦夷、沒于陣焉、扒沙即今涼州之大靖也、連罕免其地有衆、謂之連罕禿衆、在衛東二百里、萬厯二十六年、巡撫田樂、總制李沐、專意一剿、乃檄副將達雲督率各鎮官兵、為進討計、先克昌湖之青把都、次破青海之永邵卜、其時阿赤免之罕懼、尚在大松山、乃令甘肅之兵、由泗水、莊浪之兵、由黃羊、河東之兵、由蘭州、由靖虜、夷乃悉甲以待、各路並進、互相牽制、而泗水兵直搗扒沙、黃羊之兵直搗魚溝、皆捷、夷乃奔遁、悉平松山、乃起于涼州之泗水、盡于靖虜之索橋、邊邊三百七十

里謂之新邊、環松山于內矣、有明于莊浪開市、其害如是、
近乃有開市于甘州之洪水、害豈小哉、

或曰松山已為內地、然則莊浪今日、不已安如磐石乎、曰莊浪
四境、昔之重地、獨在北、今之重地在西南、何也、青海漸繁、倍徙
于往日、祁連初近、什伯于西川、則鎮羌西木同間、要害之地、通
川之道也、其入也無壅、邊之隔、其歸也無窮、日之勢、昔阿赤免
通青海、由此而出入焉、今之夷、雖暫安馴服、然內地屬番、劫以
積威、惟夷命是從、萬一因隙敗盟、阻大通之津、當烏稍之道、塞
岔口之徑、則淒涼甘肅、求一線之通、亦不可得、莊浪外絕鄰封、
內生他變、存亡危慮、不待智者而後知矣、故曰今之重地、在西
南也、

青海、前連賴黃台吉、住牧部落二十餘人、祁連山下、則參

力幹住牧所部亦有五千餘人鎮羌堡在西一百三十里其地直大通河討來川三角城皆夷所盤踞即祁連山下也西大通堡在西寧一百一十里其地近大通河達則青海皆近于夷疆也鎮羌為涼甘肅必由之大路所謂要害也明嘉靖間已築舊邊及平松山時阿赤免欲壞鎮舊邊走青海伏兵拒之前此未築舊邊則鎮羌為通衛也莊浪之番貧者善竊盜自衛而東皆不容其入城市自衛而西無處不有番焉一有意外則他變必生矣

莊浪南邊堡

西大通堡

莊浪衛西南一百二十里西寧冰溝東北五十里

新站

莊浪南四十里大通堡東北八十里

莊浪衛

西寧衛東北三百七十里

武勝驛 莊浪西三十里

岔口堡 武勝堡西北五十里

鎮羌堡 岔口堡西北五十里

莊浪北邊堡

裴家營 涼莊公界之所在大靖城東四十里

阿壩營 在裴家營東四十里

下紅水營 阿壩東四十里

三眼井堡 下紅水營東南四十里

莊浪近疆

平山 莊浪西南西大通南五十里

黑山嶺 西大通南三十五里紅杏城北五十里

紅山川 西大通南二十里紅山堡南一里

河腦 西大通西十里

他喇都川 在莊浪東南通達

排路溝 在他喇都川之北通達西南十五里

小川子 在莊浪西武勝驛西南十里

馬營溝 武勝西北二十里

大沙溝 莊浪之西岔口東南二十里

乾沙溝 岔口東北二十五里

寬溝 岔口北八里

火燒城 岔口北十六里

沙金溝 岔口東北二百七十里

野狐川 金沙溝後十五里

先密寺 莊浪西北鎮羌堡東南四十里

莊浪南邊莊浪而西則南北皆有邊堡故得邊以別之

西大通堡宋王韶所建蓋莊浪之交也西即大通河因以名堡
堡臨水負山居民稠密四達之地乃西寧之咽喉也河腦之番
雖少亦有陰款于夷堡北連城土司之家在焉其西山有木商
則採之不當為國家倉卒軍儲計耶西山之番輸貢則亦多堡
西循河則黑古城番漢雜居由黑古城而西北則掌吉黑峴往
來青海則朝楊鞭而夕秣馬者也故紅山川桌子山之番族外
納添巴不惟偏乎堡東則達通遠堡猶有遺墩乃古驛路其黃
泥岡則危遠也堡東則徑通紅杏城蘭湟舊路昔之避征商者
每取道焉夫徑多則難于阻險人雜則易以容奸而况據我之
上流有人耶東南上下山缺則今之驛路矣東北至新站八十

里

宋神宗時、王紹使王厚收復河湟、因地形險要、築大通河城、或曰即今堡、或曰在河州西寧之間、今大通河堡未知孰是、大通河在堡西一里、其源出于祁連山之樞大川、流數百里至此、又東南流而入黃河矣、大通河腦之黑番王家、其目曰汪東爾加、今納夷添巴、連城在西三十里、土司姓魯、自明至今皆賜職、凡莊浪之土人皆屬焉、有明河湟間、常連舟載軍、伏下寧夏以平賊、宜智木一寺、用番僧末爾、開隆寺五百人、于連城中焉、餘番則納夷添巴、夷即麥力幹也、黑古城在西一百里、掌吉壑峴在西北二百二十里、青海在昔為連賴所、住牧紅山川、堡之番即閭都剛族、住報恩寺中、桌子山之夷、即上仙密族、皆納連賴麥力幹

漆已通達堡在東北七十里即宋之孫路所謂通達至熙
河者是也黃泥岡在通達堡之西北八十里紅古城在東
南八十里此山僻小徑蘭州西寧之捷路也昔私商自南
而至紅古城而西大通西上川口以避徵稅今亦軍由之
矣堡居人僅五六家把守之一把總東北至莊浪一百二
十里西南至西寧之冰溝五十里

新站蓋移新牛站于此其地源泉不通耕種常廢居人汲水在
深山二十里許故冬則撮雪窖水春則向空受雨而番漢雜居
于南北站無防兵殆以莊浪之非邊乎此厯山坡涉河西十里
則至莊浪焉

新站站肆相連小築平岡驛卒寥落蓋建置之未久者往
來絡繹苦于奔馳者非一日矣無所生泉無所汲

莊浪衛古城在南射斗在西今皆廢焉南達河水北列舊邊東通金城河西東之接壤西南涼湟兩岐分合處也絳節之所絡驛土漢之所雜居黑番之所出入蓋九達之區河西之都會也郭郭之間有番場或壅入衛城為偷兒南向萬山番族所居沿邊西自羊圈溝循大路渡莊浪河三十里為武勝驛

古城在南五里射斗在西十里莊浪河在西門外源出鎮羌之分水嶺至衛南流入于黃河舊邊在北二里明正德間因夷阿赤免據大松山乃自蘭州金城關起急築長城至于涼州之泗水堡直接今之長城及萬曆間平定大松山又築新邊于極北故此為舊邊焉由紅城野狐城苦水沙井而至蘭州統二百二十里涼州在西北三百四十里西寧在西南三百七十里番場在城外番子多善竊盜衛

南之堡曰大柳樹堡相距十五里二十里曰黑城堡三十里曰南大通堡西山南山多畜族衛舊設副將今改參戎明崇禎十六年土司屠布聖聞賊渡黃河乃髡其髮曰不能殺賊豈肯降賊從此與世長辭矣卒不知所終其浮家在城內南門西至羊園口二十五里

武勝驛堡在平地河流其北山環於南北舊邊廢為管廟東西陳壤盡列羌番探丸之舉時時有之武勝卒置郵雖非要地而堡屬則有喜風嘴分地則有鐵沙野狐二嶺皆當慎防而詎于無兵野狐嶺之南大通河流焉西北五十里至岔口

莊浪河在北一里即驛駝刀梯石嘴兀兒免四山也雖非要地然七族黑番居焉喜風嘴堡西南三十里其堡之西有白石頭溝嶺最為衝要云鐵沙嶺在西八十里野狐

嶺在南二百里、堡有把總、

岔口堡、堡當平地、南山北河、同于武勝、土冷薄收、難于粒食、加以春夏大雹、折木偃禾、無歲不稔、而六族熟番、食毛踐土於此、毳帳當路、畜馬彌山、蓋地通塞外、如大通河、青海者、不一而足、堡之東宜防者五、

曰樺夫堡、曰黃草沖、曰柏嶺溝、曰大沙溝、狐頭嘴、

西山極衝者十有二焉、

曰土魯干、石門硤、曰青山坂、曰野蔥溝、曰駱駝峴、曰散金

山、曰灘泥溝、曰克草嶺、曰加思羊、曰新河壩、曰捏兒朵、曰

金沙溝、

又西北五十里至鎮羌堡、

莊浪河在北二里、河北即邊牆、熟番六族俱納麥力幹添

已崇禎十六年、諸番叛逆、三月十一日、副總兵魯傑昌從
堡進剿先寇等番、斬殺殆盡、堡有把總

鎮羌堡同于岔口、歲稔大電、無歲無之、山有祁連、河有大通、川
有討來、今之虎穴、虎子皆在焉、然亦逐水草而列、穗帷耳、獨三
角城之寇、屯田築室、為不拔之基、去此甚近、昔阿赤免于青海
此邊、假道於此、蓋鎮羌一堡、為南北塞外相通之要道、安知今
日、不指為續臂地耶、雖此有重邊、而南之蹊澗成路者、特多、其
黨朵兒、尤為衝要、西古城為次要、兵即足守、則謹其阨塞、何容
緩與、渡河而西北、則為稍嶺、雖非甚高、最為荒曠、但有蠢動、風
聞、經行絕迹、夷未至、蒙虎皮而行者多也、西北三十五里、則涼
州之安遠堡焉、

祁連山麓、起于堡之西南、封來川嶺、在西二百四十里、封

來之水發于嶺、西流、大通河在西一百三十里、其水發源
于擺大川而東流、二水俱在祁連之南、三角城在西二百
七十里、麥力幹之部落在焉、築室耕稼、亦如內地、三角城
亦近涼州、蓋涼州南山之南、祁連之北也、有明時夷阿赤
免阻于青海、假道鎮羌許之、嗣是南北往來、皆取道于堡、
今堡河北有舊邊、更北有新邊、所謂重邊也、當朵兒在西
一百六十里、西古城在西五十里、河即分水嶺之河、東流
而下至莊浪、凡岔口武勝所指皆此河、河在北數里、烏梢
嶺在西五里、從此而西五里則渡河、既渡即嶺、平而且長、
直達于安遠、志書以為在堡西者誤矣、嶺既空曠而黑者
每假夷名于此為寇盜、堡有遊戎、

莊浪南邊、自西大通而西、至鎮羌、凡六所、二百八十五里、其南

皆山其山皆番無長城為之界限道路為疆而已

莊浪北邊

裴家營涼莊疆域所分也堡在平原土瘠沙多水利不通非香溝分灌安人畜之不渴死耶西望大靖南近火燒東連沙溝北環邊城援應雖近而閘門罕閉邊額不修甚非所以防禍于未萌也又東四十里為阿壩營

香溝屬大靖分其餘以灌溉大靖營在西四十里大靖居高營地則卑可望也火燒溝在東南三十里沙溝在東二十五里長城在北一里大靖阿壩相距不甚遠可為援也阿壩營地高而平行土脈不毛其地北閘門迤西之阿壩水空鍵閉宜修斥埃宜明其邊外有大泉水更北有黑石山水足草深美必爭牧况乎營盤水之密通為鄰乎內地則雙井堡為蘆

裴捷徑、則中川寇虐宜過也。又東西十里為下紅水。

堡迤南水泉二處、疏通水槽、引入堡內、水空在西十里、夷向每從此入犯、今則沙高牆缺、可入之地不止水空矣。在北二十五里、雙井堡在南四十里、蘆塘屬靖虜、在雙井之東一百一十里、裴家營在西四十里、蘆葉往來、循新邊而行、則一百九十里、由雙井則一百三十餘里、所謂捷徑也。中川屬松山、在雙井之東二十里、堡有遊戎。

下紅水、自松山平而亭障築也。南近大松山、北近黑石山、風沙日揚、邊牆漸北、且營盤水直連賀蘭山後、其途甚便、况乎遊牧者不但賀蘭之夷哉。又東四十里則三眼井。

大松山在南七十里、黑石山在邊外西北二十里、營盤水在東北一百六十里、自營盤水五十里至黃沙坡、又二十

里至小風口。又十里至大風口。又三十里至拜等口。又三十里至疊石口。又三十里至黃破口。又五十里至賀蘭山口。自堡至寧夏之賀蘭山後共五百二十里。賀蘭山後之夷、祝囊勞藏克義三台吉住牧。若游牧者不可勝記。堡有守備。今自寧夏出中衛之永安墩口。經長流營盤兩水頭。直達紅水。或三眼井。誠坦途矣。驛站既設。商旅通行。而蘆塘一路。惟平因避稅者則由之。

三眼井堡地極空曠。堡近新邊。其東永寧堡舊有邊兵。以為犄角。今亦無之。其南由狼溝口。西至沙井堡。路極崎嶇。蓋趨蘭州之大道也。其北有麻黃灘。通近于邊。至衝之地也。其北至黃沙泉。以及水塘湖水頭之地。則偵夷人之動靜也。若夫張既之所取。道理有可信。文無可徵。又東七十里為靖虜之蘆營。

永寧堡在東九十里、明以蘭州之泰將改置永寧、以永寧
去新邊五十里餘、而三眼井又在西四十里也、狼溝口在
南三百里、沙井驛在溝口南四十里、蘭川在沙井驛東四
十里、自堡至蘭州三百八十里、路僻山荒、行乏憚之、麻黃
灘以其在紅水三眼井之間、空曠無守故也、黃沙峯在邊
外之北二百里、水塘湖亦在此一百二十里、魏之張既、文
帝使為武威刺史、時盧水羌反、聞既將至、乃拒于顛陰口、
既言楊兵經顛陰、乃于金城渡河、潛于楮次間道直抵武
威破之、或一堡即張既之間道、然無可據矣、堡有守備
莊浪北邊、自裴家營之團莊起、東至三眼井界靖虜之蘆塘營
止、皆長城、凡四堡、一百九十里、

莊浪近疆

自莊浪西南接西寧界起、折而南、又折而西、以接至涼州界止、

平山在莊浪西南西大通堡之南叢山之中忽有平地山有豐草流水注之孽收為邊外最黑番住牧于茲南通青海西近大通則與接帳連鞦者不惟通乎

平山在西大通南五十里黑番蘇東奔族於此住牧

黑山嶺在西大通之南紅古城之北嶺舊有墩迤而南則海石灣灣南則李家村灣東達可可川之王家山城嶺之東西南北無非內地黑番居此其族甚微領茶孽馬宜其子孫世世無敢萌異志也今外交于夷矣

黑山嶺在大通南三十五里紅古城北五十里黑山嶺南至海石灣一十五里海石灣東西二路南至李家村五里東至可可川地方王家山城五十里無一非內地也嶺今黑番爾羊日族住牧

紅山川、在西大通之南、川有堡、堡有居民、迤東由紅古城而趨苦水、蓋昔之通衢也、川在堡南、居內地中、黑番居之、陰歎於夷、

紅山川、在西大通之南二十里、紅水堡南一里、由川東至

紅古城六十三里、又五十里苦水、此昔日商賈之途也、川

為番僧間都剛族報恩寺僧住牧、

河腦、在西大通之西、紅山川之北、大通河之源流、不知其幾千
里、西大通人以其地在上流、謂之河腦、黑番就牧河干者、
依我宇下、今頓首于夷之庭、不暇矣、

河腦、在西大通四十里、黑番汪東爾加族住牧、

他喇都川、在莊浪東南、通達堡南、河西平原之地、通謂之川、不
專指流水也、川地廣衍、其地瘠薄、其水蕭疎、腹裡不毛之地、可
牧而不可耕者、西大通通達堡之屬、堡於川為捍肱也、黑番脫

喙於此討曰不宜而輸誠恐後于塞外焉

他喇都川在通達堡南三十五里黑番窩爾素族住牧

排路溝在通達堡西南他喇都川之北溝皆芨草充斥道路故名排路或曰一名牌樓溝在內地明設有騎步今番則外臣于夷矣

溝在通達堡西南一十五里芨草名河東西皆取之以編席者明於溝設兵一十三名馬一十三匹今無兵溝黑番蟬樂族住牧

小川子在莊浪之西武勝驛南平行之地兩山夾之故曰小川卡族之番俱在焉邇來周道之間肆為脂篋矣

川在武勝西南一十里莊浪而西之山土人皆謂之西山川亦平地為徽卜兒馬其等七族住牧今其目名阿損時

為盜、

馬營溝在武勝西北、岔口東北、西近團莊、南近伏羌溝、在岔口之東北、蓋重邊之內地也、黑番處此、夷詎能害、而南向事之、何耶、

溝在武勝西北二十里、岔口東北二十里、大馬營團莊在溝西七里、伏羌在溝南六里、莊浪有新舊二邊、溝在舊邊北、新邊南、今黑番白扎爾族住牧、

大沙溝、在莊浪之西、岔口堡之東南、溝北接壤平城、黑番住此、而遠輸於夷、

溝在岔口東南一十里、平城堡南三十里、今黑番阿蓋族於此住牧、

乾沙溝、在岔口東北大沙溝北、溝為岔口山場草木足供畜牧、岔

口之人公其利與羌人共之

乾沙溝在岔口東北二十五里黑番錢朵族住牧

寬溝在岔口之北乾沙溝之西溝有墩自墩至溝腦一里平川亦岔口山場也番族住此者與大沙溝乾溝皆陽奉陰違焉

寬溝在岔口北八里明制有墩塘兵一十二名馬一十二

匹今裁自墩至寬溝腦延長十二里今黑番紅扎爾族住

牧

火燒城在岔口北鎮羌堡東切近曹家鎮番之羊馬犏牛羴牛充斥道途而奉夷謹或亦為之倡與

火燒城在岔口北一十六里曹家鎮在北五里城今黑番

朵卜藏族住牧

沙金溝在岔口西北溝地特遠其形勝不可得而知趨其地者

必由新阿壩捏耳朵馬距岔口既遠則鞭長不及腹矣

溝在岔口西北二百七十里、自岔而西北二里、為土魯干、又一十五里為石門硤、又一十五里為青土坡、又一十七里為野葱溝、又二十里為濫泥溝、又二十里為駱駝山、又三十里為散岔口、又一十五里為光華嶺、又二十里為思加羊、又二十五里為新阿壩、又三十里為捏耳朵、又四十里為沙合溝、溝為黑者思國忙族住牧、

野孤川在岔口西、沙金溝後地為遠興煤炭溝為鄰明之守軍今皆廢矣

川在金沙溝後一十五里、明時野孤川煤炭溝各設墩軍二名、川今為黑番朱已族住牧、

先密寺在莊西北、鎮羌東南、寺經弘壯番僧居之、飲食起居無

異於番惟屏妻子、衣黃衣耳、添巴之納、則遠輸烏思藏焉。

寺在鎮羌東南四十里、甚寬廣、明初新建、以處番僧、先密僧特多、於是分為二族、所謂上先密、下先密、皆寺族類也。寺東為廟兒溝、西為黃草充、北為打柴溝、西為鎮羌馬、今番僧驛爾只等族住牧。

乾柴峒在鎮羌之西、南山之南、其地屬境外、西接三角城、東通黨朵兒、紅壁峴、以至於分水嶺焉。黑番處此、遠於內而近於外、物以羣分、固其宜也。

乾柴峒在鎮羌西二百里、三角城在其西七十里、黨朵兒在其東二十里、又東二十里為紅壁峴、又東二十里為分水嶺、峒今黑番住牧。

右莊浪南山內外番族壤地、附莊浪諸要塞、合四十有五馬。

羊胸子城

南至西大通四十里

工巴城

東南至西大通四十里

毛兒茨徑

東至西大通六十里

勝卜勞硤

南至通達堡三十八里

亂石窰

東至武勝驛四十里

紅垓峴

北至武勝七十里

鐵沙嶺

北至武勝一百里

寺兒溝

北至武勝一百三十里

熊窩溝

東北至武勝一百里

香爐山

東北至武勝一百六十里

白石頭溝

東至喜風嘴二十五里

野狐嶺

東至喜風嘴二百里

石門硤 東至岔口五十里

駱駝峴 東至岔口七十里

散岔山頂 東至岔口一百里

溫泥溝 東至岔口一百二十里

光草嶺 東至岔口一百三十五里

思加羊 東至岔口二百一十里

新阿壩 東至岔口一百八十里

捏兒朵 東至岔口二百一十里

沙金溝 東至岔口二百五十里

大沙溝 西至岔口二十里

狐頭嘴 西至岔口五十里

大溫泥溝 東至鎮毛堡二十二里

四道溝 東至鎮光四十里

紅溝兒 東至鎮光五十里

雞冠石 東至鎮光八十里

散盆 東至鎮光一百里

人頭峴 東至鎮光一百三十里

寬溝 係涼南境外東至鎮光一百六十里

紅腰峴 係涼南境外東至鎮光五十里

小木麻兒 係涼南境外東至鎮光堡二百二十里

白石頭 由城兒溝東至鎮光堡一百二十里

分水嶺 東至鎮光一百三十里

白石頭空高崖 東至鎮光一百四十里

黨朵兒 東至鎮光一百六十里

紅堅峴

東至鎮羌一百三十里

泉子嶺

東至鎮羌一百八十里

牛心山

東至鎮羌二百里

討來川嶺

東至鎮羌二百四十里

乾柴峽

東至鎮羌二百里

此莊浪面南之要塞皆南通西夷之路番夷所出入焉雖南山之外未居一夷然三角城大通河以及青海相距非遙不能域以封疆之界也

甘州衛 雍正初年改衛為府附張掖縣山丹縣屬焉

甘州唐虞夏為雍州地其後淪於羌夷秦漢間為渾邪王地漢武帝元狩二年霍去病始過焉至祁連渾邪王始殺休屠來降元鼎二年始置張掖郡歷五涼隋唐皆曰張掖惟西魏更名甘州後因革不一宋為元昊所據理宗寶慶元年為蒙古所有明洪武五年命宋國公馮勝為右副將軍由金蘭趨甘州二十四年置衛內轄五衛外轄七衛兼轄千戶所三屹然重地矣甘州之畸重於河西惟明為然

二十五年分設左右前後中五衛所謂內轄五衛也二十六年設陝西行都指揮使司凡山丹永昌涼州鎮番莊浪西寧肅州皆屬焉所謂外轄七衛也甘屬之高台千戶所肅州之鎮番千戶所涼州之古浪千戶所無所不所屬焉

所謂兼轄千戶所三馬

其地東有武威、西有酒泉、南有祁連之阻、北有合黎之環、南北相距僅可百里、如築通道、中通一線、通餉道而接聲援耳、何以畸重若此哉、蓋其河黑水、其田上上、其民五方錯雜、其俗樸而剛、此所以畸重也、

涼州在東四百八十里、肅州在西五百四十里、祁連在南一百五十里、霍去病至祁連山、斬首萬級者也、合黎山在北四十里、即禹貢導弱水至於合黎是也、甘之南北相距寬者可二百里、隘者纔十里許、言百里者舉其概也、黑水發源於祁連山下、北流至甘州城西十五里、與山丹之弱水合而西流、至肅之鎮夷、流向合黎山焉、黑水非禹貢之黑水、西河、蓋禹貢之黑水在雍梁之間、與此懸殊、甘之黑

河、但可謂之張掖河耳。高台一帶者，皆因黑水為渠以灌稻麥，無旱澇之憂。稻為河西所借有者，禹貢雍州厭田上。今惟是足以當之。漢武帝時，發徙民以實甘州，雖產稻而民貧實甚。

從來稱五郡者，必曰斷夷人右臂。蓋五郡遠出四千里外，接西域之疆，入夷腹內，我征不捷，則可以搗其巢，彼掠邊郡，則可以躡其後。要黨結叛，則可以遏其途。今五郡僅存其四，雖縮地一千餘里，而西夷不敢越河西而東折者，四郡之蔽於西也。甘州在四郡之中，則又若障之有中堅，磨之有樞紐，身之有腹心。甘之所以畸重者，豈偶然哉。

蘭州而西，為金城郡；涼州而西，為武威郡；甘州而西，為張掖郡；肅州而西，為酒泉郡；赤金蒙古而西，至塔爾為燉煌郡。

明正德間、棄去哈密而燉煌遂為絕域、然明開國之初、亦以嘉峪關為聲教所及其赤金蒙古、罕東左衛、哈密三衛、皆羈縻夷屬而已、故曰僅存其四、自嘉峪關外、西至哈密一千九百餘里、

河西之南北、何地非夷、我之所甚者無如甘肅、夷之所恐者亦無踰甘州、彼在南者欲北、在北者欲南、而甘州適當其中、橫截其路、則必自東而西、循牆而走、動輒以月計、苟通甘州、則直出直入、朝發於南、暮宿於北、合衆長驅、隨所欲為矣、夷之垂涎窺伺者、豈一日哉、昔小王子欲寇涼州、擁衆至大松山、部屬阿爾禿斯曰、截列虎巴娃、甘斯得窟、隸勿火落赤、刀答計勒勿伊、個阿論落得勿、謂當分兵取甘州、約會火落赤到、則大事成矣、小王子不聽、及敗、悔之、

小王子在明之威化間、稱可罕者也、先為小王子所殺、小王子之相曰亦卜剌、有罪、竄居青海、阿彌羌斯、夷日之多智者、其時有夷目曰火落赤者、性極凶殘而善戰、住牧於河州之柳工川、阿彌羌斯勸小王子分兵取甘州、小王子不聽、敗於松山、

且契丹推陷元昊、割據蒙古內侵、河西之受敵、甘肅為先、譬之常山之蛇、擊首尾應、擊尾首應、擊其中首尾俱應、獨擊其項、則一身無所施、甘州者、常山之項也、

宋大中祥符三年、契丹入甘後、破肅州及各郡、天聖六年、李德明使其子元昊、畧取肅州、寶慶元年、元鎮木真使察罕陷其甘州、而河西諸郡遂成破竹之勢、

考有明之制、坐鎮甘州者、不但行都司而已、文有撫軍、武有總

戎率一代之名臣宿將屯兵三萬有奇其時祁連雖敢牧馬合黎孰敢彎弓屠黃水東西安如泰山可謂善用兵常之勢者矣
明制甘州至鎮者自行都司外有巡撫都察院有行文僕寺卿有監司有總兵有副戎有都僉書且洪武二十八年肅王移國於甘州三十二年肅王始內移於蘭州五衛兵二萬五千九百名山丹六千七百七十名高台一千四百六十名所謂三萬有奇也後遞減之一萬二千五百人洪水之增設不與焉甘州城正官兵有馬者三千員名步兵奇兵游兵守望兵不在其數其衛所城堡兵馬即此可概見矣

今官兵不及有明而祁連為夷之淵藪公然而入大草灘矣此永固城之所以特築也合黎乃我雄兔芻蕘之地今我以為絕

城而夷以為交衢。此人宗山斜濠口石破口之所以可虞也。

甘州撫軍今駐於蘭州。今甘州有監司監牧同知武甘肅提督五營全設。又永固協鎮副戎。甘州城守春戎。山丹高台黑城洪水四遊戎。破口大馬營馬營墩高古城梨園紅崖平川七守備。此今之官制也。提督兵五千員名。永固協及各路城堡統四千三百六十二名。今甘州之兵計之不滿萬人。此今之兵制也。永固城在東南一百八十里。自順治八年甘州總兵開市於洪水而夷人遂據大草灘。乃謂於永固置副戎。黑城置遊戎。大馬營馬營墩置守備。皆在大草灘之內。在甘涼南北邊堡中。今大草灘之夷刀爾吉懷阿爾賴之部落合黎山之夷無一定之部落。人宗山口在東北三十五里。石破口在東一百九十里。斜濠口在東

六十五里

甘州南邊

大阿博 高古城西五十里

大馬營 大阿博西十餘里

黑城堡 大馬營西三十里

馬營墩 黑城堡南二十里

永固城 黑城堡西北三十里

洪水堡 永固城西三十里

南古城 洪水堡西北七十里

花賽堡 南古城西五十里

龍首堡 花賽堡西北四十里

甘峻堡 甘州西南六十里

梨園堡

甘峻堡西三十里

高台堡

梨園堡西九十里

榆木山口

高台所西南九十里

暖泉堡

榆木山口東南二十里

紅崖堡

暖泉堡西南三十里

甘州北邊

九壩堡

肅州胭脂堡東二十里

四壩堡

九壩堡東五十里

平川堡

四壩堡東三十里

仙姑廟

平川堡東三十里

板橋堡

仙姑廟東一十五里

新城堡

板橋堡東三十里

瓦窰堡

新城堡東三十里

人宗山口

瓦窰堡東三十里

觀音山口

人宗山口東四十里

斜濠口

觀音山口東五十里

山丹衛

斜濠口東南西距甘州城一百二十里

新河堡

山丹衛東四十里

石破口

新河堡東四十里

甘州近疆

白石崖

在甘州之大馬營南百里

野馬州

在甘州東南偏都南五十里

巴縣墩川

在甘州之南水關外

大都麻口

甘州東南洪水堡南

小都麻口、洪水之南、大都麻之西、

酥油口、甘州之南、高古城南、

野兒口、甘州之南、在花寨堡之東、

板答口、甘州之南、龍首堡之南、

平頂、在板答口之南、馬驢寺嶺、

呼囉口、在甘州西南、梨園堡之西、

呼囉口外、在口南、

擺通河、甘州西南、呼囉口之南、

黑河源、在擺通河西、

古水澗、在梨園堡西、呼囉之西南、

牛毛山、在古水澗之西、

青圪搭、在牛毛山之北、

灰稜 在青北塔西南

榆木山口 在祁連之北、高台所之南

半箇山 在甘州之西南、暖泉堡之東南

新墩子 在暖泉南、半箇山北

拜浪河 在甘州西南、紅崖堡口外

紅土坡 在拜浪河之南

草打班 在拜浪河西南

水關口 在紅崖西

呼囉口 在紅崖南

石灰關口 在紅崖西南

明海子 在紅崖西北

居延城 在甘州之北

居延澤 在城東

合黎山 在甘州之北

紅泉堡 在甘州東北觀音山外

紅鹽池 在甘州東北山丹衛北

甘州南邊

大阿博墩名也為甘涼之界當大草灘中東接高古城西連大馬營北通破口堡南近白石崖其地風寒無水候卒二三人登臺遠眺而已西四十里則大馬營

高古城在東五十里屬涼州大馬營在西四十里白石崖在南九十里大黃山在北一里定羌廟在東北三十里大草灘大黃山之夷刀爾吉懷阿爾賴之部落朝暮見於墩下甘肅通衢舍此更無他途墩有墩軍二三名汲水必東

向十數里云

大馬營亦當大草灘中、大阿博在其東、大黃山峙其北、幽僻遐
陬、茂草隙地、在山南者、魏襄接踵、乃設官置戍於此、嬰城自守、
猶履春冰、求其置重、捍於酸茨河白石崖者、何可得焉、又西三
十里則黑城堡

大阿嶺在東四十里、大黃山在北二里、即馬支山、甘涼之
民近馬支山者、於山採藥伐木獵獸以資生、今夷盤踞山
中、莫之或過、營在大草灘、其草甚茂、不稼不穀、所謂隙地
也、游牧於大草灘者、乃爾吉懷阿爾賴之部落也、南山之
後、即祁連山下之夷所居者、曰白石崖口、曰野馬川、曰酸
茨河是也、設官置戍、在辛卯年、酸茨河在東九十里、參力
幹部落所居、白石崖在東南一百里、口外六十里、乃爾吉

所住牧營有守備兵一百四十五名西北至甘州二百四十里

黑城堡亦在大草灘中、有事則左提大馬營、右挈馬營墩、非堡之援耶、祁連當前、其隘口獨寬、如白石崖者、並馳十馬、昔之濟渠濠牆、修設臺榭、楸槽木石、皆為烏有、其後所山口、今已無所憑恃矣、奈何不使盜至此耶、草灘可謂慢藏、天險不設、互市且開、可謂誨盜、即裕之盡何以幹耶、斜而西北三十里、則永固城、迤而南至馬營墩、二十里、

大草灘之夷、以其地而言、內則馬支山中、外則白石崖扁都口後山所、以其部而言、則刀爾吉、懷阿爾賴二部落也、大馬營在東三十里、馬營墩在南二十里、祁連山在南一百里、白石崖口在東南九十里、其外即刀爾吉部落住牧、

其部出入大草灘者。率由白石口焉。後山所口在南六十里。亦祁連山下之夷出入之路也。互市在辛酉年間。市於洪水。蔓延至今。詳洪水中堡。今設有遊戍兵三百八十名。西北至甘州城二百一十五里。

馬營墩。即馬家墩也。雪山南峙。草灘北環。兵士墜指裂膚。不但三冬祁寒而已。四時不識菜根。扁都口在南。昔之夷王欲假途而北。甘肅出師青海。率由於此。其為要道。由來舊矣。口外之野馬川。且有王庭。然扁都諸口。昔之高岸峻防者。已視為具文。聽其廢置矣。迨而西四十里。則有洪水。折而北二十里。則有永固雪山。即祁連山之支幹。積雪不消。在南三十里。大草灘環堡而北。尤寬闊。故曰北環也。其地盛夏有霜。終歲無華。扁都口在西南五十里。明時有夷王拙力良。逼於西寧之青。

海欲假道北歸以扁都口請當時未之許也又經畧鄭洛會師洗青海大落赤真相等而甘肅之兵悉由扁都口出會於西寧馬凡往來青海西寧者由口而行路雖踰山實為捷徑也野馬川在扁都口南五十里今懷阿爾賴住牧其部落往來大草灘皆由扁都口堡有守備一百八十四名西北至甘州城二百里

永固城漢為單于城涼之祁連郡也明季擲漢至此遂殞厥身而六畜久不蕃息於祁連大草灘縱牧乃因跡築壘特設官司而永固之名始立則大草灘在目中 also 其所轄之大馬營黑城馬營墩鼎立灘內近有洪水為之右臂遠有永昌高古為之聲援此因事補偏似為得之而殺伐不張欲阻寇之入閭域也得乎哉況乎與之賀遠有無也遠三十里為洪水

漢武帝初軍于居此謂之軍于城。前涼張元靚改為祁連
郡。唐開元十六年。金吾將軍林賓客破土番於此。明北夷
獫狁於天啟元年入河套。吞併套部。擾榆林。犯涼州。攻甘
肅。所向無前。於甘肅病滯下。至祁連城而死。祁連山在南五
十里。己酉年。大草灘有夷游牧。乃設關築寨。（新名之曰永
固城也。地在大草灘中。而勢差高耳。大馬營在東六十里。
黑城在東三十里。洪水在西四十里。永昌高古屬涼州。永
昌在東二百二十里。高古在東一百五十里。城有副戎。凡
甘之營堡皆屬焉。兵九百八十二名。北至甘州一百八十里。
洪水堡當大草灘之口。屏甘州於內也。有明設兵。又增修各隘
口險要。南北扼塞。屯兵彈壓。當時無識者。猶有台驛移白之譏
焉。而今也開市與之互市矣。西至南古城七十里。

有明嘉靖間、巡撫唐澤因西寧之西海夷人披猖、乃募設兵八百名、馬五百匹、於洪水堡、又增修各隘險要。辛卯年、甘肅總兵官貪皮馬之利、於洪水開市、於是夷人盡至、而大草灘之毡帳、幾充塞無間矣。雖環大草灘皆屯士馬、莫之誰何焉。而人皆忌諱、胡為相安無事云。西水關在南四十里、古佛寺在巴縣、環川在西水關之南七十里。戊子、回丁國棟反於涼州、米判印反於甘州、及討平之、其餘黨逃散於四方、或歸於西域、或為夷部。在古佛寺者其一也。絲墩之夷、曰滾卜台吉、今叛回為其部落、所謂為虎附翼也。西水關有明之所設險、今皆為夷毀壞、幾於無跡矣。堡今有遊戎兵四百三十五名、北至甘州城一百五十里。

南古城即古城堡也、雖漸遠於大草灘、而逼近乎祁連山隘口。

紛紜其最著者有宜番大都麻口有小都麻口有酥油口小者不勝屈指焉有明於酥油各口鑿山驅石漆城蕩蕩今城覆於隍因之而成路矣又西五十里有花寨焉

寧番在東八十里大都麻口在南七十里小都麻口亦在南七十里酥油口在南十五里甘涼之堡以古城名者甚多故俗增南以別之明於酥油口散岔道溝山塞斷要路修砌短垣黑番在大都麻口其目曰囊索在小都麻口曰七慶喀在酥油口者其目曰蓋牛家番子今皆納夷添巴城有守備兵一百一十八名南至甘州城一百里

花寨堡昔之屯兵堡洪水居中堅之勢堡與黑城分為兩翼今堡乃去兵夫孰與守之又西北四十里有龍首堡

明之巡撫唐澤泰設兵二百六十名於堡又設兵二百六

十名於黑城二處、又設兵二百五十名、皆統於洪水營焉。
堡分防之地、有野兒等口、口外黑番、其目曰黑羅模堡、今
無防汛、西北四十里至龍首堡、

龍首堡、昔之劉果城也、黑河水利、率先得之、土沃則人蕃、明所
以展築、請防與板荅口之黑番、嘗鼠兩端、平項之黃番、向背不
一、而口外臨松城之馬驢寺、賜額猶存、今喇嘛居之、夷常居此
而熬廣茶、黑河有石、其文內蘊、豈魏所云柳谷石乎、西渡張掖
河、則有甘峻堡焉、

堡上龍首堡也、舊名劉果城也、蓋明初貴者各築城以居、
即以姓名名城、今宜夏名堡多類是也、堡舊城廢、及更築、
因地近龍潭、乃名龍首焉、黑河一名解水、一名羌谷水、即
張掖河水也、源出祁連之北、曰擺通河、北流、經龍首至甘

州西而弱水入焉、遶高台而流、至鎮夷、北流、至於合黎、餘波入於流沙、是也、水色微黑、土人或呼為黑河、且謂即禹貢之黑水、按禹貢、華陽黑水為梁州、又曰、黑水西河惟雍州、走黑水為雍梁之界矣、甘州在雍之西北、去梁州二千餘里、非禹貢所謂黑水可知、且導黑水至於三危、入于南海、蓋在漢蜀間、始可入於南海也、此水但可謂之張掖河而已、黑水北流、近甘州、咸會弱水、西流、至於肅州之鎮夷、乃北流出塞、至於合黎山焉、而甘州之地、及肅州之鎮夷、皆資黑水灌溉、河西獨甘有稻、亢旱無憂、黑水之利也、堡得黑河水脈、故土最沃、明巡撫楊博修築木龍堤、於是堡之廢田、盡為沃土、人益富庶、乃展築張掖城以居、即今下龍首堡、於萌明自請設防、而募兵二百名屯於其堡、今則

無之、板答口在南二十里、黑番之目、曰白道人、平頂在南四十里、馬蹏寺之嶺也、黃番蓋水沙二州、內附之夷、平頂黃番之目曰格家、其言語服飾與夷同、而與黑番異、臨松城、前涼張天錫所置、呂光置中曰護軍鎮、南涼禿髮傳檀掠臨松千餘戶、西秦乞伏熾擊破臨松、徙其民五千戶於抱罕、沮渠無諱拔酒泉、圍張掖不克、退保臨松、皆此地也、馬蹏寺、在板答外二十里、寺甚寬、永樂間、賜額普觀寺、山石有跡似馬蹏、因以名之、寺左右有丹硤、臨松青松三山、石洞有七、石門有二十洞、中皆大小浮圖像、今寺有喇嘛高僧、其名曰擺布哈、自烏斯藏來者、取黃番黑番添巴、以轉輪於烏斯藏之達賴喇嘛、擺布哈住持此寺、諸夷常常牛羊持酥油赴寺、謂之熬廣茶、黑河中有石、色如玉、剖之

中有五色紋理山水禽魚之狀。後漢張掖柳谷水湧溢實石負圖。蓋即此寺也。黑河在堡西二里。堡無防汎。東北至

甘州五十里。

甘峻堡因甘峻山而得名。由黑河而西。黃番之在南山者。種落漸繁。昔之屯兵者。蓋有為焉。今祁連之夷。部落日多。而西磁窰各為民堡。山口甚多。脫有意外。誰之責耶。又西三十里至梨園堡。

水經註。張掖水歷甘峻山南。因山名堡。而訛為甘也。甘州南山。凡自黑河而東。皆黑番住牧。黑河西。皆黃番住牧。黑番自漢至今。與中國雜居。稍為馴伏。黃番則罕東左衛之夷。有明時臣伏。及土魯番侵之。乃舉族徙入。嘉靖八年。總督王瓊奏。安插於甘肅各地。以罕東左衛都指揮枝丹置

南山甘州是也。俗呼黃隄子。其後巡撫黃博於堡裏設防兵二百名。山口即甘峻山口。在南二十里。從此而往來於祁連也。西洞子堡在東二十里。磁窰亦在東二十里。西洞磁窰之南十五里。南山口曰大磁窰口。內外窰磁口。堡無防汛。東北至甘州六十里。

梨園堡南眺祁連。西接榆木。其呼囉口黑河之所來。番夷之所由。兵少援稀。其若之何。孫楨之事可為前車。西由威遠堡九十里至高台。

祁連山在南九十里。榆木山在西南十里。呼囉口俗謂波囉口。黑河源出祁山。連之掘通河。或呼謂掘大川。但分一派流百十里。北向呼囉口之水關而入於甘州。其關連山石崖一里。鑽明溝四十丈。石河四十五丈。甘州之人常畏

糧集米出呼囉口外百餘里伐木浮黑河而至甘州其口
外之路東通磴馬川已隸墩諸處更東至涼州錯處西至
紅崖更西至肅州諸山外東南至西寧界然皆層山峻嶺
積雪凝寒無一定之路口外黃番其目曰滾卜又有古木
間之黃番其目曰白頭家又有牛尾山之黃番其目曰參
力幹俱呼為八個家蓋頭目之別名或謂即八個舍人之
種落云宣德十年夷入呼囉口正千戶孫楨率六十人禦
之戰於口內既勝楨單騎追之陷陣死焉威敵堡俗呼葦
之城在西四十里梨園堡有守備兵一百四十名東北至
甘州九十里

高台所漢之樂綰縣唐之建康軍也西有古台因以名焉遠
拱合黎近峙白城前顧黑水後環地平水順五穀皆生屯田之

地也。郭元振開置，盡水陸之利，行之至今。東接張掖，西控酒泉，交衝大道，實在於此。乃屬堡之在南者，苦於隔山；在北者，阻於涉水。且南皆夷穴，為患日深；北則偶至，為寇莫測。而南山之夷，且有潛入而貿易於此者矣。迨而西南七十里，則至榆木山口矣。

樂館縣，漢以之屬酒泉郡。南涼張駿置建康郡，北涼都於此。唐置建康軍，名勝志以建康在高台西南者，誤也。明初為高臺站，正統中改為所。西二十里有古台，高一丈，建寺於上，因以名之。祁連在南一百里，合黎山在北八十里，即書所謂至於合黎也。白城子在西南八十里，黑河在城北二百步，黑河自南發源而東流，又折而西流，遠高台之地三面，故高台土膏水足，五穀畢發，尤為多稻。河西諸郡多

輓稻於此、高台之屬堡、以九渠為最、以及肅之鎮夷、皆產稻之地。唐武后時、郭元振為涼州都督、令甘州刺史李漢通、開置屯田、產水陸之利、舊粟麥斛至數千、及足一謙、糧數十斛、軍數支數十年云。甘州即漢之張掖郡、在東一百五十里。肅州即漢之酒泉郡、在西二百七十里。所之屬堡、在南者、如紅崖等堡、為榆木山所隔、在北者、如九渠等堡、為黑水所阻。高台東往甘州、黑河猶可涉者、分流散漫也。北往九渠、而黑河不可涉者、河流合一也。雖常架木為橋、亦不終日之計耳。所有遊戎兵三百八十七名。

榆木山口即榆林溝、高臺紅崖之大道也。滿目荒郊、常無人跡。蓋榆木山延長、路當其北、紅崖諸堡、遂隔於南、而山口則峯迴路轉之地、黃番所息喙、藉夷為聲援、往來震驚。雖有墩軍將焉。

用之、楊博之經制、不猶有疏焉者乎、折而東南二十里、則至暖泉堡焉。

榆木山、起於梨園堡之西、盡於山口、隔麓、最高台於北、隔紅崖、暖泉、順德諸堡、於南、黃番住牧於榆木山者、或南或北、或中、其山既寬、其名各異、如牛毛山、青圪搭之類、皆榆木山也、山東近梨園、南近暖泉、紅崖、故山中黃番雜見於各堡、無一定之疆界焉、明巡撫楊博經理紅崖諸堡、俱為詳密、獨榆木山口、無所設施、故猶疏、南至順德堡三十里、暖泉堡、居民少、堡通紅崖之路、西、降順德、村落相望、西、已人皆足食、然今番夷交通、各隘紛如、則置戍以衛民、扼要途而通呼吸、所重至矣、折而東南三十里、則紅崖堡焉。

甘州堡名暖泉者有二、其一在甘之西北、此在甘之東南

堡及鎮羌順德楊旗鎮夷五堡。明時因近番夷，民皆逃竄。五堡漸廢，及巡撫楊博於紅崖設官屯，兵始漸興復。今各堡不惟畏夷，而且畏番，蓋番多假為夷也。各隘口有楊旗大口子諸處，諸番住牧有五，曰半箇山，在東南八十里。今番目哈舍人等，曰仄楞，在南八十里。番目八部代蒙古弄等，曰新墩子，在南六十里。番目宣黑卜等，曰榆木山口，在東二十五里。番目了刺兒等，曰明海子，在西北六十里。番目司千尊等，諸夷子目有四，曰麥爾根、黃台吉、曰輝庫克、曰滾卜、掃罕，曰勞藏。住牧之地不一，要之不離野拜浪河、呼囉口一帶而已。堡有鄉遞兵數名。

紅崖堡，撐突孤懸之地也。雖地平土衍，稼黍皆宜，野廣草豐，便於畜牧，而四境皆山，千谿百谷，射鴈牧馬，實繁有徒，俘掠人畜。

特細故耳。其近者若拜浪河、若草打班、五虎環聚。其遠者則姑置之。蓋山卵蜿蜒，路尤散漫，無隘之可扼。其七族黃番、五個擺眼、八箇家、羅兒家、黃番皆安於泰山，而我之各堡則危於景卵。何孤危若是也？自是而西，或沿山，或由馬營莊，九十里則肅之清水堡矣。

祁連在南，榆水在北，凡無名之山，不勝數也。地雖寬衍，而四境則千岩萬壑。拜浪河溶雲成流，其河不大，祇供紅崖灌溉，無他注也。在東南二十五里。草打班在東南九十里。五虎者，麥爾根、綽庫克、滾卜、揀罕、鄂藏四兄弟住牧於拜浪河一帶。其一則要爾旦之團頭曰完布，住牧於草打班者是也。遠者若也赤墩、野馬川、大通河、酸茨河、白石崖諸處，皆有路可通。肅南之討來川、卯來泉，山後無不可往來。

也。七旗黃番曰虎狼家葉塞住小關口在南三十里曰白克代住黑河源在南四十里曰丁刺兒住榆木山在北四十里曰司千尊住明海子在西北九十里曰云莽住綽呼口在南七十里曰黑宣布住暖泉新墩子在南六十里曰乃滿滾布住石灰關在南五十里所謂七族黃番也五箇擺眼曰尚世嘎曰阿爾旦曰占帖木俱在榆木山之青圪搭所謂五箇擺眼是也八箇家曰滾布住字囉口曰白頭目家住古水湖明臺力幹頭目住牛毛山所謂八箇家是也羅兒家黃番曰哈舍人住羊個山曰格家頭目住平頂曰八代部曰蒙古弄俱住灰楞所謂羅家兒黃番是也諸番俱納夷人添已故相安無事焉堡有守備兵一百二十六名西北沿山至肅州之清水堡五十里其路少有行者

由肅州之馬營莊紆迴取道至清水堡則九十里焉

甘州南邊自大阿博而西至紅崖堡凡十有五所六百五十里

甘州北邊

九壩堡甘肅於此分疆西接胭脂東連六塢北近合黎而限以邊牆南通高臺而阻於黑水其地引水平疇桔槔不設而穰穰滿家西域輓東塞於莊廋然合黎山口特近夷巢窺內地少隘外夷出入不由閤門也設有大舉高臺雖來援不阻盈盈一水我自堡而東由六塢五塢五十里而至四塢矣

胭脂堡屬肅州在西二十里六塢堡在東六十里合黎山亦要途其山東起硤口環甘州之北止於肅之鎮夷地長三百餘里其山產茶邊牆在堡北二里高台所在東南四十里黑即張掖河由甘州西流而至其在甘州尚散漫及

板橋流至此合為一道水深沙浮不可徒涉自新城以至
此率引黑水灌田旱魃不能虐也明制堡守兵一千五百
名今皆不設六渠五渠產米與堡相同其兩堡皆在北二
里黑河在南一里

四渠堡地沃而米多與九渠諸堡無異而川原平曠風起沙揚
猶為過之東二十里為平川堡

明巡撫唐澤以四渠諸堡極為難守經制疏畧乃改築邊
牆一道防兵二百昔人之留心邊事如此今夷行邊外沙
漠無水乃入飲黑河出入不由閤門堡及九渠俱無防汎
東南至甘州一百四十里沙不勝挑豈小邊不可擴充乎
內地湫隘其邊外不可斥地乎

平川堡北枕合黎南臨黑水土沃而地平牆低而沙壅同於四

琪也。夷之北行僅隔一堵。甘之西北惟此屯兵數十里之間。誰為禦之。苟夷入寇。屯兵過少。自守不足。况其他哉。又東三十里為仙姑廟。

明制騎兵二百。步兵一百。庶幾可以巡守本堡。救援各村。今兵殊少。又皆老弱。堡有守備兵一百八名。東南至甘州一百二十里。

仙姑廟新而已。無城堡。無屯戍。與北山南水亦類平川。東板橋而西柳園。相距之道里均焉。廟在邊外。夷人禱之。祈靈觀兵焉。鼎新小廟跨於牆垣。中外之分幾無畔岸。又東五十里。至於板橋堡。

其地有廟無堡。柳樹堡在西北十五里。廟旁有閘門。而牆皆湮焉。設出入皆不由閘門。廟南至甘州一百一十里。

板橋堡合黎在北而羊臺為通衢黑河在南分流至此而合一堡之平衍土膏與四埧平川埧昔皆屯兵翼張鼎峙嗣夷飲黑河全然無忌苟區畫如前豈使夷馬至此又東四十里新城合黎在北之山外羊台口在北三十里相傳蘇子卿牧羊處黑河上流皆泛濫至北合為一派明制堡屯兵二百與四埧之屯兵相應雖有閘門夷行邊外渴則入飲不由閘門其邊之淤塌可知明以柳樹堡至堡皆理口朝賊外口沙壅乃於內地改築一道阻絕夷衝而舊牆遮蔽飛沙兩得之焉東南至甘州九十里

新城堡即舊虜堡俗謂之新城東接瓦窰西連明沙後以人宗為險前有黑河為隍阡陌交通河渠灌溉亦饒野矣然無亭障而多塞道昔有屯兵今無候卒殆以甘州甚通耶又東三十里

為瓦窰堡

瓦窰堡在東、明沙堡在西二十里、堡無長城、倚天險、人宗山、聚數十里、其北合黎馬、黑河在南五里、自南來折而西流、人宗山名、塞道曰明沙口、曰小口子、曰青山口、皆與堡相近者、堡無防汎、東南至甘州衛城四十里、

瓦窰堡、居民之小堡也、枕崇山而面弱水、東山口而西新城、沿邊獨堡、於甘為近、東三十里至人宗山口、

堡南皆平原、北枕人宗山、所謂崇山也、弱水東至山丹流、向西合黑水、至鎮夷而出塞矣、二水既合、稱黑水而不稱弱水者、以其小於黑水也、山口即人宗山口、堡防汎南皆內地、自堡至甘州城二十里、瓦窰堡沿邊而東、即人宗山也、然甘為重鎮、故次載之、以其近之近者也、

甘之鎮夷漢之張掖郡也黑河右繞弱水後環東接山丹西連樂綰涼肅交通咸集於是其城大而堅其糧糧足以資莊湟其勇悍足以援四郡况乎衛城之中官無不備兵多而精宜其金湯之固矣乃昔有流寇之屠戮近有回逆之披猖至於外患自古為多明則莫甚於土魯番今南山之蠶食日深合梨之鼠竊時有則因時補救者宜如何也其地窪下黑河南來秋高則水溢幾於排山倒海苟非老君琪壇隄障水則沈窰產蛙之患不能免矣真鐵木兒亦見及此是任斯土者所當計及也

鎮當秦漢前漢邪王地漢武帝元狩二年漢邪王降以為武威酒泉郡地元鼎六年始置張掖郡取張國臂掖之義西魏改為甘州因州東甘峻山而名也世亦呼甘泉後為李軌所據唐武德年置甘州天寶後沒於土番大中時始

復宋為夏據改鎮夷郡又改宣化府元置甘州又置甘州
總管府又置甘州等處行中書省以總河西諸郡明洪武
五年置甘州衛黑河在西十五里弱水在城北山丹在城
東一百二十里又三百六十里至涼州樂綰即高台在西
一百五十里又二百七十里至肅州甘州產稻米凡涼州
莊浪西窰至此歇載四郡今河西皆是明季聞賊攻城文
武堅守城中西南隅有達子營秣馬之所也降夷數百居
之降夷內應城陷為賊所屠庚寅各郡回夷盡叛城為叛
回米剌即所陷此內患也南山即祁連山部落甚多土魯
番之真鐵木兒以為資於內地寓甘州正德八年歸而與
滿達兒曰甘州城南黑河可引以灌城於是滿達兒日夜
謀及甘州矣嘉靖元年滿達兒以二萬騎寇甘州薄城卻

攻都御史陳九疇率衆先登力戰乃解圍去。老人塋在西
南二十里。武云即誌書所載老人渠云。鎮文有監司郡佐
武有衛守備。有城守泰戎兵八百員名。又住劄甘州提鎮
五營全設兵五千人。衛東北至人宗山三十五里。

人宗山口即人祖口也。其口兩山忽斷。大道中通。狀如紫荊居
庸。北高而南卑。夷俯而入。我仰而防。山口之外有硯瓦。孤木木
架諸墩。又無候卒矣。昔於觀瓦灌作疊水。鑿石井。確有成效。又
於石井之南作南山關。重險既設。又設城兒溝。遺規尚存。但因
高下以爲峻防。則北至之夷何能越此。沿山而東四十里有觀
音山口。

山名人祖。俗以祖爲宗。又名快活山。不生草木。隘口獨此
處爲大。故謂之人宗口。甘州出塞外。率由於此。蓋合黎草

木芻羌雉兔向多往焉甲寅而後西夷盤據遊牧部落繁多今遂為竄於山中矣硯瓦各墩在口北十里作壺水掣石井皆明之太監陳浩所布置後夷入犯至此不能入明之巡撫楊博聞達至此乃作山南關今山口有千總山南關下多紋石如茅玉鋸而折之與黑河中石相似

觀音山口亦北高而南卑路徑險狹夷騎難窺山內東山寺口外紅泉堡西皆設險故沿山安堵今紅泉既廢而夷據為居停矣更沿山而東五十里為斜濠口

內口有泉夷每入飲太平堡在西南二十里紅泉堡在口外三十里明設屯兵二百今夷來往於紅泉者部落不一非但祝囊而祝囊部落向牧於此今他夷據之人咸以為祝囊焉其實祝囊已在宣夏之賀蘭也山口無防守西南

至甘州五十里

斜濠口即灰溝也。東近東樂驛。北出烟墩溝。西山之勢至此漸成平易。徑路遂多。山不可削。隘不可關。亦由山水南衝弱水北繞也。故甘山長城實始於此。明於山內增修隘險。牆之外有濠。濠之外有墩。木柵石疊。靡不備焉。因山口之出沒時有。而甘山之行旅多危。雖甲子台軍不足為有。無則置兵東樂。修築日規。何可一日緩也。東南則有山丹衛焉。

灰溝古所名也。今但知為斜溝。東樂在東南十五里。烟墩溝在口側五里。甘之西自靖安至此。以山為固。此地山平不險。乃築長城直接山丹而東矣。凡龍頭諸山不可為險者。皆築於外。今牆多傾。山口無險。出入無阻。為明之巡撫楊傳於灰溝設險尤備。自此而西至甘州共修一十五處。

而甘州之東北始安山口之北西夷甚多秋冬間常由口
入行旅多危者此也甲子墩在東南十里大路間築墩在
明季甘誌所不載墩軍數人或存或去雖在不足恃也斜
溝口無堡無防東南至東樂一十五里西至甘州六十五里
山丹衛漢之山丹縣也西夏乃置甘肅軍於此元為山丹州祁
連遠拱甘肅西屏弱水夾流長城後衛地平城廣水足然外有
龍首山之隙地南有白石崖扁都口之遠惠東有大黃山之近
憂而大黃山在几席之間惡能遜為異人任也至於唐書所載
遠而無庸而昔人所禁地非我有矣東四十里為新河堡

漢山丹縣屬張掖郡後魏西魏唐西夏皆山丹縣西夏據
河西置甘肅軍於此元改為州明為衛祁連山在南一百
九十里甘峻即龍首山其下有泉甘冽故名甘峻西魏以

張掖為甘川、因此得名也。在西北邊外二十五里，中有石洞，下有泉，弱水原出祁連，繞城前後，合而西流。至於新城，匯於黑河，謂之張掖河。即書之弱水既西，導弱水至於合黎是也。地誌云：弱水在張掖郡山丹縣，是為得之。而書注引柳宗元投之以物則委靡墊沒及底而止之說，今此水春冬之間，霖霖可涉，及其漲也，雖舟可浮，但河西不知造舟耳，豈有如柳宗元所謂者哉？蔡沉身未閱歷，故引證失實如此。乃西域傳有弱水在條支之說，似別為一派。而宗元之說，或謂條支之弱水，則涉於荒唐寓言。君子所不道矣。衛城不甚遠，而南關特寬，城南有南草湖，城西有西草湖，皆引水以灌田。龍首山即甘峻，明之夷人青化都兒先據昌寧湖，漸次移住於此，牧為邊患。萬曆間，巡撫田樂合

圓龍首山、新藏七百餘里、青把都半騎遁去、兒當時以為
甘山之捷、即此也、今龍首山往來游牧之夷、指不勝屈、詳
肅州之新城堡中、白石崖口在南二百二十里、口外為刀
爾吉佳牧、扁都口在西南二百里、口外為懷爾阿賴佳牧、
此皆大馬營黑城馬營墩之汎地也、大黃山、即馬支山、在
東南四十里、唐書注、山丹北渡張掖河、西北行、出合黎山
缺口、口傍河東坂、曲屈東出、行三百八十八里、有宣冠軍
軍東北有居延海、又北三百里有花門山、又東北百里有
回鶻河、明楊一清云、大黃不生、則夷之人畜受暑熱之災、
麋香不生、則夷之~~馬~~櫛受盤蛇虺之害云、大黃河西皆有
而各郡志俱言產山丹者佳、不知其實於馬支山、所謂錦
紋者是也、馬支之下、即大草灘、灘為夷所牧、山為夷所居、

今非一日矣。凡間達及大陣往來巡視。即山避之深處。其狡如此。況地方之官。又不以聞。故為支為支。世不得而知也。衛有守備。又有遊戎兵二百九十二名。西至甘州城一百二十里。

新河堡古駟遞也。大黃起於南。邊城倚於北。堡居平行路。可四通。而張鵬敗寇於此山。可謂因地制勝矣。舊設防兵。今乃移其兵於馬營墩。堡徒有居人耳。甘涼孔道。扼塞之守。何可廢也。又東由宣遠堡四十里至石碛山。

大黃山起於南五里。邊城倚於北五里。馬營墩在南一百四十里。移住在己酉年。堡至仲冬。溝渠水涸。則資汲艱。飲馬稍艱。商旅無投宿於此者。苟議防險。其惟步卒乎。東至碛口三十里。

石硤口堡大黃立於南合黎盡於北山難設險牆不勝防但恃
墩軍左右望而為耳目焉史堡盡山源泉無本幕井常乾明於
邊牆所起止者斬斷山崖築中牆而設溝塹但為北面之防耳
今守於北又怖於南蓋慮草灘大黃之夷彼處於中我反居外
也其東所經曲折崎嶇陰寒晝晦出硤即灘口大黃前峙陰風
四起溽暑猶寒道路之梗恆為行路者危焉其東有土阜荒祠
則定菟廟甘涼之界於此分矣

大黃山在南八里合黎在北長城外二十里硤口之山兩
峯相對下有石井而泉常竭今引山水於數十里外至
猶不足用明制輪戍兵三千三十名可謂多矣明制西之
邊牆止於關門東之邊牆始於窩兒今則邊牆不統較之
他邊似有可觀然上皆山石牆在山腰易於傾圮耳大黃

山大草灘止隔一土岡俱在路之南長城在路之北北面
猶有長城可恃南面則無可憑故殺越人於貨時時有之
破口之路亂石高低皆而曲折轉側人馬皆艱人但知升
陞之險不知其平也然破口路里許行路非艱惟南北皆
夷一線之通為可危耳堡有守備東至定羌廟二十五里
甘州北邊自九渠而東至於石碛皆長城山險凡十有三所四
百八十里甘州屬內地不與焉

甘州北邊近疆

自甘州西北界肅州界起以至於東北界涼州界止

居延城在甘肅之北晉之居延縣唐之靈冠軍也遠在絕徼漢
霍去病軍過居延而後南踰祁連李陵未至居延為單于扼絕
其後蘇武收叛北海要之不離居延近邊元以為亦集乃路以
山丹西寧二州屬之城固一都會謂之亦集乃城明初馮勝進

兵逐其王、降其將、城都廢、宮室至今歸然、其堂皇雖舊、而規模猶存、夷雖不樂居此、而游牧其地者、夫固有之、

城在甘州北、可九百里、肅州鎮夷北可六百里、涼州鎮番西北一千二百里、晉居延縣、屬西海郡、唐之宣冠軍、在居延東百里許、以居延為屬地、元之亦集乃路、在居延、有都總管府、又設行省、以山丹、西寧二州隸之、自居延而南、居人里落、旅肆陸亭、直達山丹、明洪武五年、宋國公馬勝兵至、亦集乃路守將卜顏帖木兒、全城降、師至別架山、元岐王朵仍只班遁去、追獲其平章長加奴等二十七人、馬畜等萬餘、六年、元孽犯涼州、都指揮宋晟討之、追至亦集乃、斬其渠帥也速兒、十三年、以沐英討火脫赤於和林、由亦集乃路渡河至和林、獲其全部以歸、按秦塞、木無朽、而居

延之宮殿梁皆累杉不知何處得來而黃瓦琉璃鹿毛塗
墁梁間有至正元年重修六字其餘漫滅不可識游牧部
落無定

居延澤在城之東古流沙漢獻帝建安末立為西海郡元謂也
亦集乃海海近城因城易名海判為三眾水匯之然不敵中原
一小湖漢皆謂之居延湖云

海在城東南二十里亦曰亦集乃湖甘州黑水合弱水西
流至肅之鎮夷及出塞北流計來河水注之是謂天倉河
東流至合黎山北乃北流經居延故曰眾水所匯也其海
有三哈班哈巴哈刺失三海也今夷人游牧部落無定
合黎山在甘州之北禹貢所謂至於合黎是西起肅之鎮夷東
盡甘之硤口南距人祖山山南則張掖也其麓清泉茂草甘之

苑園在焉其巔產茶甘人不識也今夷人四集矣

山在甘北五十里一名要塗山其西北有小硤則弱水黑水與流沙相合之處山延長三百餘里環甘州於南人祖山在合黎山南二十里合黎多草木甘人昔牧焉獵獸於其下然不知其上產茶也康熙十一年甘州參將石福始知之遣人採取佯言牧焉陰使家人製之歲變多金十三年後夷往來游牧於合黎之下無復有越人祖山口者合黎今部落無定

紅泉堡在甘州東北觀音山口外也夷行塞外北則合黎南則人祖中則孔道焉堡當其間亦南趨觀音山口之要道也地平有水昔人相度築堡置兵拒夷於高陵之外自堡無屯兵而夷為傳舍矣

堡在甘州東北十里、明時夷每由觀音口入犯太平湖瓦
窰諸寨、嘉靖二十九年、巡撫楊博親履險要、相度地宜、乃
命有司創築紅泉堡、秦設兵二百、於是夷人不能越堡入
口而諸寨俱安、今城依舊久無屯兵矣、夷人居條游牧無度
紅鹽池、在甘丹之北、紅鹽來甘堅類石色如丹、謂之鹽根、河西
多有之、其地多禽獸、夷雖不佳、而未始不游牧也

池在山丹衛北五百里、明洪武中、指揮莊德歲往採鹽、以
供大內、後以其地在境外、乃秦停止、其地有醉馬草、馬食
之如人醉、不能移足、以其草根煎之、和根傍之土以灌之、
其醉始醒、河西之地亦有此草、池多馬雞、松雞、他刺不花
以及鹿、兔、黃羊、青羊之屬、今夷人之部落游牧者不可殫
右甘州北面、境外夷人懷地、附諸隘口、合三十有四焉、

水窰山、南至高台所一百二十里

雙鐵山、南至高台六十里

老鴉泉、南至高台五十里

紅山口、南至高台三十里

破烟墩、南至高台二十五里

石關口、南至高台二十里

鷹窩山、南至高台二十二里

破山口、南至甘州九十里

羊臺口、東南至甘州一百一十里

青小口、東南至甘州七十里

小口子、南至甘州六十里

明沙口、南至甘州六十里

茨兒溝、南至甘州六十里

人宗山口、南至甘州四十里

觀音山口、西南至甘州五十里

大盤道口、西至甘州五十里

小盤道口、西至甘州五十里

斜濠口、西至甘州六十里

東樂大口子、西至甘州一百里

龍頭山口、東南至山丹二十五里

白露山口、東南至山丹三十里

白土口、東南至山丹二十里

紅寺山口、南至山丹三十里

羚羊山、西南至山丹四十里

青山口、南至山丹三十五里

刺答口、南至山丹六十里

獨峯山口、南至山丹三十五里

紅羊圍口、西北至山丹六十五里

青羊口、西南至山丹四十里

東山口、西南至山丹八十里

赤山口、西南至山丹八十里

石井口、西南至山丹九十里

玉泉口、西南至山丹一百里

小關口、西南至山丹一百里

此甘州北面之隘口也、甘州雖在合黎之南、邊境之內、夷人內犯者固少、而往來游牧於山北者、則時有之、凡往來者必依邊

故四填板橋有踰垣而入之懼游牧者必依山故觀音山斜濠口有越嶺入寇之憂然此其小者硤石口大黃山之夷盤據於南邊外之夷隣於北所存為甘涼大道者廣不足以容車耳

甘州近疆

自甘州東南接涼州界起至甘州西南接肅州界止

白石崖口外在甘州東南涼州之西也口稍壁攢峯下有澗谷曲折可以通行口外五十里許出幽鬱高者忽平隘者忽豁水清草茂四通八達北甘涼南青海火通雖險皆可踰越而至也

口外在甘州大馬營南一百里涼州高古西南一百二十里白石崖南五十里青海北十三程大通河西北八程今夷人刀爾吉佳牧

野馬川在甘州東南扁都口之南也有明時張掖青海相往來

內若王師外若海夷咸出入扁都口而止宿於野馬川蓋山口之路寬平而山中之水草豐茂也海氛靖川之草木猥奧今則披山通道出入扁都口者馬相接肩相摩矣

川在邊之扁都口南五十里明討青海甘州之兵從扁都口出先是夷王拙力昆在青海欲北歸假道扁都口入今野馬川為懷阿爾賴住牧凡出入扁都口以游牧於大草灘盤據於馬支山者皆其部落也

巴系墩川在甘之南西水關外明初設墩以通西寧四衛聲息川有古佛寺昔以居番僧今鼠穴豕伏墩四角墩傾圮而遺跡不盡漸滅飲馬川中者非我族類火攻擅長者則類回也

巴系墩在甘之洪水堡南一百一十里西水關南七十里西寧之西衛與甘雖阻隔山谷實為直徑此巴系所以築

墩寺明初建置以處國師者今無僧居寺中亦荒廢順治八年叛回餘黨數百善烏鎗者逃出降於滾卜滾卜親率諸回往牧於巴系墩川其部落多游牧於大草灘之地焉大都麻口在甘州東南為祁連扼塞北則內地南則要荒廣處黑番於此自青海揚波番臣於夷今夷出入草灘口為駟路矣口在洪水堡南五十里今黑番七族住牧

小都麻口在洪水南大都麻口西與南古城近山險地狹黑番居此或散而牧於虎賴口或連而牧於西水關口要不離乎小都麻口近地其背向之情今昔頗異不可不察也

口在洪水西四十里今黑番七族住牧

黑番口在洪水堡南番族住牧當大草灘之捷徑夷人行李往來地也

口在南古城南一十五里。黑番七族佳牧。夷俗取羊羔煎之。謂之酥油。以是名口者。祁連山之雪融湫。山路滑澤。不異脂膏。故名之耳。

野兒口。在花寨堡。近南古城。雖荒僻。亦腹裡地。黑番處此。東西皆夷。西則黃番。

口在花寨堡東四十里。今黑番七族於此佳牧。

板答口。在龍首堡南。近馬蹏寺。事佛謹。雖介於番夷。恃此不恐。口在龍首堡南二十里。番夷即黃番。最强悍。視黑番蔑如也。板答口。今黑番七族佳牧。

平頂。在板答口南。馬蹏寺之顛。山頂平行。故名。為龍首。居人隙地佳牧。其地者。黃番也。昔土魯番侵瓜沙。瓜沙之夷內附中國。優恤之。各有分地。在甘肅謂之黃達子。平頂其一族也。今黃番

番之納添巴遠輸金山云

山在龍首堡南四十里內連始末詳赤金王衛中甘肅呼黃番曰黃達子蓋夷而番也金山在西域平頂羅兒家族住牧

呼囉口在梨園堡西西河之源在南山南由口流入甘州口外為祁連山八達之區生多喬松相枝格而無曲幹人行水下不見其巔蓋番夷之棄物而甘人之芻蕘也黃番今背向頗殊矣口在梨園西五里甘之產松惟焉夫及此地而已松似杉似楠質直無節凡物皆以松為之他木不足用也甘人夏則出此口伐木及秋水方盛浮於黑河至於甘州番夷以焉夫炊爨不伐木為薪畏其烟焰也今黃番八個家家族住牧

呼囉口外、在呼囉口南、祁連蛇、燿義、祥、於群山中、馳奔雲、蟲、延
長千餘里、首注五涼、尾蟠荒陬、獨呼呼囉口外、山形若折、坦然
漸夷、谷中曲徑逶迤、草木蒨蒨、崖石倚仄、峭出咫尺、不可見
折而西、迤而南、山谷間忽有斥鹵地、長林豐草、隨處有之、明安
棹黃番於此、故梨園之戍、刀斗不擊、自黃番外附、而地非職方
之所載矣、

口外在呼囉口南五十里、梨園南六十里、今夷人墨爾根
部落游牧、

擺通河、亦謂之擺大川、在呼囉口南、祁連山谷之間、黑水之源
發於擺大、水不患其不足、張掖伐木、常至於川、草不患其不豐、
擺大之源、出石鑄間、若噴花、不數武而成川、川近榆水、蓋黃番
縱牧之地、今青海殘蘆、草茂則來、草盡則往矣、

河在甘州西南二百十里、呼囉口南百餘里、榆木山麓東
南二十里、黑河水源、詳梨園堡中、河今為滾卜、掉竿、游牧、
黑河、取在擺通河之西、河源之水、注於擺通、亦黑水源之一耳、
河源與川相隔一山、水草便利、黃番於焉、長子孫者數世、今且
與夷往來、而張掖之糴收、反為屬禁矣、

源在梨園堡南一百二十里、擺通河西一十五里、今黃番
七族住牧、

古木澗、一作上木、或云枯木、在梨園口西、呼囉口西南、澗皆山
水、惠浪湍急、夾岸皆山、夏猶寒慄焉、

澗在呼囉口西南八十里、黃番八個家、依澗而處、蓋呼囉
口一族也、

牛毛山、在古木澗之西、近榆木山、萬山綿亘、黃番八個家族住

牧馬

山在古木澗西八十里左右居人強名之曰牛毛黃番與
呼囉口之黃番同一族云

青圪搭牛毛山北榆木南山也地多澤澗溪澤凡黃羊青羊
沙狐兔鹿之屬皆聚焉黃番五族享其利而聚族於斯其入內
地東通梨園西接紅崖北趨高臺其外交也呼囉口外巴素墩
川野馬川在其東拜浪河在其西紅土坡在其南故青圪搭之
黃番富於他族矣

青圪搭在梨園堡西南一百三十里黃番五個擺眼住牧
仄稜在青圪搭西南榆木山之南山也黃番皆臣服金山獨仄
稜以姻親不與焉故黃番咸倚重之沿山之夷強者與之交歡
弱者事之惟謹矣

仄發在青圪搭西南三十里黃番羅兒家族住牧其目之妻、嘎爾旦之妹也

榆木山口、在祁連之北、高臺所之西南、山延長百數十里、東起梨園、西盡暖泉塞、地宜榆、甘州差少、山則產之、以此得名、山寬地名各異、山口其一焉、黃番居之

山口在暖泉堡東北二十五里、紅崖堡北四十里、黃番藉夷聲勢、掠紅崖諸堡、殺傷官兵、各族多與其事、而榆木山口為尤甚、今黃番七族住牧

半個山、在甘州西南、暖泉堡東南、為榆木山之麓、北倚南仰、亦名半角、黃番七族住牧、南通紅崖、北入榆木、時有之矣

半箇山、在暖泉東南七十餘里

新墩子、在暖泉南、半箇山西、舊築新墩以為斥堠、其地在山僻

逶迤百折、恒伏莽焉、黃番歸命以來、世居之、

墩在暖泉南六十餘里、

拜浪河在甘州西南、紅崖堡口外、河水春冬凝結、雪消冰泮、清淺無波、人以是名其地焉、其地縱橫數里、周圍叢薄、薄外百澗、千溪、南達青海、大通、東趨榆木、呼囉口、已系墩野馬川、西至討來川、雖崎嶇偏仄、夷乃按轡徐行也、

河在高台所南一百四十五里、紅崖堡東南二十五里、紅崖之田、資拜浪河以灌溉、故水源發祁連而流止於田中、無他注也、南至青海十有二程、至大通河十有一程、東至榆木山麓三十餘里、又東至呼囉口一百九十里、至已赤墩川二百餘里、至野馬川二百六十里、西有討水川、流甚長、今夷勞藏游牧、

紅土坡在拜浪河南討來川水岐而為二環坡其中絕水四面山壁立為截止坡中者恒跼跼不可止川水合於西觸石成潭深不可測旋轉駸疾木葉浮而至者咸沒其中惟上流散漫河渡彼岸皆石水響有聲其巔寬夷土沃草茂木葉常丹望之者以為土紅云或以紅崖之紅土山以實坡者誤也

坡在拜浪河南九十里紅崖之近地有紅土山童山不可畜牧者也紅木坡今夷人綽庫兒住牧

草打班在拜浪河南自紅崖西多石峯不可牧惟草打班草茂蒙茸焉

草打班在拜浪河西南一百里肅州清水堡南九十里夷人宛卜族住牧於此

水關口在紅崖堡南拜浪河水由口入兩山高聳至口而伏紅

崖之人昔牧於此及黃番內附割以界之

口在紅崖南三十里今黃番七族於此住牧

綽哱口在紅崖南水關西南倚祁連北眺榆木其間怪石橫列口外則側徑不容馬足蓋紅崖之要塞也黃番居之

口在紅崖南七十里黃番七族住牧於此

石灰關口在紅崖西南綽哱口西北關連肅壤山接祁連黃番居之

其地有石同於石灰故名在紅崖西南五十里黃番七族

住牧

明海子、在甘肅之交紅崖西北之屬肅州東接甘之黑泉西連肅之馬營莊固內地也多芨芨草地雖窪下冬春間無棘水不知何以名焉

海子在紅崖西北九十里、本屬肅州地界、以其近於紅崖、故載於此、黑泉堡、甘肅往來之大道也、在高台所西六十里、肅州臨河堡、東二十里、馬營莊在肅之臨河東二十里、鎮夷所南一百二十里、今黃番七族住牧於此、

右甘州南邊內外番夷環地、附甘州諸隘口、合三十馬、

和寧山口、西北至山丹衛一百三十里

靜寧山口、北至山丹一百二十里

白石崖山口、北至山丹衛二百二十里、西北至甘州三百里

寧番口、北至山丹一百三十里、西北至甘州二百里

無虞山口、北至山丹一百三十里

扁都口、東北至山丹二百里、西北至甘州二百五十里

後所山口、西北至甘州一百七十里

大都麻口、北至甘州二百里

小都麻口、北至甘州二百里

酥油口、北至甘州九十里

野兒口、北至甘州九十里

通遠口、北至甘州八十里

順化口、北至甘州九十里

宣政口、北至甘州一百里

陽化口、北至甘州一百里

大慕化口、北至甘州一百二十里

小慕化口、北至甘州一百一十里

板答口、東北至甘州九十里

大磁窩口、東北至甘州七十里

小磁窑口、東北至甘州七十里

呼囉口、東北至甘州九十里

甘峻山口、東北至甘州七十里

老康口、北至高台所四十里

楮子溝口、北至高台五十里

榆林溝、即榆木山、北至高台七十里

花兒寨、北至高台八十里

楊旗口、有楊旗堡口、有關、北至高台所一百二十里

大口子、北至高台一百二十里

盤道溝、北至高台一百三十里

紅崖水關口、北至高台一百三十里

甘南以山為險、夷之盤據特多、白石扁都為其孔道、若紅崖諸

堡漫無障塞也。隘口寬而且多，實難於塞，亦不勝塞也。

肅州衛。雍正初年。改衛為州。設州牧。高臺縣屬焉。

四郡去河東肅州獨遠。三面受敵。通呼吸于一綫者。獨肅為危。漢置都護校尉。在西域之西。唐亦置都護府。皆遠在肅之虛空萬里外。未常為危。况肅為禹迹所至。雍州之地者乎。亦存乎其人耳。

四郡不及于燉煌者。久棄于塞外也。肅州為秦塞之極西。富夾之極衝。其去河東之蘭州。且一千九百五十里。湟莊甘涼皆相接連。惟南北為邊塞。肅州則正東接甘州。其西南北三面皆屬夷疆。漢代西域。自武帝元封三年。遣趙破奴擊車師。因為松大宛始焉。于是酒泉列亭。至玉門矣。漢置都護。自宣帝用騎都尉鄭吉。始置校尉于西域。則不可勝數。若班超尤卓卓者。唐置安西都護。自太宗始。為導弱

水至于合黎、在肅州東北二百四十里、故曰焉延所至。
肅州之東為甘州、可置勿論、其西則嘉峪關、金墉玉門在是也。
南有祁連、較之甘州走集多險、但守重岡、硤則隨山三百里、雖
高枕也、何言乎獨肅為危也。

甘州在東四百二十里、其接界則在東之花牆兒、相距二
百四十里、嘉峪關在西七十里、其外則石山天險、其牆則
堅固高厚、出關而外、則皆昔之赤金蒙古地、昔皆西夷據
牧之、金墉玉門、言其堅也、祁連在南一百五十里、祁連之
北、且有觀音山、紅山、寒水石山、疏黃山、重岡、複嶺、深河、急
水、故夷大舉、必不能由此、不通小竊、往來耳、重岡、硤在東
南二百八十里、凡夷往來南邊、必由此硤、肅之南邊、東自
清水起、西自嘉峪關止、統二百七十里、皆依山阻險、故曰

隨山三百里也

雖肅州之外地皆沙漠、內地盡湖海、不能因山逼險、塹豁谷以繕治者三之一焉、然肅屯于中下、古屯于邊、金塔屯塞外、萬里長城以人為之矣、何言乎獨肅為危也、

凡河西湖海之地、每歲孟冬仲秋、其土潮漲、泥水自地中湧出、當此兩月、不惟牆崩、且能陷馬、肅之北邊、西自嘉峪關起、東至胭脂關止、統三百九十里、西自嘉峪關至兩山口、東自胭脂而至鎮夷、皆有邊堵、惟下古城而東、至於深溝堡、統一百六十里、全無長城、雖抽兵築板、衆機即圮、有明常濬濠數道、然土脈潮漲、則濠亦不免于傾沒、肅州城有副戎、下古城在東北四十五里、有守備、金塔寺堡在東北九十里、有遊戎、

且河西之插入夷地、三面受敵者、西寧亦然、西寧如象脣、肅州如象鼻、形勢同也、西寧撤四衛而藩籬單薄、肅州棄三衛而寇逼門庭、外侮同也、青海黃河、祁連紫塞、列于左右、萃淵同也、何言乎獨肅為危也、

西寧四衛、曰罕東、曰曲先、曰安定、曰阿端、皆明初洪武間、置于青海上、以處內附之夷、為西寧西面之蔽者也、正德間、亦卜剌窳據青海、而四衛遂廢、肅州三衛、曰赤金、蒙古衛曰罕東、左衛曰哈密、皆明永樂間置于古墩、煌地、以處西附之夷、通西域之貢道者也、正德間、土魯番侵伐哈密、而三衛遂棄、青海黃河、皆近于西寧、祁連山居西寧肅州之間、紫塞即黑山、在北、昔西之青海為達賴、黃台吉、往牧、河州西寧之間、捏工川、莽刺川、滾卜川、為賴爾加、黃台

吉住牧、祁連山下之大通河、為夷力幹黃台吉住牧、此西
寧之萃淵藪也、肅南之討來川、為夷角幹喀住牧、紅泉為
阿爾賴青台吉住牧、肅之西有扇馬營、為索囊王建兒台
吉、及輝力兔合首氣台吉住牧、又西有赤金湖、為藏勞滾
卜及輝爾吉住牧、北之威房城、為額力刺窟隆住牧、又北
坤多魯、為漢頃台吉及無素賴爾定合首氣住牧、其他達
牧之夷尚多、詳新城堡中、此肅之萃淵藪也、

曰非然也、西寧與肅、已有同而不同者、孤懸獨出、西南北皆夷、
不若西寧三面可據、河東北壤也、商旅不行、日中開市、不如西
寧之賀遷輻集也、土饒而瘠、野無餘糧、不若西寧之倉箱輦載
也、流亡漸多、熟番無幾、不若西寧之戶口增而土司盛也、北無
扼塞、且至二百里、不若西寧住牧之夷、關市久而相安也、如是

且不得與西寧絮長短則何解乎獨肅為危也然則綢繆牖戶之計烏可不早為耶

西寧東通河州東北通莊浪西北可至甘州所謂三面可據也肅州自貿易布皮而外無他行旅止鎮夷產稻他堡雖有雜糧然皆薄收漢初徙民以實酒泉戶口一萬八千有奇明洪武時戶五千八百五十口一萬三千六百遞至嘉靖萬曆代有減少至天啟崇禎歲有減少肅之屬者屬編戶纔五百戶其黑番黃番在後堡者則已納夷添已非可得而臣民者矣肅州一副戎二遊戎三守備合兵二千五百員名耳

肅州南邊堡

清水堡

在甘州紅崖西五十里

金佛寺、清水堡西五十里

永安堡、金佛寺西一十里

紅山莊、永安堡西十里

文殊口、紅山莊西四十里

仰來泉、文殊口西南七十里

嘉峪關、仰來泉西北四十里

肅州北邊

嘉峪關、肅州街西七十里

肅州街、甘州街西四百三十里

野麻灣堡、嘉峪關東北五十里

新城堡、野麻灣西十里

兩山口、新城堡西三十里

下古城堡 兩山口東三十里

金塔寺堡 下古城北五十里

臨水堡 金塔寺南六十里

雙井堡 臨水堡東六十里

鹽池駟 雙井堡東四十里

深溝堡 鹽池駟東四十里

鎮夷所 深溝北三十里

沙碗堡 鎮夷東二十五里

胭脂堡 沙碗東十五里

肅州近疆

石灰關 在肅州之東南清水堡之東

黃草渠 在清水堡之東鎮夷所之南甘州之高臺西南

討來川 肅州之南 祁連山之北

連魯川 肅州之南 草打班之西

來泉 在肅州西南

扇馬城 在肅州之西 嘉峪關之外

赤金蒙古衛 肅州之西 玉門營縣之南

玉門縣故城 扇馬城西 赤金衛北

晉昌縣故城 在肅州之西南 瓜州之東

坤都魯 在肅州西北 赤金蒙古之東北

黑山 在肅州北

威魯城 在肅州東北 金塔寺之北

北大路 在肅州之北

威遠城 在肅州東北 鎮夷所金塔寺之北

毛目城在鎮夷所北

平朔城在鎮夷所北

兀魯乃朔在鎮夷之北甘州之西北

遮魯障在肅州鎮夷之北

肅州南邊

清水堡在南山之下東接紅崖南通山口皆夷人可以馳逐之處非若九山狹隘者比也堡依山而地則平黃草榆林諸渠水利雖通而黑番取之內府輸之外府不亦異哉則扼險防奸兵宜同于明制守宜嚴於他堡矣西五十里至金佛寺

清水堡甘肅之接界也肅南皆山統謂之南山山則始為祁連紅崖屬甘州在東五十里山口即南山口二十里九山在東南三十里其山口可通西寧然狹隘難行多重

岡後嶺馬堡地平行宜稼穡黃草塢榆林塢乾塢皆引水
來灌心三塢皆黑番喃唔兒住牧其目日蛇眼宛仲今其
目曰蛇眼宛卜今納烏斯藏達賴喇嘛添巴明制騎兵二
百步兵一百番兵五十名今堡有守備北至鎮夷一百五
十里

金佛寺堡臨山在南井田在北清水東達紅水內引亦四達之
地也寺建于明初堡擴于中葉土地平行水泉可通而堡之西
南若觀音山紅山寒水石山硫黃山山外即討來川也楚塢橋
為往來之谿徑苟斷橋而守之則堡之西南可稍舒焉西十里
至永安堡

臨山在南十五里井田莊在北四十里紅水塢河在西六
十里其河源發南山夏流冬涸金佛寺建于天順間黃番

宗釋為建寺封僧、竊廢之而已。嘉靖二十八年巡撫楊博繕廣堡城、增置戍兵。觀音山麓在堡西南二十里。其山則與祁連相去甚遠。因山有觀音寺、故俗即以此呼之。紅山在觀音山之西、與觀音山相連。寒水石山與紅山相連。疏黃山與寒水石山相連。討來川在堡南二百一十里。楚橋在觀音山口內、山水淥淥、林木紛紜交積、水從下流。其水日久堅定、漸積如橋、人馬行其上、黑番今其目曰官代兒。卜納達賴喇嘛添巴明制兵一百四十三名、番兵二十名。今堡有把總西北至肅州九十里。

永安堡在觀音山口豐樂川原、從此而發、引渠折派、邊堡之灌溉藉焉。肅南以祁連火山為障、諸隘多險、獨觀音山口路闊山寬、故討速魯紅泉內之天生橋、楚瑱橋、但一新絕、則河水流漸。

夷固不能飛渡、渡橋迤而南、有重岡、凡犯肅南、不經此硤、更無他途、但一人守之、萬人莫能當者、二橋不斷焉可也。

堡亦謂之觀音堡、然山在南九十里、但堡在山口耳、祁連山在南一百一十里餘、火山亦在其南、與祁連相連、討川連魯川、今住牧西夷曰索囊、南占天生橋、在南八十里、其在地南面重山、而討來河水從此而至、入地伏流、不數武而出地如橋然、可通人馬、如大遺焉、故曰天生也、楚渠詳金佛寺中、明參將焦麟曾新斷此橋、楚渠今厯年久、徒杠與渠又成矣、河水即討來水源、出祁連、逆肅南而西流者也、重岡硤在堡西南一百九十里、重岡硤在堡西南一百九十里、各山之總硤、硤瘁而陡、馬不可騎、必擔之而魚貫以

過舊堡為黑番小宛卜族住牧蓋番僧長結思冬之後也
堡屬于金佛寺舊無戍兵西北至肅州八十里

紅山莊因近紅山而得名文殊在左觀音在右莊居其中左右
可投之地也其上寬衍仰兒堪之水遠溉田疇沃野可耕之地
也番僧悉居于此廣羅族類為肅之南面外藩焉今番族外附
則左右山口尤宜防閑而卯來金佛相去甚遙必宜增屯兵于
此一以為佛佛之傳鉢沙門一以為觀音文殊之降魔護法也
西四十里則文殊口

山色紅故名紅山文殊口在西四十里觀音口在東十里
仰兒堪即紅泉新堪也明時烏斯藏之番僧曰魯爾咱住
牧於此傳至結思冬其徒甚盛乃分為大宛卜小宛卜二
支西黑番貪其貨賄飲食多有種落焉今黑番屬官代宛

卜所轄、仍納達賴喇嘛添已、卯來泉在西八十里、金佛寺在東二十里、卯金佛相去百里許、舊無戎兵、

文殊山口、鑿山為洞、覆瓦為寺、番僧之所居也、山口兩山對峙、水泉中流、南為濫泥山、可通天生橋、文殊無守、則夷由茲以前、而塔兒灣、黃草垠等堡、先受其荼毒矣、有明之監司、壅斷文殊口、築嘉峪長城、而各堡始安堵焉、然斷橋壅土、恃地為險、又不若守小缺、以人踞險、鼠鬪穴中、夷之長技、無所施也、西南七十里至卯來泉焉、

文殊山在南、而山口在寺後甚多、舊云有三百禪室、皆唐初所創、俗謂之小西天、元太子喃達失有碑記在焉、濫泥山在西南百餘里、其山多水泉泥濘、故曰濫泥、一作淖泥、天生橋也、詳永安堡中、塔兒灣堡東北至肅州三十里、黃

草填堡東北至肅州十五里、清水堡亦有填、與此名同、實異也、兵備李涵斷新文殊口、絕夷人南入之途也、築嘉峪關、長城、絕夷人西來之路也、小碛在文殊口內、其碛峭壁窄徑、人馬難行、文殊口番族所住、舊無防兵、北至肅州三十里、

卯來泉堡、在山腰、泉流堡右、幽僻荒涼之地、黑番多居之、堡西可達賜子溝、紅泉、長城所自起也、堡前後則牌樓山、松山、環峙如城郭、堡西南遠而山崑崙、雖無居之者、切近則小雪打班、其外則達魯討來二川、為夷一大都會也、則淖泥牌樓諸山之後、凡可以渡水者、必謹遏禦之、昔人于堡此、兵不為是也、今夷之在南在北者、有、不以此為捷徑耶、西北四十里、則嘉峪關矣、

堡在羊山西南、依山阻險、東北直達肅州、堡小地僻、多山、

無由黑番伯剌究冲族往數。今其目曰寧印羅漢。與達賴喇嘛添巴。勝子溝東至肅州一百九十里。紅泉墩東北至肅州一百五十里。南山討來川及各夷。欲入腹裏。必從堡南渡河。若扼險峻防。則必從勝子溝。至紅泉墩。于長城盡處入也。牌樓山距肅州百里。形如牌樓。松山即松打班。在漳泥山之東北。距肅州百餘里。崑崙山在西南一百八十里。小雪打班。即祁連山。祁連至此漸卑。故呼為小。雪打班。即山坡。蓋夷語也。討來川。即夷爾幹喀及阿爾賴青台吉住牧。漳泥山即濫泥山。水即討來川。水自東而西。繞南山之後。其勢甚急。人馬不可涉。惟天生楚堤二橋可渡。水至卯末分流。一派入境。謂之卯末泉。泉水東北流向肅州。堰堤灌田。而河水差小。反合清水紅水白水沙河。從下古城

由邊東流謂之討來河至岔口鎮夷界合張掖河水謂之
天倉河東北流向合黎為討來河與討來川不同川在肅
南其分至肅北者謂之河也有明時兵備王忠顯置堡設
兵二百二十名番兵五十名今堡有把總東北至肅州七
十里

嘉峪關即壁玉山亦謂之玉石山明收河西地而以嘉峪為中
外巨防此河西之極西譬諸吐舌之末也地無居人惟屯兵焉
四面平川而關在坡上初有水而後置關有關而後有樓有樓
而後築城長城築而後關可守也嘉峪南連卯來北接野麻東
達肅州西出塞外明以哈密主西域貢故西域出入咸在嘉峪
及三衛內徙閉關已久關之西一民非臣尺地非土關外則有
大草灘水足草美往來番夷所停驂而駐足也西北有石關兒

石硤天險扼塞之區硤外則扇馬營昔皆屯兵今城已為頽牆墜瓦而降河飲池于其地者駭北三千矣更西則赤金蒙古衛有山有河有城有堡今鵲巢不為鳩居也自此益遠夫夷之在南方者不過祁連西海而止其在西在北在西南在西北者不勝數三郡梗其中故四方之往來咸繞于關前則嘉峪之為重地豈三郡之一隅一徑所可同日而語哉循牆而北五十里則為野麻灣矣

嘉峪關在嘉峪山岡上明洪武間馮勝取河西西抵瓜州而以嘉峪為限坡下有九眼泉夏不致竭冬不致凍弘治七年間嘉峪關絕西域貢獻其後兵備李瑞連關樓大學士崔鑒聞邊築嘉峪關長城使兵備築修起于卯來泉之南以接于野麻灣之東北板築甚堅鉏掘莫入夷常穴之

必不能穿其綜理之密可知。後之閒邊經營之制，殊不賄馬。却來泉在東南四十里，野麻灣在東北五十里，肅州在東北七十里。明初哈密衛封有忠順王，主西域各國貢道三衛者，曰赤金蒙古，曰罕東左衛，曰哈密是也。嘉峪而西二百四十里為瓜州，即赤金蒙古衛也。一千六百里為沙州，即罕東左衛也。一千八百四十里為哈密衛。正德間，三衛為土魯番侵擾，多內徙于甘州二州之間。而西域貢道遂絕。大草灘在關外之西二十里，名與甘涼間之大草灘同。同大草灘之南有山，亦名崑崙山，以其似崑崙而名之。石關兒在嘉峪西五十里，扇馬營亦在西一百六十里。今扇馬營城為索囊王建兒台吉及輝力兔合普氣台吉住牧。此二部乃真西夷也。其他沿邊者，皆北夷而臣伏于西。

夷之噍爾旦馬、赤金湖、今為勞藏滾卜及絳爾吉、住牧三
郡者、武威張掖酒泉也、嘉峪關、今有遊戎自關循邊牆而
東北、至野麻灣五十里、

肅州南邊堡、自清水堡而西、至於嘉峪關、凡七所、二百七十里、
其卯來泉而東、皆山、卯來泉而西、則長城也、

肅州北邊

嘉峪關、肅州北邊所自起、接北野麻灣者也、嘉峪關已載南邊
之末、可不復言、然野麻灣不足以冠北邊、若肅州則居中為衛、
不可謂之邊堡、復載嘉峪關、為北邊之首、

嘉峪關、東至肅州七十里、東北至野麻灣五十里、

肅州、漢始開置酒泉郡、隋始為肅州、至今因之、衛地東依甘
州、西極嘉峪、雪山、南接鞏塞、北臨三面背夷、中原板圖、于斯盡

也。衛城面金佛而背新城。左臨水而右。卯泉城小而堅。漢環而曲。民兵以餉為命。烽火之達為常。五郡之瘠。薄孤危者。豈有過於肅哉。夷之南北往來。賊邊吏不嚴。遠絕不伸。鍵伐則長此安窮哉。

肅州。因為西成地。秦為月支國。漢元狩二年。霍去病破渾邪。始間置酒泉郡。國城北一里許。有泉色黃而味如酒。故以名郡。西涼李嵩都於此。隋初始置肅州。楊帝廢州而屬之張掖。唐為肅州。又為酒泉。宋為西夏。元昊所據。元為肅州路。有明洪武二十四年。馮勝運元守臣哈魯達魯花乃置衛。自嘉峪關外。皆為羈縻地。于是以肅為華夷界矣。甘州在東四百三十里。嘉峪關在西七十里。雪山在南一百五十里。紫塞即黑山。在北一百八十里。金佛寺在南九十

里新城堡在北三十里、臨水堡在東四十里、邠來寨在西
南七十里、衛環城皆水、但屬小溪、蓋紅水壘樂討來各水
之資灌溉者、哈密衛徙居衛之東關廟者三族、曰畏吾兒
族、其人與漢俗微同、曰哈剌及族、其人與夷族同、一曰白
面回回、則回族也、今皆男女耕織、或為弟子員矣、商賈營
五、皆有其人、城有寄住黑番為編戶、其目曰永住部、五百
餘家、不納夷人添已、今不列番夷族中、肅州文有監司、武
有總戎、西北至野麻灣五十里、

野麻灣堡嘉峪列于西南、長城列于東北、貞壤平川、荒涼之地
也、然長城外衛、則負來荷戈、聊足自固、惟飛沙附牆、破為之平、
雖挑之障之、防夷踰越、亦目前苟且計耳、北邊長城、悉多沙患、
安得有因地構宜者、以人力而禦天風耶、東十里則新城堡焉、

堡築于萬曆四十四年。西南至嘉峪關五十里。皆沿邊牆。東南至肅州五十里。則為內地。堡雖荒涼。實可耕稼。而沙壘牆阜。常如平地。凡北邊近山者。無沙。平原廣漠。風大沙多。沙乾如細麴。若遊塵揚于空中。在在如是。旋挑旋壅。良無益也。惟有因地措宜。或築內邊。以為重險。或築戰臺。以跨邊牆。或木于外。以障風勢。在乎經營得人耳。堡有杞總新城堡。渠水可引。平原可耕。長城可守。然西北邊外。皆夷往來之路。恃一牆以隔。而苦于沙淤。從來邊堡。不在自守于內地。在乎覘外之水頭。近有花城兒。可為伏奸之所。遠有鉢和寺。為聚象之淵。則覆索偵候所宜密也。東三十里。則兩山口焉。

鉢和寺。引水灌田。故可耕稼。花城兒河在南三十里。可以牧馬。鉢和寺有湖。在西一百里。又有小鉢和寺。亦在西

三十五里、山口有榆樹泉、可以飲、牧鉢和、西即柏楊林、路極平坦、可以通車、故以夷往來、必取道于鉢和寺也、今夷之遊牧于此邊者、不可勝記、其名有分地者、載於分地之堡、其往來西北、住歇于新城之外頭者、曰把都兒台吉、同此名者有三、又有曰色各長素、曰占本素台吉、曰桑格思也台吉、又有曰額力刻緯加吉、同此名者有二、曰谷力漢緯爾吉、曰倒郎色楞台吉、曰阿要台吉、曰谷理矣麻把什、曰揮都魯台吉、曰滿吉大台吉、曰額各慶台吉、曰胡隆木石台吉、曰撥討台吉、曰額亦得尼合首氣台吉、其目之多如是、則部落之衆可知矣、堡有把總、南至肅州衛三十里、兩山口堡、城小地平、而邊垣剝落、土地皆礫、無可恃之險、有窺伺之夷、若乾海子、黑山口、雖專有責、或恐大武設矣、東三十里

至下古城

城周一百二十里。故曰小。地在下濕。土極潮鹹。牆垣自墮。漸次全傾。乾海子在西北一百五十里。夷之住歇水頭也。特設北堡以防之。黑山屹立沙漠中。望之如墨。且黑水經其下。故曰黑山。俗又謂之紫寨。其山口在西北一百四十里。亦夷牧馬休息之地也。堡有把總南至肅州衛二十五里。下古城堡。土脉潮鹹。不可以築邊垣。河流不定。不可以設險阻。最為要地。而最陷于危也。邊外大乾糧山。聽其出沒。昔日勞來安集之開府。塞旗斬將之虎臣。今安得莽拊髀思之。下古驛連臨水。東接雙井。雖傾仆邊城。猶近內地。若北出關門。則駕鳶池水淺而草豐。又北則大口子。地闊而山卑。已如西出陽關矣。况又北出如金塔寺。北出金塔寺五十里。

封來河因泉水會入從堡之左側北流出邊然其水時消時溢溢則潰決邊牆消則河皆平地夷每冬而入犯考字夏之橫城當黃河之堰驅石甃砌直接河堰遂無夷患今肅雖無石豈無土木乎是在乎留心邊計者耳癸亥年夷目擺代科產殺官兵虜財物皆邊備不修之故也大乾糧山又名沙山其側有小口子在東北六十里屬堡分管明巡撫楊博增城堡招流亡給牛種而堡又富庶泰將馬恩指揮周欽大捷于山口夷不敢犯者十餘年臨水堡在南十里雙井堡在東七十里駕崋在北五里夷人至秋每牧于此大口子在北二十里堡有守備西南至肅州四十五里南至臨水堡一十里

金塔寺堡因有塔而名也地無居人懸兵塞外一望沙漠無甬

道以通內地可危者一夷未薄城沙已先登可危者二天倉為夷所必由鴛鴦為夷所必牧東南皆梗可危者三南而大口子難防北而紅口子難備可危者四近而威魯城之弱牧遠而坤都魯之探兒其地狼心紅狐各山羊頭沙棗諸泉之患可危者五昔以金塔安插降夷募養西番庶幾以蔽古城臨水耳今之懸軍于此一以代天倉夜模之戍遠候邊聲一以塞臨水鹽池之衝出邊按伏也然委孤軍塞外不如退保于腹中是在乎因時用變者南入內地之邊堡六十里至臨水堡

寺已久傾塔今尚存然頽壞極矣堡外插棘架木為衛而平原曠野風揚沙石直治堡城天倉河在北三十里夷之北來者經雙樹兒渡水由槿桶灣順天倉河至堡鴛鴦池在堡南四十里大口子在南三十里紅口子在東北六十

里、威魯城在北八十里、原安插瓜州總牙族、昔西夷額力
刺窟隆住牧、坤都魯在西北六百里、昔西夷罕額吉及
無素奈爾定合首義台吉住牧、狼心山在東北三百五十
里、凡往來哈密北山者、必聚于此、羊頭泉在北一百二十
里、沙素泉在北一百七十里、明設堡安插西番、曰羊及關
西各夷、天倉墩在東北二百六十里、明時墩軍呼天倉墩
名鬼門關、夜棋墩在天倉墩西十里、堡有遊戎、東至鎮夷
境外之權桶灣五十里、西南至肅州五十里、

臨水堡、漢之會水城也、北連下古、南接清河、西肅州而東雙井、
地居適中、為甘肅孔道、鹹地可耕、樵蘇可爨、然無隄隄可守、徒
恃下古金塔以為屏翰耳、且合河口大口子皆其要害、而夷常
牧于鴛鴦池、則增防殆不可緩也、東六十里至雙井、

會水城、漢置會水縣、以封來沙河清水、紅水所會也、城舊有堰水障、今廢、下古城在北十里、清河堡在東南七十里、肅州在西四十里、原有邊牆、合河口為封來紅水二河相合、沙灘隙地須防、今邊牆多為鹹所傾、隨在通行、不但防合河口矣、大口子在北三十里、鴛鴦池在北二十里、堡有把總、

雙井堡、大道平原、邊類濠湧、交衛行且危疆也、至于照壁石板、為其分地、顧此失彼、安能及之、增防不可已矣、東四十里至鹽池、西至臨水、東至深溝、皆肅州之大道也、舊制邊牆且慮其傾、又濬深壕、或一道、或二道、今議築濬者、且絕響矣、照壁山在西三十五里、石板墩在西北三十里、堡有把總、

鹽池、駟堡、產鹽池也、隨取而足、無煎煮之勞、然汗牛所載、不值

一銖堡道如砥，備禦全無，東四十里則有深溝焉。

堡所產鹽其色甚白，鎮夷、鴛鴦池所產亦同。甘肅二州皆取醴池焉。堡從無邊垣，皆濬濠以防其北。西耳堡有把總，深溝堡、平川下地、黑河在北，草溝在南。地卑濕無牆，蓋西起下古臨水，東至鎮夷之西，無封疆以限華夷。由其地鹹鹺，不可築濬，萬里長城至此獨缺。雖曰腹中，何殊邊外？恃片驍遠置修堡近防而已。深溝而東，由臨河以至黑泉，則甘肅之孔道。若沿邊而北三十里，則至鎮夷矣。

黑河即甘州之張掖河，流至此北去而合討來，為天倉河也。草溝井堡在南八十里，明制下古城兵三百九十名，馬二百二十匹。臨水堡兵九十二名，雙井堡兵二百二十名，馬一百四十匹。臨水站兵四十名，馬十四匹。深溝堡兵五

十名馬十四匹臨河堡即花牆兒在深溝之東三十里黑泉屬甘州在臨河之東二十里堡有把總

鎮夷堡古沙磧地明永樂二十九年馬博始于其地築哨馬營明置鎮夷所其城近河為黑水之所衝決天順間始改今城黑河之深在西南邊堵之崇起于北南眺深溝東連沙碗且有羌谷之天城懸橋之地利金湯之固富庶之地矣近有石硖口神工鬼斧險絕人區雖無可慮若鷲頭山則夷所鑿控也分水嶺千人塙夷所塞寨也黑山合黎夷之所登以遠眺也威魯毛目夷之時所盤據處也達有厄魯乃湖夷所羣聚而後散也亦集居延夷所飲馬而長驅也故山谿之險不可恃不但鎮夷也而鎮夷但當自保其富庶耳又東二十里則至沙碗堡矣

黑河在西四里邊牆從黑河項起繞城直接甘州而東郡

名羌谷、天城者、四面山崖聳制狀如城然、黑河經此而入
石硤口、北流出塞外、鎮夷二門皆有平橋、河西惟甘州產
稻谷、肅州惟鎮夷而東產稻谷、由于水足土膏、水足者引
黑河以灌溉也、石硤口在北七里、其口如鑿、儼然石門、黑
水從此出、鵝頭山在西北五十里、分水嶺乃渠渠之水隘
在西北二十五里、千人堤在東一百四十里、黑山在西北
二十里、合黎山在東北三十里、山自北起、環甘州之北而
盡于石硤口、(堡)威魯在北二百五十里、今夷人額力窟隆
住牧、毛目城在北一百五十里、兀魯乃湖在北五十里、常
夷住此、亦集乃海、亦名居延海、固有居延縣也、又謂之寧
冠軍、在北一千二百里、自兀魯以至居延、莊涼甘肅、彼皆
可通、不但鎮夷也、鎮夷道里、所有、遊戎

沙碗堡枕邊城而面黑河平原之地。渠水疏濬深耕溉種歲歲有年。若夫外患與鎮夷共之。東二十五里至胭脂堡。

堡多引黑河之水以溉田。稻麥特多。為肅道之冠。故居人稠密。既庶且富。非酒泉之樂土耶。堡北至邊牆一里。舊設有防守官。今裁汰。

胭脂堡西夏所置胭脂城也。西接沙碗。東界九渠。南鄰黑水。北倚邊牆。其地饒以平。耕稼倉箱。遠資甘肅。與沙碗鎮夷互為雄長。然由沙井子大花山之分地。乃堡無戍兵。距鎮夷五十里而遙。一旦有警。夫何及焉。東至九渠二十里。則甘州境矣。

黑泉屬甘州。在南二十里。故曰鄰。邊牆在北一里。西寧莊浪皆至此。運米沙井子在邊外八十里。大花山在邊外一百二十里。可通瓦魯乃湖。及狼心山堡。

肅州邊堡自野麻灣而東至于胭脂堡依長城山濠凡十堡三百二十里其嘉峪則見于南肅州則入于中金塔則出于外皆不與焉

肅州近疆

自肅州東南按甘州界起遶而西折而東以至于甘州西北界止

石灰關在肅州東南清水堡東石灰關口之北為黃番分地關中則黑番居之黑番不若黃番之獷者非居中國為尤久耶

關在清水堡東一百里甘州紅崖堡西北四十里關本甘之高臺地而載于此者以其近于清水堡也今黑番小宛

卜族住牧

黃草塢在清水堡東鎮夷所南甘州高臺所西南也塢于榆林榆林甘志作茹霖非也乾草皆蓄水以灌田清水之人咸賴之昔築墩以候望黑番居此謂嘉峪關也昔維時守望焉

堡在清水堡東三十里、鎮夷所南一百五十里、昔為蛇眼
宛冲族住牧、今為黑番喃唔兒族所住牧、

討來川、在肅之南、祁連支山之北也、祁連支山從北藏之故川
水夾兩山之間、原發分水嶺而西流、經卯來泉分流入中國者、
肅謂之討來河也、川流殆千里、山水皆赴之、山石左右衝決、激
而成聲、怒浪如奔、人馬皆不能涉、川之崖畔、惟甘肅接壤間多
平地、介于紅崖草打班者、恒有牧羊秣馬之夷矣、

川水源流千里、夷所住牧也、在紅崖堡南一百里許、草打
班南三十里、清水堡東南一百六十里、夷阿賴清台吉住牧、
連魯川、在肅州南、草打班西、祁連支派不勝數、各山之水匯為
二川而西流、在山陰者為討來、山陽者為連魯、連魯遠在微水
川流遙遠、其遠不可得而稽、相傳草打班西夷之馬牧焉、而清

水有戒心矣。

川至肅州南山之南、源流甚遠、隔山甚多、計里無可考也。惟與草打班彼此往來、相傳夷人在其西一程、今夷力幹喀游牧。

卯來泉在肅之西南、腹裏有堡、有居民、黑番居堡外、有番僧為之長、自此而西、更無番族矣、蓋番皆依于中華、沿山而西、則塞外矣。

卯來泉在肅州東南七十里、黑番伯剌宛冲族住牧。

紅泉在卯來泉南、小崑崙山下、小崑崙土赤水濁、其嶺有張駿所築西王母廢祠、山南平地、水泉特美、泉以水色得名、其南有墩、中華之所候望也、水西流而北、夾岸坦夷、去肅之南山遠矣。

泉在肅之卯來泉南一百二十里、黑番在西域、母思之。

北去肅不知其幾千百里也。小崑崙在肅西南二百五十里。高出諸山。因以崑崙名之。後涼太守馬岌請于張駿立祠祀王母。今有遺址。墩在卯來泉南八十里。舊設墩軍。今裁。今索囊南占住牧。

扇馬城在肅州西嘉峪關外。回回墓在其東。赤金城在其西。固西域之大道。蕃族所居也。自棄三衛城。遂傾頽。乃築墩臺。嘉峪分兵候望焉。明制也。有二水貫城西流。夷往來必宿于此。今烏斯藏之爪牙據為營窟矣。

扇馬城俗稱扇馬營。在肅西二百三十里。嘉峪關西一百六十里。城東四十里有回回大塚。赤金衛在西八十里。舊為番族牙蘭部所居。自土魯番亂。牙蘭部內附。安插于金塔寺。為築城置戍。守瞭于扇馬城。今達賴喇嘛部落王建

兒綽力免合首氣于此住獵焉

赤金蒙古衛在肅州之西玉門舊縣之南春秋九姓之戎居之漢燉煌郡治置此唐置瓜州晉昌地產西瓜故也東有三棵樹西有苦峪城衛東有河水足草豐元丞相子居之明初傳有德兵至其地其後率衆來歸于馬置衛及土魯肆虐遂內徙而城荒今夷之金戈鐵馬雄于塞外矣

衛在肅州西三百一十里玉門舊縣南四十里自嘉峪而西至哈密皆漢燉煌郡地在赤金城焉晉唐為郡為州則衛從來為重地三棵樹在東五十里苦峪城在西一百七十里城東之河或謂之湖故俗亦稱赤金湖也洪武五年得明德追元岐王至瓜州元丞相子塔力泥于永樂二年率熟達男婦五百餘人來降乃築赤金城以居之以塔力

泥為指揮、苦來為都督、傳子旦、王失加貢獻不絕、成化二年、土魯番阿力侵之不己、相率內附、後入肅之南山、今黑番是也、衛今為西夷勞藏、滾卜、綽爾吉二部住牧

玉門縣故城在扇馬營西、赤金衛地、漢縣屬燉煌、光武開關卻貢不通西域、遷玉門於此、而置縣去玉門關七百里許、今其地鞠為茂草、已不知幾千百年矣、夷有游牧其地者、無定部落也

縣在扇馬城西八十里、赤金衛北四十里、晉高居誨使于闐記云、肅州渡河百里出天門關、又西北百餘里出玉門關、所謂玉門關者耶、此玉門舊縣也、此地但當稱玉門舊縣、不當稱玉門關、班超所稱愿生入者、遠出于西數百里去肅州方千里也、漢武帝通西域、自酒泉列亭障至玉門、光武中興西域車師等十八國、遣子入侍、請都護至再不

已帝謝絕之、乃移置玉門于此、即今之舊縣也、今舊縣夷人游牧者、部落無定、不但赤金衛夷而已也、

晉昌縣故城在赤金城、蒙古衛北、玉門舊縣之西、漢曰宜安、隋曰常樂、唐則曰晉昌、蓋以赤金蒙古為郡、此則為縣也、自茲以往無聞焉、棄為要荒久矣、

縣在赤金蒙古衛北一百三十里、玉門舊縣西八十里、唐以赤金蒙古衛為晉昌郡、此則縣也、今游牧甚多、無定部落、廣至縣故城、在肅州西南、瓜州之東、縣置于漢武時、宜禾都尉常居之、歷晉隋唐、不易其名、自宋以來、非中國版圖矣、明時番族居之、或曰即紫城兒耳、卜木耳加內徙、付之大漠也已、

縣漢武初置、在肅之西南、地有崑崙障、在縣東南、因小崑崙山而名也、卜木耳加紫城兒、番族之目也、夷人游牧無定、

坤都魯在肅州西北赤金蒙古衛東北其地不載于職方四面環山從谷口入有湖水清停黛蓄有嘉魚有榆楊大小參差中有枯朽者蓋數百年物也四境之外禽獸繁殖此天地生成之所而古今咸無得者邇來夷人居之矣

坤都魯在肅州七百餘里赤金蒙古衛東北五百餘里金塔寺西北六百餘里今罕頰無奈素定合首氣往牧棚代拜彥亦依于此

黑山在肅州北即紫塞也山在沙漠望之黝然故名東控鎮夷西俯鉢和酒泉之北屏焉今夷人逐水草而依山者何多也

山在肅州北一百八十里起于鎮夷所之北二十里赤金于大鉢和寺之東三里大鉢和寺屬邊外嘉峪關外八十里夷人之游牧無定焉

威魯城在肅州北金塔寺北討來之水至此為渠所以灌浸平疇也明置威魯衛肅北之鐵障步馬既而以功獲罪軍兵咸叛非誤于刀筆之吏與招撫定而民內遷乃徙羌以實之亡羊補牢當日籌之至計矣

威魯城在肅州東北二百三十里金塔寺北八十里鎮夷所西北一百五十里城有渠曰廣祿明所制也討來河水流其南自東西來則為天倉河矣明時夷犯衛地衛軍斬賊夷首上功請賞御史趙春以為殺降當抵死酷刑訊之羅織甚多于是衛之軍民皆譟反戈以叛單騎撫之乃定既而悉遷其民于內地衛軍乃能歸嘉靖二十七年重修其城安插瓜州頭目臨牙族住牧城今傾圮夷人頭力刻窟隆住牧於此

北大路在肅州之北平沙廣漠之地當元時諸夷之赴燕京者取道于此轍迹猶在路之所向水草俱足或謂霍去病出北地踰居延至祁連李陵從貳師取道轉戰皆出于此然無可考今夷游牧交錯其間未可一二數也

北大路非一定之地自肅而北相距可六百里大路連今夷人游牧部落無定

夷人住牧部落無定

威遠城在肅州東北鎮夷金塔之北城成于唐衛置于明當時軍民雜處及其間風疑畏遠竄曾述撫表猶存歸來烏有也

城在肅州東北三百八十里鎮夷所北二百五十里金塔北二百三十五里明時威遠失候秋表儀部繩轄抗二官以法二官恐乃流言云盡逐威遠之人女子入教坊于是

軍民盡反、逃于西域之魯迷、衣巾皆背服、以示反明民也、其地確磨牆基猶存、明所豎招降旗、猶峙立其上、云、城今夷人游牧無定部落、

毛目城、在鎮夷北、威遠屬地也、城中之人既竄魯迷、其地肥美、夷所以爭、此有明之所以設城、置燧、與

城在肅州鎮夷北一百五十里、游牧部落無定、

平朔城、在鎮夷北、毛目城東北、亦屬威遠、相率而逃、城小而堅、郭郭之間、教場最廣、居人壤址、隱然存焉、

城在鎮夷北二百五十里、在毛目城東北九十里、今夷人

游牧部落無定、

兀魯乃湖、在鎮夷北、甘州西北、湖水清淺、夏則涸焉、湖岸周圍、皆楊木、不千百步、則盡黃沙、豈湖水涸而沙揚乎、湖之南岸多

短草夷常聚此而後分寇諸邊焉。

湖在夷北五里。今夷人游牧部落無定。

遮魯障在肅州鎮夷之北。古長城也。起於居延澤畔。直達哈密北山。或以為築于漢。或以為築于元。皆未可知。世傳甘肅鑿出。門之要道障。今漂沒已多。不盡沒者亦有之。

遮魯障曲折遙遠。非一定之城。在肅州東北。可六百里。在鎮夷北。可四百里。史記漢武帝帝命強弩都尉路博德築遮魯障于居延澤上。一云元以居延澤為亦集乃。當時皆有居民旅肆。往來山丹之路。故築城以阻絕西夷。防其奪掠云。一說秦始皇所築則大謬。城起居延。經狼心山而西。直至哈密北山。且有墩臺遺蹤俱存。或曰酒泉張掖出兵西討。此謂要道云。考漢時四郡皆從今之塞外而入。及其

西討張掖酒泉出入之道每在居延之間史記漢書可考也。遮魯障雖不能確定其築于何時要之為出兵之路無疑。今夷游牧部落無定。

右肅州西南北三面邊之內外番夷壤地附肅州諸隘口合二十有九焉。

九九山口 西北至肅州一百五十里

黃草塢山口 西北至肅州一百七十里

榆林塢山口 西北至肅州一百六十里

乾塢山口 西北至肅州一百一十里

觀音山口 西北至肅州七十里

重岡硤 西北至肅州一百八十里

紅山口 西北至肅州七百餘里

寒水石山口 西北至肅州八十里

硫黃山口 東北至肅州五十里

文殊山口 東北至肅州四十里

黑山口 東南至肅州二百五十里

榆林泉山口 東南至肅州一百里

鹽溝口 東南至肅州七十里

臨水合河口 南至肅州四十五里

山口子 西南至肅州七十里

大口子 西至肅州六十里

紅口子 西南至肅州一百五十里

分水嶺口 東南至鎮夷二十五里

孫官兒口 南至鎮夷三十里

免兒關 南至鎮夷三十里

石圈兒溝 西至鎮夷一十里

乾柴溝口 西至鎮夷一十里

石堤溝口 西至鎮夷一十五里

牛頭溝口 西至鎮夷一十五里

黑山溝口 西至鎮夷一十五里

千人堤 西至鎮夷一百四十里

毛目頭墩口 西至鎮夷一百九十里

此肅州南北之要塞南面皆山最為險峻良可無慮西則長城之外石山天險惟北面地脈潮鹹既無遮堵亦無深濠邊堡之外彌望平川無山河之阻何地不可入豈但區區隘口之足慮哉且自嘉峪而北夷之部落尤多住牧者少游牧者多住牧者

可以防游牧者難于禦此肅州之所以可慮也

靖遠衛

靖遠衛有明之靖虜也。當周時屬西羌。及秦漢為內地。無所建置。秦以屬隴西。漢以屬金城。安定後漢以屬武威。西南二十里有烏蘭關。漢置祖厲縣。西魏始置會州。唐平李軌後仍為會州。于烏蘭關置烏蘭縣。宋于倚郭置施縣。明正德二年。總制三邊陳繼始奏置靖虜衛。衛城即會州舊址。明方伯戴弁所築。今易名靖遠。而民稱率仍明舊。非傳習文而難變與。衛東極慶夏。西接莊蘭。南界平鞏。北盡龍荒。

慶陽寧夏接壤于東。莊浪蘭州接壤于西。平涼鞏昌接壤于南。衛之北鄙皆沙漠之地。夷人所游牧。故曰龍荒。衛為固原西協所駐。故所隸在內地者曰平涼營。下馬關。關山。

營、西安州四處其他汎地、不可勝記。

所隸雖多、而守黃河之塞、當極北之邊、可按籍而稽焉。蘆塘在河西、接莊浪之長城外、安蘆溝在河東、距寧夏之邊、堵衛之重地、不在斯乎。

蘆塘營在衛西北二百二十里、在黃河之西、與莊浪之三眼堡相接、永安堡在衛北一百七十里、在黃河之東、蘆溝城在衛東北二百六十里、亦在黃河之東、與寧夏之中衛境地相接、永安不與中衛接壤、因皆屬邊地、故並及之耳。就衛城言、其地平行、四境環山、文武官司咸居于此、城小而堅、產菽麥僅足于食、俗勇悍善戰、水泉在其東、黃河流其北、虎豹阨于西、打刺赤衛其南、衛城蓋近塞之腹裏、以應援衛之北鄙者也。

衛土城周六里。城外平行。文有經厓。武有衛守備。又有西
協副戎在焉。水泉堡在東九十里。自衛至蘆塘蘆溝。必由
之地也。黃河在北二里。分流之一派也。虎豹口在西四十
里。打刺赤堡名。在南七十里。衛往平涼。必由打刺赤。趨紅
井子。南川堡。小河嶽。觀音店。瓦亭驛。此南面之通衛。而商
賈由平涼新城向甘涼之捷徑也。蘆溝城永安。哈思吉。蘆
塘在衛之東北。

衛為近塞之腹裏。何以近黃河。蓋黃河至衛之西。分六七派。踰
衛折而西北。乃合為一。其在于衛城者。分流之支派耳。故衛北
不盡于黃河也。謂之腹裏。非與。

衛之北。有永安。有哈思吉。有裴家營。衛之東北。有蘆溝。有
大湯渠。皆不渡黃河而至。蓋河無折故也。獨蘆塘則往來

必渡黃河、在衛之西北故也。循河有堰、唐刺史安敬忠所築、以捍河流、水向西北、衛始無淹沒之患、循河而至什字川、則蘭金縣交界矣。

衛為近塞之腹裏、何以建置衛、而且為國原西協之所駐乎、蓋衛之重地、莫過于北鄙、北鄙之河西有邊堵、故夷患有常、北鄙之河東止恃河、故侵凌莫測、苟非衛居中統馭、左右支持、則門戶危、而求堂與安不可得矣、衛非絕塞之重捍、北鄙之中堅乎、北鄙之河、西即蘆塘也、其長城東起索橋、西接三眼井、非無夷患、但有常耳、北鄙之河、東即哈思吉、永安、蘆溝、大溝、堤也、舊無邊堵、距河為界、黃河之北、往來收獵者無一定之夷、或淺水而過、無遠無近、靡不受其荼毒、甲寅年直犯衛城、一日夜乃去、衛兵閉城以守而已。

當有明之時。患在河套。故花馬池之烽燧傳。而後衛之戒嚴急。今河套暫且息肩。所憂者。乃在衛之北鄙。而北鄙莫甚于河東。河東曠達空虛。無可恃之險。衛之兵守。不可以分。援不可以及。向有議於黃河之北。築長城。東接中衛。西接蘆塘。即以為荒遠而難守矣。則黃河以南。創制以守。何容已耶。

有明中晚總制。駐寧夏之花馬池。所河套之夷也。故民人策固遠靖虜者。皆以花馬池為重地。今河套之夷。山旦王古祿王。皆內附食祿。故曰息肩也。河東。即哈思吉大勞堪是也。

所謂創制者。東起中衛之鎮關墩。西抵衛之哈思吉。二三十里。為一營寨。榆林寧夏之兵制。可倣也。因河為折。六七營寨而已足矣。倚河為隍。壘土為城。二百餘里而已足矣。且蘭州之麥。可

以順流中衛之稻、可以逆挽、又可募失業之民、順土地之宜、播菽麥之種、則可食足矣、此萬世之利也。

榆林寧夏凡三四十里、有堡寨、有墩台、有官兵、而衛北自明至今、獨無者、以舊日邊城、起于徐斌水、至于黃甫川也、不知此邊久已湮沒、且在黃河之南數百里、雖有不能闢隔、而況于無乎、衛之河東、自大勞壩以至哈思吉、纔二百里、四十里、則循牆曲折、不滿三百里、故曰六七營寨而已足也、蘭州河州、皆在黃河上流、其地產米。

且他郡邊外有一定之夷、一定之地、獨衛北夷游牧無常、其來其去、率然忽然、非無所關隔之故與。

衛北之夷、自祝囊台吉、勞藏台吉、克氣台吉外、有曰厄而得呢合、首氣台吉、有曰撥計台吉、有曰胡隆木石台吉、額各

慶台吉、有曰滿吉、太台吉、有曰渾篤魯台吉、有曰答裡麻
吳把什、有曰倒朗色楞台吉、有曰防禦台吉、有曰額力克
綽爾吉、有曰答力漢禱台吉、有曰桑嘎恩把台吉、有曰占
木素台吉、有曰把都兒台吉、其部落不勝計、而游牧無定數
或曰、固原之鎮、築于平涼、衛苟有警、可以相援、何北鄙之足患
耶、曰、夷騎之來、在于呼吸、夫平涼距衛且六百里、距北鄙且千
里而遙也、鞭策雖長、能及馬腹哉、則所謂創制者、何容已耶、
靖虜邊堡、

蘆塘營、莊浪三眼井東七十里、

索橋、蘆塘營東三十里、

哈思吉、索橋東三十里、

裴家營、哈思吉東三十里、

永安堡 裴家營東二十里

蘆溝城 永安堡東南七十里

大勞堤 蘆溝城東南七十里

靖虜邊堡

銀盤水 本衛北寧夏西南

長流水 在寧夏西南中衛之西

賀蘭山後 在寧夏城西六十里

靖虜邊堡

蘆塘營外環山而內平地北繞新邊而邊盡于河塹東限黃河而地盡于河西西接三眼井為莊園之交東達哈思吉即河東之地邊外之銀盤水長流水纏帳特多南則大松山即為內地故沙井雙井路皆相通則南向防寇北向防邊于是乎在矣東

踰山坡三十里則至于索橋

蘆塘轄於靖虜衛而靖虜又轄於固原故因稱之新邊起于涼之泗水堡止于索橋之河黃塘黃河在東南三十里渡河而東則非復河西矣三眼井屬莊浪在西四十里銀盤水杓兒塢水皆在此哈思吉在東南五十里大松山在南山口有堡曰永泰相距八十里沙井在東南三百餘里雙井在西南一百二十里大松山永泰沙井雙井皆在莊浪屬堡也堡有遊戎

索橋黃河之津處也名橋而實無之索橋夾岸查無居人新邊所築及河而止寒冬河凍夷沿河登岸如履平地且下流硤口河狹山高上下之冰解而狹口猶堅河東可慮常在于茲矣東二十里至恩吉

黃河獨蘭州有鎮遠連船施板車馬可通為河東西之大
道索橋不通鼓棹浮舟往來津渡而已莊浪甘肅而往河
東自鎮遠索橋外更無他途也橋非大道蓋寧夏固原往
河西之捷徑耳然西安商旅亦有不由蘭州往河西而取
道靖虜以渡索橋者路捷三日也硤口在津處下流五里
河東即東岸哈思吉一帶閘門在河壩數步舟子日渡費
一金于官其利可知渡河而東至哈思吉

哈思吉西北環山南通靖虜低城小堡有民無兵數里之外即
河一水之隔即夷乃上流自索橋東南至蘆溝以河隔閘不築
邊牆三冬冰合沿河諸地何以防焉東二十里至裴家營

靖虜衛在東南一百七十里城堡居民寥寥數家有防守
兵而無戍兵黃河在堡北五里築牆為邊直接莊浪甘肅

所謂新邊也。索橋南岸皆有河無邊，直抵于蘆溝城焉。裴家營民堡也，城纔數尺，土屋數間，東枕雪山，巉巖壁立，而山後即為永安，南抵水泉，山谷崎嶇，而道路直通靖虜，則堡亦喉吭之地也。南則靖虜，東循河，頃二十里至永安堡。

堡屋卑樸，寥寥數灶，隙地遂多，同于堡外焉。其四面皆山，無地可耕，居人伐木運水以取值，日不再食。雪山者，冬常積雪，故名。雪山其山東面，特多松木，在堡一里。水泉堡在南六十里，靖虜衛在南一百五十里，西起蘆塘，東至蘆溝，往來靖虜衛必經此堡。黃河在堡北一十里，河外即夷堡，無邊牆，故為衝要。

永安堡背山面河，土寒地濕，居人苦之。米粟全無，故按籍之兵常少，至于冰合防夷，較之他堡尤甚。山有喬松，可以設疑兵，阻

馳突樵採宜為厲禁、自堡而東南則亂骨堆荒山滿目、難犬無聞、由此而東南九十里至蘆溝城、

雪山在堡西、故曰背山、黃河在堡北、故曰面河、華夷之界、特峙一河隔之、夷不止祝纛、台吉潛藏、克氣之都落已耳、夷凡牧于河西者、與堡呼應相通、毛髮可見、至于冰結、則又甚焉、喬松即雪山所產、凡靖屬需木、皆取諸此、亂骨堆荒涼之地、而永安蘆溝之通衢也、在東南五十里、堡有守備、蘆溝城在荒坡之間、土屋土城、兵民無幾、蓋靖虜中衛相往來止宿之郵亭耳、城之置、古無可考、黃河在北、既無高崖深谷、且無高城深塹、故河北之夷與昔迥異、張解設難、但計所費、不圖其安、營平之所扼腕焉、東南七十里、由烟墩溝而至大勞堪矣、靖虜中衛之往來、必止宿于此者、東西四十里、皆無居民、

也有明夷惠咸在中衛寧夏也西東蓋寧夏之東為河套中衛之北為賀蘭夷皆不取道蘆溝以為無用不屑道也今河套久已臣服賀蘭山後之祝囊等亦不輕舉寧夏中衛之守較之靖虜堡為彼善于此故蘆溝而西一帶夷目特多游牧無定且河塹無邊出沒甚便蘆溝向為空虛散地今則可虞時移而世變也黃河在此計里無可考中衛邊牆直抵蘆溝界而蘆溝以西直至哈恩吉則絕無邊牆矣烟墩溝在東南四十里其地有居人約數十家夾溝而居土室卑陋荒涼之甚蘆溝中衛往來所必由之地城有守備

大勝堪寧靖之交也居人僅三五家無城堡故地志皆不載陶穴蕭條與烟墩無大異四境岡陵北抵黃河東環邊堵則設防

築以通寧靖之呼吸勢所不容已者况乎北山後之夷安知竊發之不由此耶東南由老虎溝五十里至中衛之常家寨

大滂渠從無城堡東寧夏之中衛一百二十里西至靖虜衛三百四十里邊堵即中衛之長城也河北之夷其目甚多詳靖虜衛中山後即賀蘭山之後也昔祝囊等住牧于此老虎溝在東南三十里焉

靖虜衛邊堡自蘆塘而東至於大滂渠或城或河以為疆界凡七所三百里

寧夏衛

雍正初年改衛為府附寧夏府二縣靈州中衛平羅寶靈新渠五州縣屬焉

寧夏古朔方郡洪武二十六年七月置寧夏衛調甘州左護衛將士守之其北則左控河套石引沙漠其南則左連延慶右接固靖此三秦之被兩河之唇也

寧夏城東北至河套一百二十里西北至沙漠九十里南至慶陽界三百六十里東南至延安界三百五十里西南至靖虜界四百里西由邊外在莊花界四百里莊湟涼甘肅在黃河外者皆曰河西其在河內者皆曰河東此全秦之河東西也

黃河中流鹽池惟北列河西以賀蘭為隘河東以長城為疆其東北之河套則周秦之河南地漢之定襄郡唐之六郡張仁愿且踰河築三受降城減內地戍兵數萬歷代疆域固如彼而今縮

地千里者河套屬之旗蒙而長城所以北築也

黃河繞蘭因順流而下貫寧夏之中直趨河套而出
口中流所以寧夏一府有河東西之河套在北之東西是
在北之西東西以河為界皆在寧夏北故曰北列河西東
者寧夏之河東西也河西賀蘭環之山外即夷河東築長
城塙外即河套賀蘭山延亘五百餘里高者積雪不消河
套三面皆阻黃河河南面切近內地寧夏之東北榆林
之北偏頭關之西則為朔方地秦塞固河為南河地地唐
有六州在今套內武后之時築三受降城於河套之北史
謂歲者億萬計減戍兵數萬不知者謂其置烽燧千八百
所所須萬人不知三城之屯四萬人足矣烽燧之卒每所
二三人而止合而計之不必萬人此即四萬中之數受降

城守則河套以及沿邊數千里可以減戍內地可以不防
何嘗數萬耶史所云者計供毛輓運約言之耳明失東勝
而也先毛里孩吉囊漸據之築室樹藝遂為固有長城楊
一清史修余子俊所築也築四十里為劉瑾罷去

寧夏有豐年而無旱潦所以有塞北江南之號

自漢唐以來引黃河灌田可蓄可洩故恒言黃河為富于
汴梁獨利于寧夏遷五方之人而江左尤多故衣冠言語
類于三吳自蕭閑來者始見林木茂美風景頗殊有土遠
乃元之部落謂之降夷散處靈州瓦渠金積四堡強壯者
皆之為兵

靈武之興肅宗以復兩京而有餘元昊割據以韓范經營之而
不足其為重地概可知矣故中國有之足以禦外夷外夷有之

可以擾中國主父偃所策特其小小焉耳

唐名是為靈武節南宗即位于此元昊累世為寧夏節度
僧號不臣韓琦范仲淹為經畧不能平之主父偃言于漢
武帝曰朔方地肥阻黃河案牘李之以通輯連廣中國也
曰然則如之何曰有郭子儀而後軍始振有張仁愿而後築三
城非然者寧夏之門安能禁夷騎之不入乎若格克隱占酷虐
聚斂者則外侵內叛禍尤烈焉

明起撫黨聲以滅自憤戴花市飛語為悍卒對東陽所殺
與吟拜誘走助逆泰將許汝繼以用法嚴為土達楊文過
所殺靈州大亂

況今日賀蘭之夷已滿數千有虎噬之心有方張之勢而且發
縱有人復雄恣機山後未敢憑陵過計者咸謂發速禍小發遲禍

大天祚寧夏幸而斯言之不中乎

賀蘭之夷視衆勞戰已綽克克等部落三千餘發縱者
噶尔旦部落三十餘萬自綽碩克圖汗特角之夷綽力庫
合首氣台吉王建兒台吉薩順支力幹黃台吉等山後即
賀蘭山之後也

今之賀蘭山後干柵不設賀蘭天險即與夷共之矣自中衛以
至平虜阮塞之地五十有奇奈何整壘猶為焉有耶

賀蘭山後自中衛起直挂大山根止原有連牆拒夷于外
今墻廢不修聽其上下平虜今改平羅

賀蘭自固人盡知之河套當守人每忽焉夫河套昔於我為仇
今於我為民所謂輔車相依者也西夷侵之求援得援是矣然
乞之以師孰若資之以力是宜于履冰道路築城障移彼之味

居於沿河足以游牧自守誠善後之計一勞而永逸者也

明時裨漢吉囊等駐河套時為後患綿延至今封山旦王古祿王及公貝子等部落數萬今之調遣徵發皆此輩也西夷即視囊凡西夷自漢人外皆蔑視之故視囊特附噶爾旦亦以奴隸待河套欲併山旦古祿之衆河套沿河二千里全禁良難但於堅永可通行者築之則成功甚易況今河套之夷為自守之計宜共聽從惟命惟禁板之地須指示資助而已

雖然河套渝盟不幾藉之兵而責之重乎曰城以禦外非以捍內也明欲城之而不能豈能之而不城乎設河東之重險復漢唐之舊疆在此舉矣

河套議復言者克積公車李賢王越揚一清曹鏡璣周尚

此字似因字
作創始者
明耳

文等尤切寔用所不欲復者乘高年耳

雖然熙河可下興州豈寧夏不可復河套乎曰黃河之水浮于積石至于龍門唐治舟師溯流上下明之臨鞏巨礮遠至舟方寧夏雄師直抵河套皆已事也攻守機宜固在於茲然守之于先為其所易爭之于後為其所難設使河套方能守之創幾之餘既為併吞豈能攻之于朶熾之際若果如是是猶厚積薪于曲突而剗肉養虎以俟其猛張空拳以縛之也

熙河即今之臨洮河也興州即今之寧夏元吳祖居河套屬興州地積石河州之積石關也龍門在韓城縣東北六十里唐高祖時將作大臣于筠請于五原靈武置舟師於河溫彥博曰龍為長壘過夷人今可用帝乃使桑維和整造大道石紅而絕工大發卒治戰艦明臨鞏監司劉光裕

以船筏載，滅屠焉。珠玑位樂，錄之類。至靈州，以資攻叛。逆此上流而至者，李文發曰：士卒三千人，由夏來船，直出河套，獲賊凱旋。又隊長任勇，自寧夏鼓棹，直抵偏關。此自朔方順流而下者。商市莊浪山水順流而下，日行二百里。許、夏之宮室，廨署皆資之。又自上流而至，可謂通行河道。但自蘭會北流，兩岸多崇崖峭壁，河狹而水急耳。宋祁怒，表乞下熙河路，船五百艘，于黃順流，直取興州。李復謂黃河過會州，入常勝山，石峽阻狹，自上垂流直下，高數十丈，船豈能通。西安州起東，分為六七道，水淺灘磧，不勝載舟。此聲若出，必為夏所侮。笑云：故祁怒之謀遂寢。

寧夏邊堡

常家寨，靖遠大灣，與東南五十里。

古水井堡 常家寨東北六十里

中衛 古水井北三十里

鎮虜堡 安東四十里

石空寺堡 石空寺北二十里

秦園堡 石空寺北四十里

渠口堡 秦園堡東四十里

廣武營 渠口東北三十里

大渠堡 廣武營北三十里

玉泉營 大渠西北四十里

平羌堡 玉泉營北六十里

鎮北堡 平羌堡北五十里

寧夏鎮 鎮北東北四十里

洪廟營

鎮北堡北五十里 寧夏西四十里

鎮朔堡

洪廟營北三十里

威鎮堡

鎮朔堡北四十里

平虜城

威鎮堡東三十里

橫城堡

平虜城東南六十里

紅山堡

橫城堡南十里

清水堡

紅山堡東南五十里

興武營

清水堡東南二十里

安定堡

興武營東六十里

花馬池

安定堡東南六十里

寧夏近疆

長流水

寧夏西南中衛之西

賀蘭山後寧夏之西

河套

賀蘭之東

寧夏邊堡

常家寨、寧靖之交衝也。邊城內衛，黃河外環。北雖隣夷，恃此不恐。寨固內地而近長邊，山環四面，寨築其中。永康宣扣之間，米粟轉餉，居然樂郊矣。然寨為民堡而駐防不立，東向孔道，則有常樂堡。若夫沿邊東北，則有古水井矣。

自靖虜之大勝渠，至北皆言邊城者，中衛達城西至蘆溝，渠三百一十餘里也。永康宣扣二堡皆在堡之東南，其地饒產稻麥，寨屬民堡，本無汛兵，東至常樂堡四十餘里。

古水井堡，曠遠衝之地也。南有常樂，北有長城，東則黃河，西則曠野，邊堵年久化為女牆。黃河冬寒不成衣帶，山後之夷已

難于防乃所守之北二百里而遙雖中衛近在河西而河津在於常樂道阻且長呼吸莫應則常樂常家寨之間宜設為犄角焉南至常樂渡河而北三十里則中衛矣

長城起于山之山外黃河而西循牆直至蘆溝界又無邊堡今之校近常家寨大勝堪皆往來大路非補牆也賀蘭山後昔住牧之夷曰視囊勞藏兒氣三台吉古水分守之遠二百一十九里寧夏西路之河東至古水有兵防守中衛與堡相距一河然必由黃沙古渡而渡是折而南至于常樂復折而北至于中衛相距且三十里矣南至常樂堡十五里由常樂至黃沙古渡又十里堡有守備

中衛元之應理州明寧夏之中衛也衛在河南故九曲南繞邊從河起故百堵西環連寧夏而通莊固交衛要地莫重於茲其

民勇幹其資耕獵渠通美利土盡膏腴兵食足矣北之夷厥猶在乎山後長蛇封豕雖相互市存食之心且數馬齒之加長也衛之境外北有黑山嘯魏晉山夷所游牧西南有黃沙坡長流水也夷之外頭扒里扒沙夷之捷徑今之中衛苟能自守足矣何暇及分疆之外哉其近若蒲湖水塘溝五眼防井之不可已者循牆而北則空夷柔遠迤邐而東四十里則鎮魯堡焉

省州各衛皆沒前後左右中等衛沿革紛紜獨寧夏之中衛至今始改爲黃河南五里長邊在西十五里邊起河口迤邐而北直至大山根而止長三百一十里環山于內險固戢戢也今邊牆不修墩臺不守夷騎出入賀蘭之險與夷共之沿山皆然是寧夏在外北三百六十里因原在西南莊浪界由邊至銀鹽水總三百二十里美利渠名引黃

河以溉田也。夷廠在控夷堡邊北。明所觀也。賀蘭山從夷人視囊等住牧。其部落甚多。散處銀鹽水長流水一帶。觀魯山在北五十里。黃沙坡在邊外西南十里。長流水在黃沙坡西九十里。為靖寧境外之接界也。扒里扒沙即大沙子山。其山在涼莊靖寧之交。非今之大靖。但名扒沙也。蒲湖在賀蘭山後。有明王越于此大勝。水塘溝有明時夷由由此出入。大破之。五眼井。明將馬監於此。敗夷人論卜等。衛有副戎。北至控夷堡六十里。東北至柔遠堡七十里。鎮魯堡今別為鎮羅矣。平行臨河耕稼之沃也。然米粟之多尚遜河東也。迤東二十里則為勝金關。

堡今作鎮羅。而民間相傳。但知為鎮魯也。北通柔遠。南臨黃河。黃河渠水灌田。故為沃野。河東有古水。常樂。永康。宣

和寧安、威武、張恩、紅寺、高沙州等堡，俱係饒野產稻最佳，堡有千總。

勝金關、山河之通、一線之通，蓋中衛寧夏之鎖鑰也。迤而東北三十里，則石空寺堡。

開築于弘治六年，人謂其勝于金城，故名。南臨黃河，北倚高山，中衛寧夏往來大路也。迤東為張義堡，東北則石空寺矣。

石空寺堡，其北則石空山，南近黃河堡，小而兵多者，一以為山後之恃，一以為勝金之守也。其缸子渠造資溝，注耳謂能限夷馬，不敢謂然矣。東北四十里為寒園堡。

山後普祝觀等住牧，距勝金關雖遠，亦足為守望之聲援。缸子口即石空渠口，然而腹寬灌田畝甚廣，堡有守備。

棗園堡其渠源遠而流長其灘地而草茂其隘則觀音口為堡分地東四十里為渠口堡

渠即棗園渠源即廣武草灘觀音口在西北乃棗園分守之地堡有紀總

渠口古墩名也堡築于明中為唐來諸渠而其南有青銅硤西山相夾黃河經其中昔于硤築唐來漢延渠引水灌田故朔方之地嬌美江南渠之力也東北三十里則廣武營

萬曆四十年始築堡唐來渠在漢延上流數里衛刀雍所築者青銅硤在渠中南硤東北至寧夏一百四十里山名金積山上有牛首寺下有深林茂木漢延渠在唐來渠下流數里虞詡所築者寧夏之福安豐登無亢陽之患皆漢延唐來二渠之利世所謂黃河為害于汴渠獨利于寧夏

者此也。黃河自中衛至黃沙古渡而下，狂瀾安流，環所帶郭，隨地決土，以溉田畝，亦異矣。渠口無防汎，蓋內地也。

廣武營，寧夏之西路營也。黃河流于東南，賀蘭峙于西北，分地既廣，山口良多，西河之衝要，從來夷患在于茲。若今山後之夷，尤為包藏禍心，云內則渠口秦園諸堡之衝，外則井溝大佛寺之防，又北三十里，則大渠堡矣。

黃河在東南，渝河五里即靈州也。賀蘭在西北三十里，山口多者營之分守，西至中衛界山後起，北至玉泉營界山後止，總一百三十里。山後之夷，即祝囊等，渠口秦園、營之屬堡，有明時夷犯廣武，總兵蕭汝薰敗之于井溝，大佛寺口，營之衝要，出入賀蘭之夷所必由也。營為寧夏西路有遊戎。

大壩堡、吞唐來水也、其勢奔下、俯臨城邑、若毀堤、則寧夏成澤國、此內患之當防者也、今防之口有五、最要莫如靈武、此外海之宜防者也、況從此而至鎮朔、有山險而無亭障、則隘口宜何如慎重耶、大道在北、有小壩、直通寧夏沿邊四十里、則西北至玉泉營焉、

唐來渠、黃河之水也、流至大堤、淺者及膝、深者不可測、若毀堤縱水、隨所欲、築堤向之、無不淹沒、蓋寧夏皆在下流也、分防五口、曰雙山北、曰雙山南、曰靈武口、曰林泉口、曰哈喇水、皆大山口、小者不與焉、靈武口名、非肅宗即位之靈武、肅宗即位之靈武、在今慶陽府環縣、亦非寧夏之靈州也、靈武小口、有沙羅模山、多水、可屯兵、有明沐英于此擒夷人、饒阻脫、大赤處也、大路北二十里至小堤、又四

十里至葉昇堡、又三十里至王洪堡、又六十里至寧夏馬堡、有守備。

玉泉營、寧夏之南路營也。黃河東流、賀蘭西峙、多汎地而無邊城、營之分守、有赤水關、百馬並驅、莫之或阻、蓋賀蘭山勢至此散漫、而泉少樂多、難于版築、且低舉仄徑、可通行者、不勝築焉。有明石砌關牆、塹斷崖谷、其跡徒存耳。他若金塔磨石、雖大異于赤水伏、不可以其隘也而忽之。況金塔今之通衢乎。又北六十里、則平羌堡矣。

黃河在東、至十里賀蘭山、在西三十五里、營之分守、汎地南至廣武界起、北至打磴口止、共二百一十里、赤水關、明巡撫楊守禮修築、得土壤故處、因山有圍石、可以作砌、皆斧鑿工、經營成之、金塔口在西五十里、磨石赤山口名金

塔出口、通欽鹽水、抵莊浪之下、紅水所謂通衛蓋塞外之路也、營為寧夏之西路營、設遊戎一員焉、

平羌堡、山城土屋、切近賀蘭、而獨樹乾溝為堡分地、非玉泉策應、何以堪之、然守險非難、兵寡為難也、東北則寧夏沿邊而北五十里、則鎮北堡矣、

獨樹口、乾溝口、俱在堡西堡所分防之地也、堡屬于玉泉、故策額之堡有把總、東北至寧夏四十里、寧夏鎮非邊堡也、而與平羌為近、以其為鎮、不可不義之、故次之于平羌、其實平羌直接鎮之北也、

寧夏鎮東繞黃河、西聳賀蘭、金城天府、西塞雄疆也、城堅不可攻、民強可以戰、徼之往事皆然矣、雖賀蘭之口約四十處、夷不可源源而來乎、灌城之攻已至于莽水、不可以亾人國乎、冬寒

冰結則濁水洪濤化為平壤矣。明李賊據秦中破榆林遂趨寧夏不聞有一人援得鼓而前為國立功豈不貽羞于榆林哉。今城郭之中華夷雜踏走險偵探審或有之則防之宜何如預也。渡河而東則臨河堡為寧夏官津即史鑪奪舟處也沿河北下三里是為橫城乃河套之咽喉由橫城假道馬鞍山直達紅山堡榆林之康衢曠如也。寧夏在腹裡若邊堡連屬則寧夏不與焉。

鎮漢為朔方郡唐為夏州朔方郡又為靈州靈武郡唐末為李氏所有延及宋代元昊帝制自為國號夏與宋相終始明初為寧夏府後改為衛後封慶府存焉黃河在東三十里賀蘭山在西六十里城三丈六尺厚二丈明初邊衛氏于長安而徙五方之民以實之江南之民尤多萬歷間李拜之子據以叛官民攻之七閱月內應獻城始平賀蘭

舉倚為固其山口大者三十有七小者十許處城濶一見
十魏之攻曹兗城不獲者四尺再見於明之攻呼承恩水
不浸者八尺冬寒冰結者黃河上流之口在中衛下流之
口在橫城河凍皆如平地也明季李國既陷榆林衛而寧
夏遂降榆林李國桑梓攻圍猶血戰數日城陷巷戰而死
者七十餘人衛文有監司經歷武有城守都司又有總戎
五營全設衛東三十里流黃河有臨河堡又三十里即紅
山堡有明時實儲之資靈河參將史鑑奪渡黃河船賊乃
不得渡河實儲本慶藩宗人窺伺神器也衛西北至洪廣
營六十里衛至鎮北堡四十里

鎮北堡東抵寧夏北連洪廣堡小而近山地闊而兵少滾鍾山
口宿兗山口大有可虞今之兵制大非明北山後之出入誰與

守哉北五十里則洪廣營焉

寧夏在東四十里賀蘭山在西十五里平羌堡在南五十里堡隸于洪廣營滾中口宿克口在西五里堡所分隘者也。有明兵制堡軍一百六十名馬七十九匹今僅設把總而已堡之數口曰黃硤外口曰宿克口曰石閘曰高渠曰宿墩曰黃硤曰敵台曰乾渠曰鎮靖曰下古曰馬防統十有一墩也

洪廣營寧夏之北路營也賀蘭在其西平洪當其北屬堡環于邊五路山口之多無踰北路夷之近亦無踰北路堅壁于中游防于外可一日急耶近北三十里有鎮朔堡焉

賀蘭在西三十里平虜城在北六十里屬堡有九曰鎮北曰楊信曰豐登曰徐龍曰虞祥曰桂文曰常信曰高榮曰

鎮朔也。汎地南接玉泉營起，界北至平房西側門止，邊城南至自滾鍾口起，沿山北至紅兒口止，總計二百十里。山口有七十里，滾鍾、黃硤、水吉、鎮北、宿兔、拜寺、賀蘭、新關、塔硤、西番、大水、小水、汝箕、大風、小風、歸德、桃棠也。祝囊等三大部落，皆在山後，故曰近，為寧夏北路營，設遊戎一員。

鎮朔堡，賀蘭之麓所環抱也。山口既多，士馬甚少，恃洪廣為援耳。稽之明制，倍蓰其防，蓋賀蘭口外，或出以調夷情，六盤山前，或登以偵動靜。今鹽池、迤邐、陳迹荒涼，避暑遺宮，登臨如昔。西北有賀蘭口，沙漠河套，無不可通，北四十里為威鎮堡。

山口有黃硤、水吉、宿兔、拜寺、賀蘭、新關、塔硤、西番、大水、小水、汝箕、大風、小風、歸德、桃棠，十有五隘口。雖屬洪廣，饒防實為本堡汎地。明制兵二百名，馬一百匹。賀蘭口在西二

十里、自賀蘭口出、往五岔河、探松山、潘夷動靜、其時莊浪
木、無新造、此明制也、六盤頂有元昊避暑宮、遺址尚存、黑
盤池在黃峽口外、有明時于此新殺夷人、無算、拜寺口去
黃峽口五十里、黃峽口去賀蘭口五十里、賀蘭口今設把
總、口外東七十里為袁家山、又東五十里即河套界、堡有
把總

威鎮堡、逼近長城、夏人謂之北長城也、北長城西起賀蘭、東起
河壩、北面套衝、南盡河漢、明有套患、夏秋則浮渡偵謀、水則合
距河防邊、今之患不在河套而在賀蘭、打磴諸口堡、于鎮朔平
虜共之、山城非險、捍禦為險、况長城廢而不修者乎、折而東三
十里、則平虜矣、

長城西南、自紅口兒起、沿山而東、歷寧朔墩、又自北山接、

黃河壘循河而南至鎮河堡止山北長城之大概非堡水
所專防也河套地西近寧夏東至山西偏頭關北界受降
城北三面皆阻黃河也自明正德間為夷所據乃于南面
隔以邊牆寧夏河東榆林北面皆守邊牆者也堡之邊牆
皆防賀蘭山後之夷亦防河套之夷渡水而至今惟嚴祝
臺等耳堡有北砲

平虜城今作平羅城或作營寧夏之北門鎖鑰也東連河套西
距賀蘭北禦沙漠三面兵險長城塞河山之缺夷服當關門之
間隘口值土城之斷陸路之界宜嚴也河黃北流夷能溯水戰
艦之兵必設也朔方之堡當夷鋒者平虜獨甚昔呼承恩之叛
河西皆陷獨平虜嬰城固守賊乃南不敢渡河北不得走夷皆
平虜之阨其前而議其後也城西北之將台地勢平曠可為戰

場可以練兵雖非險要不可棄也城北之鎮遠關山河之交天設之險平虜之扃鍵也打磴水患乃棄而不修故乾閑來兒溝桃坂夷騎颺至莫之禦焉為關南之黑山賀蘭之尾形如虎踞扼隘飲河舊制黑山營倉儲皆備鎮遠之兵所屯也鉤缺卒逃廢而不復故沿河沿山訂乎內地及議築北門三年不成臨山設堡未幾而廢故平虜墻垣至今單薄也王瓊亦城平虜而棄鎮遠黑水不幾失乎天險耶自城截河而南東至寧河台六十里是為橫城也

寧夏五路獨北路兵多有平虜叅將又有洪廣遊擊城東十五里渡河又五里即河套西六十里即賀蘭山北几十里即鎮遠關今為沙漠地夷廠在東南二關門外明撫夷人土氣把都兒今廢隘口即打磴三關口夷常據以為巢

數千、平虜、有明時套夷常河渡為患、巡撫張大魁于平虜、
以北多設戰艦、夷始寢謀、平虜當明時最多夷患、一勝于
平叛墩、一勝于架砲梁、一勝于水塘墩、一勝于沙竹梁、一
勝于沙山老灣、一勝于峰窩山、其不可考者尚多、字承
恩三攻平虜、參將黃汝薰三却之、寧夏之復、汝薰之功也、
古勝台、俗傳狄青練兵處、不知宋時寧夏為夏所都、狄青
安得至此、鎮遠關在北九十里、打磴口在西北四十里、弘
治間不守、鎮遠關水遂冲塌、黑山在北八十里、其兵西守
打磴、東守鎮遠者也、嘉靖十年、總制王瓊、廢鎮遠關、而城
平虜、已棄地百餘里矣、北門關在北四十里、正德間、有議
于王圪口、起白沙河、西抵來兒溝、設險、內牆外塹、約三十
五里、或以其西斥鹵難築、不足為有、無云、有明于平虜北

十里、展築邊牆、牆之盡處、設臨水堡、而臨山極北、不毛、若雞^野守、尋廢為墩台、今則墩台且無守者、寧河台在黃河之東、津吏蝦^車皆在焉、城為寧夏北路、城有泰將焉、

橫城堡、河東所自始、長城之馬頭、河套之津口也、自堡東統九城、亘四百里、直接於此、徐廷璋王瓊所設施者、堡之、以北長城西盡河堰、水漲則土墻皆傾、水落則平地盡出、非驅石築城、猶無邊圉也、邊圉初築、起於黃河嘴、草茂之地、悉築中、王瓊縮邊、橫城美地、棄之于外、瓊能議余子俊之非、而目乃不自見其蹇哉、今之河套、可謂積弱、然西夷為隣、常懷吞併、故橫城之北、戌甫戍申、非守河套、為河套守、蓋亦勞矣、若長城風沙、易于墜塞、北邊皆然也、迤東南二十里、踰馬鞍山、為紅山堡、

明成化間、巡撫徐廷璋築長城、起黃河嘴、至花馬池止焉、

三百九十里。凡水草便利處皆築之于內。使夷馳牧沙磧之地。築之于外。使夷不虞。乃屢改築新邊。起于橫城。又失築邊初意矣。屢議余于使城榆林曰。失策。正在于此。是明于議人。暗于議己也。今河套之夷。近寧夏者曰山旦王。曰阿爾墩素。近榆林者曰古祿王。俱奉調遣。亦處賜之康祿。所謂家古是也。西夷即視囊等。住牧賀蘭山後。與套隔河。幾二百餘里。常欲併山旦等部落。故河套畏之如虎。今套中當冰凍時。恐力不足。乞寧夏官兵助守。其積弱如此。積城在官津下流三里許。堡有守備。

紅山堡。極衝要害之地也。城若彈丸。兵尤寡弱。又南五十里至清水堡。

堡城周一里。有把總。南至臨河堡三十里。則寧夏之大路也。

清水堡城不寬而夷廠在其北明于此撫套夷今互市之地設官分職以蒞其間套馬騫疫惡用是蹇劣為哉或以互市宜置橫城尤為非策蓋橫為寧夏轉輓之咽喉不可信夷之果草心也

明制營屬石司設守備兵六百馬一百六十今套中之互市不及西寧之多也榆林之紅山蓋鹽鉄皆套中所有鹽池在套內產鉄在麥梁也米麥雖禁民皆以此交易夷無他物止有馬耳其馬非老即疲常以易易猶不屑焉其驚可知寧夏靈州之乾粟切近橫城橫城置市既有意外恐其中梗矣當有把總西南至毛卜喇堡四十里又有興武營共七十里

興武營寧夏之中路營也寧靈重地平慶要路北列長城南連

山麓野無青草田不畱舍元昊離宮于此是遵何說與其地沙土相半剝落邊牆不堪保障所恃濬濠以為重險耳閤門啟閉蘭石渠谷殆不可無雖河套帖服不可不防他盜明之揀漢可鑒己驪灘詹家灘昔皆有脩無患可不務乎迤東南永清堡六十里則至安定堡

寧夏在西北靈州在西南平涼在西慶陽在南河套當明時常防瓦剌侵之及明季揀漢入套套夷大受其患多內附以求援既而揀漢數侵內地邊兵莫當其鋒此昔之他盜也今西夷視囊等虎噬河套欲肆東封形于秦諸此今之地盜也有明時夷寇興武遊擊談世德敗之于詹家灘又聚眾入寇總兵吳昇敗之于驪灘營為寧夏中路有遊戎寨至永清堡十里又東三十里至安定堡

安定堡地勢同于興武而城外之飛沙特多及效雲中築臺兵不勝而守自固北面長城安得參錯如若人哉城黑子同而閘門出入可不防耶東南至高平三十里至花馬池

明巡撫黃家善見堡多沙乃效雲中臺式于沙科跨牆以
碑石易其台敵台者四台上有亭可以遠望可以禦敵名
曰敵臺堡城周二里故曰黑子閘門在北外即河套堡有
守備

花馬池城古鹽州寧夏之東路營也平固門戶環慶襟喉定邊羽翼不但榆林之接壤寧夏之邊衝而已其地勢之漫衍彌望平川而四通八達有明之總制常駐于此為其重地與他營千萬焉舊花馬池在塞外故道所環甚寬自王瓊改築今城而達城亦縮城外楊柳廢堡為花馬池之患瓊寔貽之北有長城閘

開門外通、飛樓連眺、可謂重險、關外遠探延綏、近防邊患、可謂
索情、南有鉄柱泉、自邊外入、獨此有水、往者夷患、犯此最多、自
築城環水其中、又築梁家泉等堡、重關疊險、而隣境皆安、仁人
之利、不亦溥哉、自城而東南三十里、則榆林之鹽場堡矣、

平涼固原、皆在西平固、以其城為大門、慶陽環州在南二
百八十里、定邊營為延綏、在東南七十里、舊花馬池、今在
套中、故邊、咸化間、余子俊所築、今城新邊、皆嘉靖間王墾
所築、新政二城皆守、則如雲中大邊小邊之設、藩籬益嚴
矣、乃撤舊邊而專守新邊、已為失策、而邊外楊柳堡、連廢
矣、乃潛伏其中、為城之患、長城間在城北六十步、關外有
那各井、可可腦兒、明制、更番夜役、據聽延綏地套內邊警、
鉄柱泉在城西南九十里、泉廣數百步、可飲萬馬、夷由定

邊之于溝、刺崖而入。數百步地止有此泉。從此飲馬。或清
一、硯池。安定會寧全縣。或散掠寧夏。或長驅平涼、鞏昌間。
止德中。總制劉天河築城。周四里。環泉于中。使夷絕飲。因
石鐵柱泉。又于鐵柱之南百里。至東西為墻。墻于梁家泉。
築堡于甜水、紅柳、榆樹等泉。築墻于史把都、韓家長流等
水泉。俱據守之。于是夷進為新邊所扼。退為大邊所邀。每
失利。則是近寧夏地皆無夷矣。城為寧夏之東路城。有副戎。
寧夏邊堡。自常家寨而東。至于花馬池。長城之缺。則山險焉。凡
二十有三堡。九百一十里。其寧夏衛為內地。不與焉。

寧夏近疆

寧夏之西。直接涼州界。起以至于東。直接河套界止。

銀盤水在靖虜衛北。寧夏西南。塞北百里間。有杯杓之水。必爭
就之。况營盤水之掘地及泉者乎。且其地有高山。望遠則百里。

在目中、山陰有長林豐草、于茲牧馬、不數夕而肥、宜乎夷之住牧矣、

銀盤水在莊浪之下、紅水東北一百六十里、靖廣街蘆塘營北七十里、寧夏之山、風口西二百二十里、今夷人祝囊勞藏克氣三部落住牧、

長流水、在寧夏西南、中衛之西、水源發于賀蘭之支山、南流入黃河、水源遠故逶迤曲折、或合或分、至此歸一道焉、且可褰裳而涉、惟盛夏則深、蓋賀蘭之雪渙也、兩岸漫延、可望見數十里焉、夷不就牧、烏乎牧哉、

長流水、在中衛西一百七十里、一說在鎮夷關北、未知孰是、今夷人祝囊勞藏克氣三部落住牧、

賀蘭山後、在寧夏之西、漢為保靖縣地、東連河套、西通西域、南

障朔方北引沙漠延長五百里高山雲表雪霜凝積盛夏而後
溶其林木青白望之如駿馬夷呼馬為賀蘭因以名山山巔梵
剎百許元昊有避暑宮化為頽墻墮壙久矣明西平侯沐英討
和林歷此山其後朔方樵牧于其上及其中葉無復登者西北
之麓有穹廬也今巢穴于茲者隨處而有不獨山後已焉山後
則為度耳

山在寧夏城西六十里河套西二百里山後者賀蘭山麓
之西北其地甚寬不可一處名按舊史稱山如駿馬北人
為馬為賀蘭今改夷呼馬為摩林與賀蘭之音不類則賀
蘭之名山當別有在但統言山後不一處也大約距中衛
總二百里距寧夏可百餘里為寧夏北屏自古為中國地
明初元國公大脫赤也和林屢為邊患命西平侯沐英總

既而兵討之、由赤峯乃路渡黃河、歷賀蘭山、弘治八年、夷人依山為巢穴、乃秦內地之人不得往山、畋牧至今朔方之人莫敢至賀蘭山者、山後今夷說囊勞藏克氣三台吉住此。

河套在賀蘭山之東、今別為一篇、附于後者、以河套之地甚廣、東南跨榆林、西南跨寧夏也。

右寧夏西北境外夷人壤地、附諸隘口、合四十有一焉。

黑山嘴、中街

黃沙漩、中街

觀音口、大團堡

大佛寺裡口、廣武

大佛寺小口、廣武

哈喇木口 大堤

林泉口 大堤

靈武口 大堤

雙山南 玉泉

雙山南岔

雙山北舊

磨石裡口

磨石中

赤木裡口 寧化

赤木新口

金塔中口 平羌

獨樹兒口

揚顯堡

威鎮堡

滾鍾裡口

鎮城

黃硤裡口

水吉口

鎮北堡

白寺口

宿鬼裡口

賀蘭口

新關口

小塔硤口

西番口

小水口

大水口

汝箕口

桃柴口

小風口

大風口

歸德口

歸德外口

大風外口

打磴裡

大塔硤口

此寧夏西北之隘口也東北則河套以長城為界半堵之外皆

凡題目下之注皆
原主也原主非
原主也原主非
原主也原主非

漫延平沙並無所謂隘口也。即有墩臺扼要之地。姑置不論。河套之歸命也久矣。寧夏之西則中衛有邊圍以為疆底。幾可無患。惟北面則賀蘭山向所恃以為固者。山為我有。今則可危者。山為夷有也。山為夷有何地不可侵。何隘不可入。豈獨區區方策之山口為然哉。

延綏衛

乾隆初年改衛為榆林府附榆林一縣

延綏鎮今在榆林衛榆林古無鎮有之自明始明初亦無鎮有之自王禎余子俊始延綏之間安內攘外者莫善于唐其次則宋莫不善于明

鎮名延綏者今延綏德而名之也明正統間東勝州失守移置綏德謂之延綏鎮正統中都督王禎始于出哨之水頭曰榆林莊築榆林堡成化中始衛故曰又明初無鎮也

余子俊為巡撫、成化八年、乃移鎮東起清水堡之紫城、西
定遠之鹽場、至一千二百里、兼河套于北、而內增三十六
城堡、分為東西中三路、築造城連墩勾堡、其高山深崖、因
其形勢、下厚者斷削、稍衍者壘築、每三里起對角敵樓、連
北不斷、空處築牆如新月狀、以偵敵避射、至今仍之、然而
邊境虛整、不修、皆可超越矣、

夫榆林西連寧夏、東通三晉、南引慶延、北跨河套、東西一千二
百里而遙、乃盡壤守沙磧不毛之地、示夷以割河套、及今二百
百年而莫之改、惜哉、

榆林西至寧夏之花馬池六百三十里、東至山西之奇嵐
州樓子營五百四十里、慶陽府界在西南四百八十里、延
安府在東南四百五十里、河套在城北十里、榆林西東二

路多黃沙環壑中路多山而多瘠薄不毛

何善乎唐也延綏之邊惟北面唐初因河為守仍秦漢也既而踰河築三城越出榆林北七百里且未聞轉餉于內地非善之善乎及舉軍復兩京兵雖單弱依然金湯雖有土番論恐熱之變不旋踵而敗之矣

唐宣宗大中元年河東節度使王罕及朱邪赤心敗論恐熱于鹽池

何併善乎宋也銀夏綏宥靜雖委于夏而麟州以及延鄜皆為版圖及囊霄跋扈日尋干戈然境內不聞飢且叛者據可守之地得轉餉之方也

寧夏綏宥靜五州按銀州即今銀州關也夏州即歸德氏之總萬城在西套中宥州亦在河套漢之三對縣唐之長

澤縣天寶中始名宥州、懷綏靜二州、今無可攷、麟州今永興堡、延今延綏府、卽今邠州、囊宵卽元昊小字、自麟州斜而西南、以至延鄜、其地皆可耕種、且依山阻水可守、歐陽文忠公謂邠州用糧七萬餘石、草二千一萬束、又云、運輸過河供饑、卽此可見轉輸有方也、

力有餘者當法唐、力不足者當法宋、不計而決焉、明初時以大將駐延安、以其為西北要地、及城東勝、則東受降之故壤也、雖未盡唐制、而黃河之內、莫非王土、綏德猶且無鎮、而况榆林乎、使祖制不湮、則卜世卜年、豈易量哉、

洪武二十七年、築東勝在黃河外、卽唐之東受降城、俗所謂由城子黑城子是也、守東勝、則東南與山西之偏頭關、寧武、雁門、相為唇齒、而西南可以屏蔽河套一面矣、惟東

勝而四百里為中受降城、更西四百里為西降城、受未復唐割耳、其時套內延綏寧夏之人耕牧其中、想稼穡、無不性焉、且亦修城設守、防其踐水、故是處之間、不知災患、則河套敵之也、其時兵屯東勝、故不但榆林無鎮、即延綏亦無兵焉、

東勝不復、則河套空虛之地、宜其或往或來、然未嘗為王庭也、當余子俊之時、即不能踰河復三城、但因秦漢故疆、以河為界、而之、其費復與城榆林等、兵不加多而足守、饒野之地可以耕、水次之舟可以挽、三邊皆安世^為之利也、

東勝不復、天順六年、毛里孩阿羅出塞、忽始入河套、猶貢山獻琛、未滿邊害、未幾即去、成化初、又同龍的思蘭入、始抄掠、即追逐之北流、嗣後或一歲一入、或間歲一入、出

套則犯大同宣府、朱永等討之皆無功、亦未嘗以河套為
巢穴也、今河套乃秦之新秦河南上郡、漢之定襄郡、唐之
六州、城郭將多、蓋因河為塞也、套地長一千餘里、余子俊
築邊、東起榆林之清水、西止寧夏之橫城、亦一千六百餘
里、故曰與河套、寧夏城堡東中二路兵八千二百七十
名、榆林三路三萬八千二百名、合六萬三千六百有奇、世
言套地沙深土漫、不宜耕稼、不知秦漢唐兵民所食何物、
且今套內衆近十萬、麥豆青稞、無所不有、從何得耶、況上
流即有河南固原寧夏下流即有山西、偶一水旱皆可鼓
棹浮舟也、寧河套則偏頭延綏寧夏皆無夷患矣、

苟夷已據、才力不勝、以俟後之人可耳、乃敵有所不爭、力有所
能為、地有所可守、顧苟焉而內縮地數百里于黃河四塞嶮峙

碣磧間累築綿引相接為長城延長二千里外不足為藩屏之功內不足有地利之益此何為者哉徐亨論王禕之失而余子俊固陷之矣雖文貴更增大邊以護屯田因仍補救亦何益耶
成化八年套中無夷住牧彼此視為覩脫雖踰河城受降夷不及爭况城河南乎河南以河為險有地可耕城可守之地延長二千里合榆林寧夏言之皆為防河套也自寧夏之橫城至榆林而南則多山崖雖少沙患而瘠不能盡地利也

雖有王越曾銑之才能不以為邀功則以為起釁蓋以榆林有邊故也夷因築邊知套內乃中國棄地不事兵革公然而巢穴居比鄰之地排數尺之牆小寇大舉無日無之故進不能如唐退不能如宋惟有就沙磧間據垣株宇而已且榆林之兵多至

五萬五千三百八十人坐食窮邊陰耗物力奈之何其不飢且盜也

成化九年總督王越因滿都魯索羅忽等自套入寇常州越知其輜重子女在套之紅鹽乃率兵食殺焚燒之夷被大創號哭渡河北去不復敢改者二十餘年嘉靖間夷大猖獗總督曾銳于二十六年大舉搜套殺獲甚多夷皆跟踏北徙而屢嵩指為關繫銳新東市嗣是言搜套復東勝者絕響矣于是小王子火篩俺答吉囊大落赤皆能鎮定等紛紛入套其後滿惠于榆林于套于晉殺戮動以萬計邊吏止以邊牆為界不敢踰越尺寸或嬰城自守或擁兵自衛夷益驕恣攻城占野邊將邊兵死者不可勝計天啟元年棟漢入套套中舊部懼其吞併多降中國今之套虜

昔之降夷也、崇禎間、李自成等多榆林人

有明之事往已、今欲為榆林善後計、奈何、曰、惟有因有明以變通之耳、一日修邊堵

昔夏初與金和好、故金得專力南侵、夏亦不受兵者八十載、及兵連不解、一勝一負、兩敗俱傷、夏至遭頤議與金和、調者以報金、軍臣曰、就令如此、備邊必不宜弛、金主然之、然口血未乾、而兵已犯境矣、今河套封古祿為晉王子、東封山旦王子、西有公主貝子、四方征戰、每調其人、其公主貝子月有俸、即今所謂蒙古是也、乃邊城靡有反肩、墩台高不盈尺、若如金軍臣之言、將若之何、况套夷其能如蓮頤哉、榆林開紅山神木黃甫川三市、寧夏于橫城開市門、隆慶六年、亦于紅山開市云、

一曰增屯兵

經制三營及諸屯堡兵九千六百二十九員名。有明則五萬五千四百有奇。已不逮明之什二。又從而汰之。而又從而坐占之。苟變生不測。誰為占守耶。非謂必當如明之多也。擇其當增而增之。防河套之不軌。備他盜之吞併。耳。河套當明時。此防瓦剌之侵。內有吞併之事。其後竟為揮漢殺掠。蓋養養之久。而人疲馬弱也。今畏西夷如虎。而貧弱出後之視。憂等。常謀併其部落焉。

一曰墾荒地

明制三守七屯。多在北邊。延慶二府召募軍丁。及摘發頭等。字號軍。分置衛所。三分守城。七分屯種。其後漸次逃避。既籍。而屯政大壞。今軍已盡為民矣。明制。墾法商人輸粟于

邊謂之報中、即領引于淮于浙支鹽、故邊地有募人間墾、有地方轉運、而米粟充積者、商人輸粟之功也。嗣後淮浙間、私商甚行、引鹽壅滯、而商人坐困于弘治間、商人後賂董璫、璫乃奏罷赴邊報中、以鹽引之銀輸納戶部、而邊地之粟少矣。官屯商屯之法壞、則荒地安得不多。今榆林荒地四萬二千餘頃、間墾之與、墾言之矣。有冒熟為荒者、有貪貪永不起科而起熟就荒者、有昔今幾年起科而不肯有司即征者、在乎得人而政舉耳。此皆邊之實事、有明之善政、所當因而行之者也。

一曰通運道

河南本邑由陝州而至潼津、則黃河是也。迤及渭河、總數十里、由渭而洛而北上源、則榆林邊堡即急水、艱于行舟。

然用秦漢隋唐之法以所用于閩者何不可用于延綏即
山西之米豆運至石川保德州則循河而至府谷相去甚
近且府谷去黃甫川總二十五里清水營亦然其他諸堡
遠者不過一百里惟西路諸堡為遠獨耳明布政文貴改
拋荒為折色侍郎馬清又改本色為折色于是邊民愈無
粟矣索頌問王嘉胤起府谷神一元起于寧保張獻忠生
于柳樹間堡李自成生于懷遠堡其他若李過高一功數
十賊目無一非榆林人也

惟在秦明李之襲奮然更張之所謂變通者在是矣

延綏邊堡

鹽場堡

字夏花池東三十里

定邊堡

鹽場堡東四十里

磚井堡

定邊東四十里

奮安堡

磚井堡東六十里

柳樹澗

奮安堡東南四十里

寧塞堡

柳樹堡東四十里

靖邊堡

寧塞堡東四十里

鎮虜堡

靖邊東四十里

鎮靖堡

鎮虜堡東四十里

龍州城

鎮靖堡東四十里

清平堡

龍州東一十里

威武堡

清平堡東四十里

懷遠堡

威武堡東南四十里

波羅堡

懷遠東北四十里

響水堡

沈羅堡東南四十里

保寧堡

響水堡東北四十里

榆林衛

保寧東北四十里

紅山市

榆林北十里

常樂堡

紅山市南三十里

雙山堡

常樂東南四十里

建安堡

雙山東南四十里

高家堡

建安東四十里

栢林堡

高家堡東南四十里

大栢油堡

栢林堡東四十里

神木縣

大栢油堡東南四十里

永興堡

神木縣南四十里

鎮羌堡

永興堡東四十里

木瓜園

鎮羌東南四十里

清水營

木瓜園東三十里

延綏邊堡

鹽場堡延寧之錯繡也西接花馬池東連定邊營沙塞平原之地雖有鹽池而城堡屯兵自古無之及移鎮榆林而堡始設亦定邊花馬池之亭墩耳北則河套限于一牆乃堡相去特遠游牧且良蕃邊外風沙墻常淤沒與其挑濬徒勞不如近堡改築之有功東四十里則定邊營

堡為延綏西路所自始花馬池在西三十里堡有鹽池周三里許中有井澆水其中越宿成鹽故堡名鹽場也明成化八年從撫余子俊移綏德之延綏鎮于榆林乃增置三

十六城堡、築套于外、西起于堡、東盡于黃甫川、邊牆在北、二十里、榆林達久不修、傾塌沙淤、變為坦途、不但鹽場也、堡設把總、

定邊營、隋之鹽州、唐之五原郡也、南通石灣、北枕塞垣、而長城關在焉、墾門守拒、今且何如、塞外充路、漢才黨、穹廬相望、安知其不內擾、高梁之困、可謂前車矣、營西郭外、南北二沙挑之、復塞、石坑舊寺、已為沙埋、明制、文有監司、兵有三千、今兵已汰十之七八矣、東五十里、至磚井堡、

秦時屬北郡地、隋煬帝因其近鹽池、置鹽州郡、唐為五原郡、置都督府、石灣池堡、在南一百里、邊牆在北五十步、長城、關出塞之門也、充路、漢才黨地名、在河套中、今任牧者、有黃台吉、有生狹丹台吉、高梁兒赤地名、明季總兵李琪

與黃台吉戰于高梁為夷所圍時出奇勝之西郭之南北
二沙時勞春鍊石坑寺在東北十里元大德中所鑿久為
沙淤弘治中掘地出焉明制兵二千七百名營有副戎為
延綏之西協

磚井堡宋之鹽池也南接新興而梁山洛水隔之北望恒都
而長城烽燧障之自堡而東依山臨塹有險可扼然西接定邊
相去五十里踈遠空虛則瓦剌梁之亭墩宜增置以備應援者
堡在平川垣類兵寡自堡而東南則新安邊沿邊而東五十里
則舊安邊焉

磚井者古有井而以磚堯之堡舊為新興後移新興于堡
南八十里南有家嶺俗呼南梁山恒都古城在套內堡東
北五十里漢用兵之地明制兵八百五十名今止一百一

十名堡有守備、邊牆在北一里。

舊安邊營、宋之鹽州地、俗謂之深水。明初置城、石彪所轉戰而成功立威地也。余子俊以平漫沙漠、難於築濬、邊濠不利、士馬出入、乃於中山坡改築新營、所謂新安邊也。王綸仍改守此營。在平川久無壘土、明制兵近三千、新營且有六百、今二十爾存一矣、東南四十里至柳樹澗。

正統二年置營、天順二年夷寇邊、命大同總兵官石彪往禦之、與夷戰于安邊、迨至昌平墩、大敗于野馬澗、平坡墩、轉戰六十餘里、斬鬼力赤平章、擒獲無算、成化十年、置新安邊于中山坡、則北至邊牆六十餘里、巡撫王綸以就舊營、切近大邊、東連寧塞、西接磚井、此之昔年孤懸者不同、乃復守此營、有荒田、民欲開墾、有司不許、營有守備、明制

營兵二千一百。又新營五百九十。今止一百三十名。堡南至新安達六十里。北至大邊一里。

柳樹澗堡。宋之夏州地也。澗有柳樹。因名堡焉。堡置于明初。而余子俊南移永濟。則定邊寧塞益以孤危。董威復移于此。自堡迤東無險可據。而堡與寧塞為延安門戶。套夷居常小窺。秋高大舉。率多由此。誠吭隘也。今且不逮明之什一。而三山石海新興。皆在腹裡。分其兵以守衝要。亦補偏救弊之一端乎。張獻忠生長此堡。東四十里至寧塞堡。

永濟堡。在南三十里。嘉靖末。建撫董威復移永濟堡守此。因舊堡而修築焉。明制兵一千八十名。流賊張獻忠本堡人。初為快手。崇禎二年。從呂美為賊。謂之西營八大王。堡有守備。至邊一里。

寧塞堡古之枹橈城也。堡在山源，明移三岔堡兵守此。西南有把都河，堡之北，若蓮花山、順寧川，有古塞焉。金湯川、鷲窩山，有戰場焉。河之南，架炮山、旗桿山、亭燧存焉。皆希文、范公之遺蹟也。審度地利，自此而北，皆白葦、黃沙，險無足據。與守把都兒保，安可無慮？與寧塞逼近邊城，有明之兵多至二十倍，且有神一兀兄弟相繼為亂，覆車之戒，可不謹與？東至四十五里，則靖邊營矣。

把都河在西南三十里，蓮花山、順寧川在南十三里，金湯川、鷲窩山在西南二十五里。大盜神一元，本堡人，堡有守備靖邊營，宋之兀剌城也。延安遠在其南，長城近劃于北。明撤內地兵以守此，非以其衝要乎？東西有哨馬營，而南之黃花戍，以及敏、麥城、范老關，皆文正公所經營者。營即保安軍焉。其為重

也。宋且然矣。明兵十倍于今。猶有小墩寨之失。奈何平原要塞。鎮以遊擊將軍。而兵纔二百。即東四十里至鎮廬堡。

元制。宋所築城也。即今之營馬。通志以爲即寧塞。則誤矣。延安府在南三百二十里。大邊在北一里。明移保安縣兵守此。哨馬營又謂之范將軍馬營。蓋文正公舊跡也。黃花城在西南五里。即黃河古戍也。營城外有菽麥河。渡永濟橋。則菽麥城。明制。文有監司兵二千二百六十名。營今有遊戎兵二百名。

鎮廬堡。宋之夏州地也。明初未嘗有堡。因鎮靖靖邊東西遼闊。而置堡適中。城小而當要塞。兵纔及明之什一。非置堡之初心也。東四十里至鎮靖堡。

鎮廬今易名鎮羅。鎮靖靖邊相去八十里。堡周三百有七。

文明制兵四百四十名今五十名參將杜茂謂居人耕種于邊外云堡有把總北至大邊半里

鎮靖堡即白塔澗也南有蘆關延水出焉明初謹守塞門繼之進軍筆架余子俊乃移至此地利失矣兩為叛臣再為刀俎死者數千焉今堡宜遷高陽兵宜增設東四十里則龍州城

堡又名白灘兒塞門所筆架城名嘉靖五年大水入堡四
十三年又為水淹套夷于嘉靖四十年陷堡殺掠二千餘
人四十三年又為所陷明制兵二千五百名今止一百二
十名堡有守備南至延安府二百里北至邊二里

龍州城漢之龍州宋之站堡寨也范文正于此置馬營境有龍
城關此近邊堵南為延安城乃延境首衝今鴉兒巷腦四面天
險建城堡以扼吭喉足資保障城南宜家畔有荒忽都河無定

河之上流也。堡之溝澗良多。善用之則為險。不善用之則為害也。地利豈有常勝哉。東三十里則清平堡。

邊堵在北五里。延安府在南三百里。堡在平地。不若鴉兒峽為險。固水出峽外之白城兒。至此于堡之荒忽。都河水合南流。益大。謂之無定河。水中之沙。人馬踐之。如行幕上。多陷沒之患。淺深不一。故名無定。且水急流之際。時或逆上如海潮。唐人詩中皆指此也。延綏西路止于此堡。堡有把總兵五十名。明制兵五百六十名。

清平堡。漢之白土縣地也。舊名磚營兒堡。在三原。而城外之沙常陷車騎。而距邊甚遠。昔有導鮮艸之水。而邊堵以安。則擇形勢以還堡。亦絡焉永藏也。且自堡而東。居威武懷遠。邊堵險阻。山嶺崎嶇。而谷口則平如砥。西川小理河。汭尤為扼塞。干振

之吏不戒則白落卧牛靡有堅城矣東四十里為威武堡

嘉靖十五年堡為套夷所陷縣鮑河在邊外五十里其水
貫墻而入址岸傾圯水淺則河埂平沙漫衍靖邊監司文
作于邊外審視得石廣數丈水障而下乃鑿石為穴導水
下流而石若梁焉石上施城邊墻遂固白落城名在西六
十里卧牛亦城名在南七十里堡為延綏中路所自始也
堡有守備兵一百名明制兵二千二百名

威武堡即響鈴塔也北有威武關堡以名焉堡在山阜明始得
繕城置戍牛心在其東赤木峙其北依山險阻之地也南有狄
青原武裏之所駐兵于此奏膚功者猶在邊墻未築之先則榆
林之邊固益于守也今海流兔之地豈不密邇邊既不修兵且
過沙何耶東南四十里則懷遠堡矣

成化五年，安撫裴鏡徽大寇鶴堡兵，守此。牛心山在東十餘里，赤木山在西二十里，秋青原有水，在南十里。成化二年，七里入寇，總兵楊信戰于秋青原，大勝之。其時並未築邊，且能戰勝固守，及邊已築，人心懈怠，夷人入犯，未有若此之略者。海流免地名，在全內，今起羅代台，吉所住牧。明制兵六百五十名，堡北去邊四里，堡有把總，今兵五十名。懷遠堡，即白家梁也。梁在山嶺，城如黑子。明移土門軍守北山下，苦水川合國水而東，則無定河也。明時堡之旗桿戍戰，火出有聲，而關賊乃生于李繼遷寨，以鍛鉄驛夫，覆八荒，無外之全。甌，夷不虛生哉。堡距邊甚遠，今遠蓋之地，璫帳星畢，兵不及明十二，何以禦之。東北四十里，則波羅堡焉。

城周二里，三門。子在面二十里，旗桿戍戰出火，在隆慶元

年、率自成世為李繼遷寨人、寨在堡側、自成幼牧羊、長為
鐵匠、禾成、耕田無得、年二十餘、始為銀川驛馬夫、崇禎元
年、裁驛站、無所得食、四年、大苗姜部為賊、號聞將父守忠
祖海、曾祖世輔、皆懷遠農民、崇禎間、米脂諸生賀時雨、貢
生史紹上書、乃無賴楊灰、堡北至連牆二十里、米南至米
脂縣一百里、連蓋在套內、今馬大麻台在倭連台吉所位
牧、明制兵七百四十名、今堡有守備兵一百一十名、

波羅堡、堡有波羅寺、堡依山築、南通綏德、北跨馬安、東控土門
西引三捷、然沿邊之外、沙高于墻、無定河可以為隍、戎馬不能
徒涉、所防常在水堅、今河水即淺、安足恃乎、自堡東至保寧、幾
于三舍、沿邊空虛、雖東南有響水堡、距邊遼遠、則增堡移兵、宜
何如、夏通也、東南四十里至響水堡、

波羅寺亦依崖而築，按德州在南一百五十里，馬鞍山在北五十里，上門寨在東十里，三捷關在西二十里，遼城在北十三里，寨外之夷，即趙單代五柝式堡，為延路中衝，計成所駐別，今馬兵共六百六十名。

響水堡，漢之圓陰地也，堡近黑河，或呼為黑河上云，東連歸德，南通無河，綏德在于西南，榆林出于西北，惟此甚遠于邊，苟有緩急，不介馬而趨，恐亦無及，明已移軍平夷，及余子俊復移守堡，東北四十里，則保寧堡。

歸德堡在東四十里，魚河堡在南七十里，按德州在西南二百里，榆林鎮在東北六十里，遼牆在北七十里，正統初已移平夷堡，成化間，余子俊又移復，明制兵八百名，今堡有守備兵一百名。

保寧堡古梁城也。波羅西接榆溪，東引響水，直其南。紅山通于北，切近長城，自大川口版築雖堅，而風沙待甚。夫堡于常樂、實扼歸德、魚河、大川之衝，雖陰上郡在在可虞，雖中路兵駐波羅而馬二百，兵僅倍之，明常移波羅之兵守此堡，為水澤之區，運來渚水漸涸，馬無所飲，其若之何？東北則紅山市，東三十里至榆林衛。

波羅在西八十里，紅山市口在邊外三十里，長城在北一里，大川口在西二十五里，堡在平地，明制兵一千三百名。今堡有守備兵一百名。

榆林衛榆溪舊塞也。春秋時屬白狄地，秦屬上郡，漢為雲中九原地，隋為榆林郡地，歷代無所建置于此土也。明失東勝而守綏德，此其出哨水頭耳。城築王禎鎮移于余子俊創始增修，

且東西繕三十六堡塹山堙谷築河套于外而重兵屯于榆林于是為雄鎮矣東倚駝山西限榆溪北距邊堵南引銀州其城三面憑山一面臨水可謂天險然東南山阜參差林木隱蔽沙峰置樓則高與城埒攻擊可虞也其海潮寺逼居城下掘地可慮也夫榆林貪功習戰之士多務本力田之人少其地磽瘠畝糧不充闕賊焚殺城陷而猶巷戰忠魂數魄直與日月爭光可也此十里則紅山市

秦使蒙恬築長城畧河南拓榆中城千里屬之上郡今河套即河南而榆林所屬皆古榆中也漢為雲中九原又謂之五原隋煬帝進幸至此有榆林營明武宗正德十五年亦進幸至此綏德州舊亦無鎮因東勝失而退守綏德也正統間魏兵工積始築城成化八年余子俊移綏德之兵

于榆林而榆林始有之經鎮矣城東有駝山城半築其二
山形類駝世呼榆林為駝城云穆河之水西注暨于城西
為西河合榆林之水流入于紅石峽繞城帶郭所謂一函
臨河也北六里有紅山其上有款貢城邊墻在焉又北二
里為紅山石漢夷至市處也城南一百四十里為銀州關
即古銀州地榆谿無定二水皆南流至銀州關而合也崇
禎十六年賊李過高一功王良智攻榆林城于沙峯五起李
飛樓與城樓相對矢石交至賊又于海潮寺穴地道城中
掘地拒之卒之東南城陷死者頗多巷戰死者七十餘人
鎮明時設有巡撫今裁今惟有總戎三營馬步守兵二千
六百名城有都司守兵五百名南至歸德堡四十里東至
常樂堡四十里

紅山市為歟河套而開也。始于隆慶迄今而未有已者。市口有城。開市有日。貨物有禁。而有明之賞則無之。明制一年無犯則許市一年。而朝歟夕冠。不和凡幾。今向化雖醇。族類不一。過此以往。未之或知也。爛泥灣為內地草場。而近什喇百黎。邊女爭桑。至于啟釁。不可不戒也。南由榆林四十里至常樂堡。

明隆慶五年。吉能乞貢。遂開市于紅山。今市口有至城不厓而陶穴以居。或設帳房。正月望後。開開日一市。往市者。烟茶。綾布。綿布。草。銀。鹽。所禁者。軍器。米。麥。黍。所至者。馬。驢。駝。羊。各皮毛。而明時一歲止一易。賞以萬金。許元昊謂我戎人。本事擊馬。而以資鄰國。易不急之物。非策也。王忠嗣于夷互市。每高估馬價。惜夷爭以馬來。南夷馬遂少。然今套虜甚弱。套馬甚驚。益養養久也。爛泥灣在市外鎮軍。歲

時採草地也、什剎百黎在市之北、今刺迷達台、吉、彭松台

吉位牧、南至榆林十里、西至保寧三十里

常樂堡、漢之榆谿也、舊堡在南、沙磧無水、弘治間移置岔兒河、即今堡焉、西接榆林、東接雙山、葭州在其南、邊圍當其北、塞外飛沙踰垣而入、雖漳水淺不可湟、堡南駕鵞河、水草大善、鎮之芻茭咸賴焉、邊外白崖河、超出漳外、以為飼秣、保夷之不得乎、東南四十里至雙山堡

成化間、築舊堡于南二十里、弘治二年、巡撫劉忠改築今堡、堡在平川、榆林在西三十里、葭州在南一百四十里、長城在北半里、漳水出本堡、而塞外葫蘆海之水、南流而至于漳水、合流入紅石峽、邊外白崖河為鎮軍、草地堡為延綏中路所、止有守備兵一百一十名

雙山堡漢之真鄉縣地也。初築堡于水地溝。成化中移置今堡。堡在山岡有險可守矣。南近葭州而府谷吳堡亦皆密邇。而大川當未脂之衝。則北門鎖鑰堡亦無所諉其任矣。長塹在北。依山阜而少風沙。然山泉潰決。庸或有之。疏導之不可廢者。白崖兒可以伏兵。覆索之不可已者。邊外邵家梁。美地薦草易起。爭端慎之哉。東南四十里至建安堡。

正德二年築堡水地溝。余子俊移于今堡。撤西南之柳樹。會兵守之。葭州在南几十里。府谷縣在東南。吳堡縣在南。未脂縣在西南。邊橋在北十里。明時賊伏白崖兒。副統兵陳鳳死之。邵家梁在邊外。為鎮軍草地。明制兵六百六十名。今堡有守備兵一百名。堡為延綏東路所自始。

建安堡漢之固陽縣地也。古未有堡。余子俊城崖寺。於是為今

堡南有建安關、南直黃河、北限障塞。堡在山畔、然塞外僅覓之水、貫邊而入、彼有實焉、可不防與？自堡而東、周阜交錯、蜿蜒四百餘里、東路之固、固在險也。且逼近黃河、軍需苟乏、水陸可通、其如世無實心任事者何？東四十里、則高家堡矣。

成化十年、始築城、黃河在南一百五十里、蓋黃河自寧夏北流而東、幾二千里、至君子濟、則折而南流、貫太康、延安之間、故延綏東路、南近黃河也。東路之北、則為河套、河套之北、亦為黃河者、水之曲折也。邊牆在堡北五里、撞覓山名、在邊外、水自邊外而入、經堡而南、為亮尾河、明制兵六百六十名、今堡有守備兵一百二十名。

高家堡、唐之豐州地、宋之飛鴉川也。堡在平原、南通葭州、北限隍陘、萬戶峪在南、趙保吉之衆從此犯麟州、幽陵在北、唐開元

中置也。南有彌勒川，衆水所會也。堡固東路中之平原乎。馬鞍山為古戰場，夷之西犯，亦從堡入。今塞外之五藍腦，種莖羅列，備可疏與。東南四十里，則栢林堡。

段州在南一百六十里，達達在北三里，萬戶峪在南一百二十里。李繼遷宋賜姓名趙堡吉，麟州即今永興堡，幽陵都督府在堡東五里，彌勒川宋置，有彌勒寺寨，下有金剛溝，皆永利河水之所經也。明初百戶宋銳戰死于馬鞍山，陳罕卒北夷入套，驅葬諸夷，套夷屢敗不支。崇禎六年，大落太及古魯太皆舉族內附以避之，據漢入達從堡而入。至崇禎十年，據漢西犯甘川，病死于祁連城，套夷自乞降。後榆林達患遂息，反李過攻榆林，榆林義士且借其兵數千來援，以衆寡不敵退去。五藍腦在河套，今打兒鼓貝子

哈喇台吉引章耐台吉往牧、明制兵一千六百、今堡有守備兵一百四十五名。

栢林堡、唐之勝州地、堡之得名者、其地產栢多也、堡從未有風塵之警、距山原而地利得之、南跨黃河、北距鰲堊、而鰲外之耿波黨、淪為異域也久矣、雖有野麻灣之水、曾不濡馬足者、南有軍崖、其事不經、非關隘扼塞、可不通矣、東四十里則大栢油堡矣。

黃河在南一百二十里、邊牆在北二里、耿波黨及把漢波黨皆地名、屬河套為聶克台吉往牧、野麻灣亦在套內、其水自堡西流入高家堡、點軍崖在南三十里、其崖有馬蹄及人跪坐衣冕、明制兵六百二十名、今堡設有守備兵一百一十名。

大栢油堡唐之麟州地也堡在山巔水環城外寇夷交訌而堡相安于無事非河山之助耶南黃河而北長城與栢林同之其石盤山謾謾無稽惟兵制所宜擴充耳東南四十里則神水縣矣

城外東西一水俱自邊外而入南合栢林城東黃河在南一十里大邊在北三里石盤山在東南山石有巨人跡車轍跡世謂周世宗畋筆過此云明制兵四百六十名今設守備兵一百名

神木縣漢之光祿塞魏之朔州隋之豐州宋之神木寨也明因宋為縣城在平原南界黃河北距市口其鳳頭筆架則武宗之所驪蹕也其柴溝燐火之所常青也其河口堡則水濱之捍衛也河山既改而高有才啣石填海蓋可悲矣縣東之龍眼錦屏

山環秦漢唐之郡縣。今又湮于套中。而塞外之五奴故鬼。今分茅胙土。封建存焉。相與互市。同于紅山。乃邑之屯兵。僅及明什二。不亦過少耶。南四十里。則永興堡。

縣四十五里。有古松二株。因以為名。元亦于此置雲州。明始為縣。而名則因宋焉。黃河在南一百二十里。邊城在北四十里。鳳頭峯架二山。皆在東一里。正德十三年十月。武宗巡幸榆林。駕駐二山。李朵入寇。總兵張欽敗之于紫溝。河口堡在西北。墻長八里許。特為藩籬。戊子年。總兵姜環。交于大同。已丑。高有才起于神木。以應王。永疆交于榆林。以應焉。有才遂盡有榆林地。直趨三原。適吳三桂自漢中直趨至。有才戰敗。退保府谷。攻之逾年。始克。高有才乃沉黃河死。龍眼錦屏山。其南自漢之光祿塞北。有唐之麟州。

故城又連谷城。又南四十里有秦之新秦縣。唐之靖寇寨。
惠寧堡、鎮川堡。東有元之銀州故城。五奴故兔地名。在邊
外。今封名。晉為晉王。王及古魯什貝子。捏克舍吉皆住牧
其地。互布文約于紅山市口。同明制兵二十四百名。今止
五百一十名。縣文有監司縣令。武有副戎。

永興堡。隋之連谷縣。唐之麟州郡。宋以謂之黑城也。南近黃河。
北連長塹。榆林各堡。當有明時。套夷外侵。流寇內亂。而堡巋然
獨存者。堡在山原。以險為固也。宋欲廢州為寨。且欲棄之。歐陽
脩曰。城堡堅完。地勢高峻。天設之奇險。可守而不可攻。其至黃
河。府州各縣百餘里。不可棄也。以今觀之。其言不益信哉。東四
十里則鎮羌堡。

堡即宋之麟州。又謂之黑城地。黃河在南九十里。連城在

北十三里府州今黃甫州在東南一百二十里明制兵一千一百名今堡設有守備兵一百一十名

鎮羌堡唐麟州地也明初守東村繼而移堡于此南抵府谷北統長城堡在山原百年無兵戈與永興共之境內天窅闊可以守禦堡有荒田而禁墾惜哉東南四十里則孤山堡

成化二年移築今堡府谷縣在南八十里久遠在北十里明制兵七百名今堡有守備兵一百一十名

孤山堡即孤圪塔營也南接府谷北限長城與鎮羌同焉堡置山巔昔屯重兵開市及移神木而堡日就荒涼南有薩州不足為重湯撫勦所謂黃沙白草四望漫漫一腔熱血乃委此耶今邊外之北黃河畔有執躬圭者然時勢多變遷可不為之長慮耶東南四十里則木瓜園堡

府谷縣在南四十里、大邊在北十五里、乙未移堡之兵及
市于神木、邕州在南四五里、有明參將湯胤勳守孤山、與
夷戰賊死之北、黃河畔在套中、今掌歲、公住牧、明制兵二
千六百名、今堡有守備兵一百二十名、

木瓜園堡、亦唐之勝州地也、東路城堡、木瓜園獨置於後者、古
無此堡也、府谷在南而近、長城在北而遠、奔走守望、何以不勞、
堡在巔、城小而荒、一陷于闐王、海再辱于王嘉胤也、東三十里
則清水營、

成化十六年始置堡、弘治十三年始屯兵、府谷在南五十
里、長城在北四十里、小泡關王海陷堡、殺掠已甚、崇禎三
年、流賊王嘉胤起于府谷、攻陷本堡、明制兵八百八十名、
今堡有守備、兵止一百二十名、

清水營、唐之勝州地、宋以屬府州、西南府谷、東北長城、明初以黃甫川而屬于營者、延綏東路長達盡于營之柴城、守及于黃河、塹也、踰河則山西全秦之連盡是矣、清水城在山坡、當極衝之地、而兵不及明之什一、東南十五里、則黃甫川焉。

清水營、成化二年、城修府谷之兵守此、府谷縣在西南八十里、長城在北二十里、明制、兵一千一百名、今設有守備兵一百名焉。

黃甫川、唐之勝州、宋之府州也、明初隸于清水、而開闢置戍焉、城在山畔、東濱黃河、南隣府谷、北盡長城、西北清水、一河之隔、奇嵐之樓子營也、黃河從塞外至東勝州、經君子濟、折而南、經堡之東、則出套矣、黃河天塹、然冬寒水合、萬馬可渡、故延綏他堡止於防套、惟此堡則防他寇焉、小堡互市、同於紅山、豈但焦

家坪為是紛紜交易哉延綏沿邊之城堡實止于此就今日之疆域籌耳

天順間堡猶隸清水弘治中始設間黃河在東二十五里府谷縣在西南九十里北邊在北二十里清水營在西北十五里奇嵐堡東南至灰溝營唐家會渡河直達偏頭間又東渡河逼近殺虎口故堡與山西各處但隔一河耳家坪在河套今索鈴貝子住牧明制兵一千六百名今堡設有遊戎兵一百九十七名

延綏邊堡自鹽池而東至于黃甫川長城之間或雜山險凡三十堡一千九百里其紅山為塞外不與焉

右北邊自肅州之野麻灣至于延綏之黃甫川統四千一百七十里

河套 自寧夏東北起、以至于榆林東北止、皆河套也。

河套在寧夏之東北、而榆林之北也。其地東距河、則山西之偏頭關、西距河、則寧夏衛、延長二千里有奇。長城限其南、其三面有黃河之阻、其廣或八九百里、狹隘一二百里。

河套地界、惟黃甫川與黃河稍近、以南焦家坪、兩岸夾山、水先合後、洋及娘娘灘、羊園渡口、交冬水堅、夷或由坪、或自灘、或由渡口、以入河套。

荒廢之城郭州郡、往往錯雜其間。河套本中國地、古未有河套之名也。自明築河套榆林之長城、棄其地于外、而河套以名其地。古國屬於趙、秦為河南新秦上郡九原地、沿河築城、扶蘇蒙恬所經營、為縣三十有奇。漢置五原郡、主父偃所謂河南地肥饒、外阻河、蒙恬城之內、省輸運咸漕、廣中國邊備也。晉因漢領

縣于後屬符秦。晉本始據于赫連氏。其後宇文泰據有其地。隋置勝州榆林郡。更築長城。唐初破突厥。以處頡利之衆降者。置六州。而以唐人爲刺史。武后併爲二州。中宗置蘭池都督府。分六州爲縣。玄宗改爲寧朔郡。以六縣爲六州。又續增宥州。張仁愿北踰黃河。因趙武靈王故址。築三受降城。及靈武中興。而武臣帶甲之力。多出于此。唐末。拓拔思恭思忠以討黃巢功。賜姓拜爵。奄有寧夏。終豐勝宥麟五州地。延五代及宋。遂建國爲夏。及元昊僭號。以夏竦韓琦范仲淹爲經畧。种世衡狄青爲將。僅遏其虐。蓋土地廣大。根固盤結。非一朝一夕終宋之世而莫之何矣。元滅夏。置中書省。亦謂之中興路。有明追元敗將于察罕。腦兒。遂王保保。後城東勝州。此千里之地。塙塹墩台。居然腹裡。何以有河套之名乎。何以言棄河套於外也。明東勝不守。地河

探哨徙草燎原于其地。及毛裡孩等往來踐蹂。李賢知為後患。而當事者苟安目前。智不及於徙薪。而力不能救火。及益以亂。加思蘭糾合滿都魯等。樹黨日多。寇邊日甚。而大固延綏寧夏數千里。烽燧不息。鼙鼓相聞者。則河套為之巢穴也。昔虞胡有言。上郡沃野千里。水草豐美。土宜產牧。宜復城宜耕。屯灼灼明矣。自定城倡誕謾之論。遂堅其河套之心。嗟乎。古郡縣其中者。皆移粟于他所乎。當日延寧耕植于中者。皆種苴成箕乎。河套畜牧十倍延寧。昔苟難而今何以易乎。一言喪邦。其葉盛之謂乎。于是余子俊王瓊陰用其言。後先合志。設重兵于榆林舊堡。築長城東起黃南川。西至寧夏。乘障則燧。盡壞分疆。舉北面千餘里而棄之。此河套所以至今不為內地也。子俊與瓊之心。或先身守而後可施攻取。然城已成。已示夷人為已棄之地。立懦

夫自守之疆河套之棄非二子作俑而誰耶英宗憲宗之世未嘗不謂搜河套復東勝也然當時膺閫外之寄者則宋勇趙輔劉聚之徒所用非其人宜其相繼無功而以搜之復之為難以蔗杖為挺而謂天下皆堅器亦惑矣及王越鴟巢走志遠徙河套之易復亦明矣機有可乘而卒不能者因循久而畏懼生議論多而求備甚宜乎河套之終于棄也孝宗之際大節入套肆為侵陵延寧大同數千里間覆軍殺將畧地攻城而後圍搜套復東勝開屯田是猶可為也而逆黨阻之械之入朝矣正德間是以有固原臨洮鞏昌之禍迨至嘉靖視河套為久棄地而平涼固原延綏環慶寧夏以至涇州三原涇陽歲遭虔劉動以萬計宋之王庶有言延安臨則南三輔如建瓴而下明棄河套而全陝騷然四方震動固如是哉棄河套之效彰彰明矣其時未

手無策皆不敢議恢復之舉又未有守禦之方惟總制中丞檻車對簿固已晚矣嗟乎以天下全勝之勢困于彈丸之河套以天下之人困于大節吉囊俺答之數夷猶謂中國之有人乎夫河套在河山之內自古為中國地有明所世守者自築長城凡踰短垣謂之出塞是委河套于敵而遺腹心憂憂不知復河套而後延綏寧復東勝而後河套固此必然之勢中國之利也唐築受降城乃禦夷于黃河之外明築榆林堡則養夷于河套之中是自損于腹裡之地使夷橫據其中豈非棄利就害徒為天下後世惜哉世宗誠厭兵端雖曾銑有壯猷兵出有功旋遭嚴嵩仇鸞之構遂使事者効者力者盡於一網是自壞藩籬以媚盜且明示臣工以搜套復東勝為戒矣邊警益急君臣咸咎開邊之禍嗚呼銑未出師之先夷人之入寇者誰開之與夫河套者

非夷能取之。乃明棄而與之。非不能復。乃禁人之復耳。英宗而下。有欲復之君。而無能復之臣。武宗而下。有能復之臣。而無欲復之君。至于發言盈廷。惟楊一清之議得中策。楊瑄移堡防邊之議得下策。其他遙度坐談。皆為無策。嗟乎。河套非絕徼也。復之固難。言之亦難耶。當世宗之際。希旨議河套。以巧言亂真者。固多矣。白面書生。不履邊垣。親戎馬。宜其失不止于半。獨怪倪岳者。以卓然名臣。而復東勝。搜河套之議。猶不能無失言之譏。其他復何議焉。東勝之廢。纔數十年。棄之非久也。去偏頭。率夏。纔二三百里。地形非難知也。唐守受降城。明初守東勝。非別屯一軍以助也。則出孤軍。涉絕漠。勞師絕餉之大害。乃漢唐通西域之陳迹。因設言之。以止人復東勝耶。至於河套。雖長二千里。然三面距河。黃河為塹。非綿亘無際也。城郭未盡傾。土壘未盡

廢非如沙漠無可居也。土地肥美，自古迄今皆利種植，非無委積也。不鼓勇前行而但守一塹以為固，則塞垣內地之兵民歲供其穀，幾可謂據全勝而取敗反逸為勞矣。夫河套之與延安、無名山大川以間隔，又非有高壘深溝，無地不可入寇。此老成謀國者以盡心竭力以圖恢復，不宜以入室剝膚之患等之選功絕塞而為郭郭無當之說以阻之。獨指摘當時之兵將則固為燎若觀火矣。嘉靖間河套之議數千言，娓娓可聽者莫如翁萬達、萬達勲、名赫奕、總制宣大宜其諧于邊事，乃飾浮詞以取悅奸相，尤可怪焉。延綏鎮撫楊守謙之議，豈不之聞，乃故為舛錯悖謬，與之背馳何耶？連戰至難，何王效梁震，屢有賊績乎？守險苟便夷人常入塞，東盜西寇，北擾南侵乎？冬則河凍草枯，臘騰已減，春時冰解，馬更飢，隴非夷馬之瘦乎？廐閑而居，芻豈

而收冬春間我馬不甚肥乎則我強夷弱明矣大同五堡猶屬
境宋河套之地乃在河南恐其必爭則不復將必揖讓而後復
乎沿河雖有二十餘里較之邊垣僅多五百里移延寧守邊之
兵于沿河因河為隄結壘為城所謂其易十倍何守兵須三十
萬之衆乎套中之地一歲而耕再歲而獲所謂不費牛馬其利
百倍復套移營耕墾次壤何仰給於內地乎曾銑用兵已有成
效萬達非不耳而目之者勢之強弱事之難易彼已之有餘不
足莫不彰彰明矣而故反其說者何耶塞上之民橫被屠戮者
日益多沿邊之卒傷於鋒鏑者日益甚所宜者殺焚掘溺復何
套以安延綏寧夏安延寧以固關隘不宜夸張夷勢引喻失義
沮志士之心杜天下之口使夷坐大舉河套而棄之也嗚呼萬
達者亦媚君相耳否則久在行間憚於出師而已焉知所謂時

勢者哉。套夷自吉囊而後日已式微。南恐搗巢之患。北備互剽之侵。則亦巢于幕上焉。有明苟有中賢之乘。可為之時。時勢取河套。復東勝。誰曰不可。顧畏之如虎。竭脂膏。增市賞。貪日之安。方以羈縻為得計。夷豈不內笑其愚哉。套夷土地肥而蕃養久。戰事少而筋力疲。至天啟間。挿漢人套。以夷攻夷。而套夷有舉族內附者。此非成哀短祚。而呼韓稽顙與。挿漢人套。套夷始復故土。德中國卵翼之恩。願為北藩。當賊攻榆林。猶欲為敵愾之忠。其若天之不祚明也。何哉。河套自明以來。分為二大部。其分地以榆林寧夏之邊界為疆。今套既封。以王以公。月有俸祿。其色目以下為差。可謂盛矣。然套夷自明以來。多為別部所吞併。未之有世守者。有黃河衣帶之水。而無長城戍守之防也。今河套既受羈縻。而西夷又眈眈欲噬之。則為區畫布置。所以保全。

唇齒者不可緩也

套內山川

犁元山、在東古城南

牛心山、在黃羊城東

海子山、在塞山城東

駱駝山、在義罕腦兒城南

麥梁山、在省嵬城東北

月兒海子、在牛心山東北

紅鹽池、在蓮花城東北

長鹽池、在蓮花城東

北海子、在白城子東

佛堂寺溝、在鴛鴦湖西

鴛鴦湖

咂把湖

在縣駝山西

邠海子

其派有三皆北入於河

紫河

今謂之紫河又是也

石崖山

山文有戰馬狀

陽山

在河北

馬陰山

在河東北

套內物產

鹽

紅白二色

金銀

出套梁山

鐵

出套梁山夷常取用

石煤

出套梁山

良馬出塞河

野馬不多

黃牛羊青羊黃羊

雉兔甚多

狐狼魚出黃河甚多

河柳可為箭紅柳

矩松即青木香

甘草大而甘

酥油草易肥牛馬

芡蓂草可為蓂

蒿茨皆可為薪

河套古蹟

富平古城

在省苑城西北

朔方臨戎縣故城

在西北湖北

臨河縣故城

在高閼東

河目縣故城

在河南

唐龍鎮

在勝州東至黃河二十里

東勝州在河北東故城

在翠元山北

佛堂寺

在鴛鴦湖東

雞鹿塞

在朔方蘇澤縣西北

省窺城

在秦梁山西北

义罕腦兒

在駱駝山東

忻都城

在义罕腦兒城西

狄青寨

在佛堂東

交城子 在白城子

白城子 在北海子西

石窰川城 在紅蓮池西北

紅城子 在月兒海子東南

趙苗運城 在武花城西北

武花城 在沙淦西

連城 在沙碩兒西

石碑樓 在河碩兒東

今宿城 在犁元山北

外疆

赤金山在肅州西三百里其下有硤焉夷之往來者恒由于此
伏兵用武此其地矣罕東在衛即沙州城也在肅州西一千一

百三十里。唐初置沙州。天寶中陷于西夷。大中間刺史張朝義以州歸。遂建歸義軍。以朝義為帥。元復為沙州。明初傳有德追敗亡。元至瓜州。厥後始置衛。以俺章為都督。

按俺章之弟曰若木。皆阿卜爾加之子。阿卜爾加之父曰哥丹。把勢。本烏斯藏番僧也。俺章兄弟謀殺元之耳交王。領其部屬。妄稱親親丞相之子孫。于永樂元年修貢。故兄弟分封于瓜州。沙州。焉。諸說紛紛。皆不得其實也。

正德間土魯番侵擾。皆還肅州之東西暖泉。及甘泉之高台白城。呼羅口。即今之黃峯也。

嘉峪關西二百四十里。至素金城。又西二百里苦峪城。歷西門丹六百二十里至沙州。

白龍堆在沙州西門外。形如土龍。身無首有尾。高大者二三丈。

早者餘岑參詩秣馬龍堆月照營即指此堆東倚三尾北望萬蒲蓋沙州之塞要也

寫沙山在沙州南七里天晴氣朗則沙州城中聞寫沙之聲冬夏間其聲殷殷若雷疑即竊貢所謂流沙也

三危一在沙州東南二十里俗名界西山三山特聳故曰三危渥洼水漢之天馬所生也在沙州境內

壽昌縣漢之龍勒地也在沙州西一百五十里漢天馬朝登京師夕至龍勒之北塞山後魏置縣曰壽昌歷代因之沙州未廢而縣空焉

玉門關近龍勒在燉煌之西北在肅州之西九百里班超所願生入者晉高居誨記肅州渡金河西百里出天閼關又西百里出玉門關金河在肅州今不可攷必在沙州地無疑矣唐玄奘

西域志云塞上無驛亭又無山嶺止以大為識玉門關外有五峯首宿峯其一也又有葫蘆河上狹下廣迴波甚急不可測上置玉門關即西域之襟喉也

陽關在壽昌縣西六里去北庭二千七百里北庭詳西域中高居海出玉門關入土魯界西至沙州南一十里鳴沙山又東南一十里三危山其西渡都鄉河曰陽關則陽關東至肅州一千三百里耳

蒲類海實固班超所擊呼衍王地也海源遠出于閼廣延甚大則誠用兵牧馬之地焉海一名菖蒲海又名鹽澤又名洳澤俗謂之娑蜡東距陽關三百里

班固西域傳謂海水潛行地中而出積石云其潛行無跡固不可攷河有慈嚴行閼兩源合而東注菖蒲海則分明

不明。幾令人以蒲類海之水。即黃河之水矣。受玉門關見
二水交流。發葱嶺。越海冥。滙盤流千里。至磧石再出。史記
盤澤去長安可五千里。通盤注。盤澤在大州之上。唐書西南
哈密衛。漢曰伊吾。唐曰伊州。亦謂之伊吾。貞觀中。伊吾來降。置伊
州。郭知運王君奭相繼為刺史。五代。月氏居之。元封族子忽
納失里為威武王。明永樂二年。阿克帖木兒貢馬。乃建哈密衛。
封忠順王。賜金印。使率其民城哈密。居之。使掌西域貢。凡入貢
者皆取道于此。且譯番文。三傳至喇羅帖木兒。為其下邇林所
殺。其母努溫答失力守國。謂之王母國。罕慎貪殘阻貢。為
土魯番阿黑麻誘而殺之。乃求西寧安定王族陝巴立之。為
土魯番。速檀阿力所破。執去。既歸而廢。乃立陝巴之子拜牙郎。

貧殘致怨未幾走土魯番衛遂為土魯番所據而哈密都督俺克卜剌率部長兀兒哈剌灰回回三族來歸安插肅州城內

哈密在肅州一千八百四十里鑑云一千五百里至瓜州界八百里西至西州七百二十里土魯番在其西一千五百里南至沙州界一百四十里北至伊吾軍三十里又北至瓦達子一百里鑑註數百里以天山為界

嘉峪關至哈密路程

嘉峪關

西二百四十里

赤金城

又西二百里

苦峪城

又一百二十里

王子莊

八十里

卜隆吉河

一百五十里

河南那只令

一百里

紅柳泉

一百二十里

哈刺骨

八十里

五個井泉口

一百二十里

古墩子

一百里

也帖木兒泉山

八十里

哈密衛

或自苦峪城

北向

羽寂滅

一百二十里

莽來泉

西一百四十里

垣力

西一百五十里

哈刺灰

一百二十里

哈至 一百二十里

坡兒那 一百四十里

羽六溫 一百二十里

俄倫突 九十里

俄倒海牙 一百四十里

阿赤 一百四十里

力把赤 一百三十里

撒力哈密失 五十里

哈刺木提 四十里

哈密衛

嘉峪關至赤金路程

嘉峪關 外西二十里

大草灘

三十里

黑山兒

七十里

回回墓

四十里

扇馬城

三十里

三顆樹

五十里

赤金城

或由大草灘

北而西經

大鉢和寺

七十里亦至

回回墓

近疆西夷傳

祝囊台吉者故綽庫忠其把汗之別部也多機智好大喜功初
今西域土著當七清亂勸綽庫克東徙不聽及敗祝囊預携其

仲父克氣弟羅藏三台吉三部引弓者約六千東走甘肅塞外
為行國久之就畜牧寧夏賀蘭山後噶爾旦稱漢臣之其內兄
麥力幹世牧青海其少主慙頤逃避於坤都魯祝囊時時相過
從循長城繞祁連苦路迂問越邊過則掠且殺戮有一二書生
持羊酒勞之喜曰所過不見有若此此何如人左右曰讀口秀
才祝囊曰秀才知禮天下者天下之天下非一人之天下諸生
曰惟有德者居之曰何為有德者曰不殺不焚不虜掠囊祝捧
腹大笑曰但如是耶策馬去戒帳下不得更踰邊犯一草一木
過慙頤曰學佛經不如學漢人書近邊有秀才可請為師傳慙
頤從之於是近邊諸部多厚幣延老學究購四子武經云賀蘭
山接壤故西受降城踰黃河則河套欽列伯山且當其衝河套
人衆而弱祝聞漢人為之防秋常竊笑焉康熙二十四年同科

科爾坤十八部由古北口入覲預宴於廬溝橋而返出口時迎者約萬騎云

綽力鬼阿氣黃台吉噶爾丹之別部也叩甘肅閔通番文達賴喇嘛遣來擺代生事邊地制之請自今好相與云番文稱甲士三千覘之則所隱過半扇馬城東抵薊州河二百里王建兒黃台吉有衆二千牧其地初不知為何部二部合乃知皆自西域來者擺代在百里外人不聞以一矢相加云

憨頰西域人噶爾丹殺其父其祖綽克異把什走苑憨頰年少方騎羊射鳥聞敗倉皇無所往其祖部落曰無素奈爾定合首氣奔還抱之大哭曰故主骨肉尚在足矣敗牧亡百餘人擣善馬抱以東奔金山兵追之背負臭如蜃易四馬始脫從者止五騎至坤都魯遇祝囊以少主托乃馳而西號召舊部落數百人

牛馬羊騾驢駝稱是載婦人遠道抵坤都魯故沃野乃勸部落
勤牧射一二年多盈餘即為之婚嫁。懃頓且長就諸部議婚咸
畏懃爾且無一應無素奈爾定合首氣獨揣知懃爾且無素憾
乃厚幣走詣懃爾且懃爾且喜曰肥漢華言好丈夫也問為言
懃頓貧不能娶懃爾且以婢力克和首氣女妻之令護歸
於坤都魯諸部始重懃頓別部落日益歸之云無素奈爾定合
首氣內奉幼主外整部落數年衆十倍於初時年未老髮髯盡
白無一莖黑者有子二長曰滾布爾罕次曰滾布力爾吉皆幼
穉代拜身短而肥黑臂力弓矢絕人一身刀箭痕累累無間
無所用力則射死他部牛羊以啟釁夜則竊馬以為常典法窮
一償九穉代拜身獨不知法諸部咸指為賊犯下古城殺官兵
無算其三十餘騎無一亡者塞外無所容乃俟懃頓於坤都魯

常與別部並騎行遇黃羊分逐之至牧園則舍黃羊射牧羊或怪問之曰不盜食他人物常不甘作賊其天性也常大言曰與我千人東西南北無敢當我者

完卜

一作完卜人曰

為噶爾旦叔添巴者

添巴即賦稅之

謂沿邊西及及黃羊黑番俱納噶爾旦添巴完卜並牧焉謂之

團頭猶之轉運使也帶甲二百祁連山諸夷羗靡不惟命歲遣數騎驅牛羊往金山望日月出入行者閱兩月各部遇之率辟易云或曰是噶爾旦耳目所寄或曰為網羅人物豈特團頭哉墨爾根黃台吉一手反掌謂之亂手子或曰水郡卜之孫或曰亦卜刺之後他處言之子要之青海中盤據之遺孽也兄弟四人長墨爾根次綽庫兒次滾卜揅漢次勞藏是名帶義及滾布墨爾根部落三百餘騎隨畜牧於祁連山陰與甘州紅

崖相接壤勞藏掠紅崖殺遊擊欲進取高台曰中國內亂可乘勢取河西地墨爾根持不可曰失人心開邊釁為丈夫所笑悉驅勞藏所部出塞云

懷阿爾賴達蘭太之子也世牧青海上初卜兒孩稱汗既死部落分稍弱達蘭太始盛已而卜兒孩子孫盛達蘭太且死懷阿爾賴與其弟潔卜弟乃爾吉無分地視卜兒孩之子孫為最貧及泐水開市兄弟獨色喜驅馬數千移穹廬于甘州白石崖口外之野馬川引弓之民已滿三千乃分為三部兄弟皆狹獍而相得無間初河西諸回同叛及敗乃爾吉誘致三百餘人皆善火器懷阿爾賴曰是善火器者不可分為奴使教部落有大用此天與我也黎國七族黃番則殿其添巴大草灘者橫截甘涼二州草豐茂南北百里東西三百里中有鬲支山林木禽獸繁

威然在祁連山北為甘朔喉吭三部入據之邊吏爭之甚力諸
夏諸夷咸質成于達賴喇嘛乃命大寶法王往視分界當是時
樞部理藩文武咸集皆謂之內地懷阿爾賴拔佩刀礮地曰大
明汗江山獨我不可得一片土天何用生我為卒不肯離大草
灘于是中國增官兵副將一員參將一員遊擊一員守備四員

顧犬草灘四隅頃之梗甘涼路邊吏與之對壘而軍者二旬不
解一日使命方往來出不意發大礮其馬驚不可控始潰入大
草灘去戮其老婦一稚子一世所傳定羌廟之捷云

派卜部落一千人同同三百住巴縣墩川刀爾吉部落五
百人住白石崖口外

麦力幹黃台吉其祖卜兒孩繼亦不剌據青海有衆萬人麦力
幹與諸父諸兄三分其軍皆為黃台吉麦力幹分地在甯海北

與西軍莊浪涼州時接壤。麦力幹剛燥多嗜慾而落落有大志。初聞大同姜瓖反，延慶間群起應。平西王吳三桂相與持於西。安平涼間，麦力幹乃糾合各部謀大舉。諸父達賴、黃台吉聞之，怒曰：「動即殺汝。」達賴雅為諸夷所信服，時年五十餘，鬚髯蒼蒼。麦力幹即不動，因開白塔兒地于北川口，中國之亡命同同叛敗者，盡招致而館穀之，分四民使各衣稅，時租察其可用者分任之，或自隨，其不願者聽。於是歸附滋益多，其強勝為青海都。祁連諸部最常築宮于大同、河源，輒行國不一居。聞西南變，則入據涼州之黃城兒，欲以造譽會邊吏，以時方多事，容忍之。達賴又時相戒飭，初爭大草灘，麦力幹獨不屑，曰：「牧杭華言非丈夫也。」麦力幹雅與妻兄祝囊相厚，曰：「南有我，北有祝囊，何事不可為？」其從兄達爾加黃台吉從兄弟懷阿爾額輩咸倚之為重。

麦力幹雅好結納以小利餌諸夷故各部咸聽命即脩貢於噶爾旦無外憂益肆其利以招叛亡惟好酒耳不絕聲目不絕色大寶法王勸以少貶損麦力幹善其言而不能自割營莫達賴黃台吉死以底斃一逞其志無何病入凉州之水磨川求醫藥越帳接于交衛所部馬有踐據者麦力幹召其主牽其馬去曰以償汝乃鞭縱馬者百十近地軍吏多持牛羊酒麪追曰杯酒片肉皆軍士身上所扣來者我何忍食悉不受河西之兵聞之多涕下未幾死于水磨川子南力木爾為黃台吉

麦力幹于康熙二十年故

達賴黃台吉信佛喜行善卜兒孩失鬼之幼子也生長青海上日與黃衣僧講經父死襲黃台吉分部引弓之士甫二千初集慶死其子內亂達賴召之至數其罪欲斬之其子于是棄部落

去不敢復見達賴之分地直接西軍邊地無孺掠患而達賴晚年部落增至六七千無貧乏者諸從子見惟然無疾詞遽色然皆嚴事之西軍市口西域回夷相雜處多爭端乃使宰僧持平銀塔寺生菩提樹葉皆成佛像乃出黃白金三裹之漢土番夷咸不敢盜取初滇黔之變三秦方洶洶其後子達爾加攻河州閱月麥力幹取黃城兒達賴力持不可使者交馳於西南乃各罷去達賴年五十髮多白悉屏絕婦人一意學清淨及逾八十髮乃黑顏如童稚云

勞藏台吉部落二千餘

克氣台吉部落一千餘

二台吉皆游牧賀蘭山後

把都兒台吉部落四千人 游牧魚海昌寧湖

把都兒台吉部落五百餘游牧居延海

把都兒台吉部落一千餘游牧居延海北

色各長素部落三百人游牧長流水

占木素台吉部落五百餘游牧銀鹽水

桑嘎思巴台吉部落三千餘游牧合黎山北

額力刻綽爾吉部落一千餘游牧大鉢和寺

倒朗色楞台吉部落五千人游牧居延海西

阿要台吉部落八百餘游牧坤都臺

答里麻吳把什部落九百餘游牧威魯城

渾都魯台吉部落四百人游牧坤都魯

滿素太台吉部落一千三百人游牧賀蘭山後

額力慶台部落八百人游牧乾海子

吳倫纂台吉部落七百人

游牧居延海西

撥什台吉部落一千餘人

游牧居延海西

額爾得和首氣台吉部落二千人

游牧居延海北

額力刻隆窟隆部落三千人

住牧威魯

額力刻綽爾吉部落二百人

住牧素金湖

勞藏台吉部落五百人

七清汗之侄為噶爾旦所敗乙卯康熙十四年至此與綽

力克兒阿氣台吉相好會與勞藏同至住牧素金湖

滾卜台吉部落一千人

住牧素金湖

索囊王建兒台吉部落二千人

住牧扇馬城

索囊南占部落三百人

阿卜額之子為噶爾旦所敗逃至住牧紅泉

答力漢綽爾吉部落七百人

游牧昌寧湖

麥爾幹喀部落三百人

達爾喇嘛之圍頭也。住牧達魯川。

阿爾額部落四百人

其父烏斯敏。住牧計來川。

滾卜棟漢部落四百人

走爾根之弟。游牧擺通河。

達爾加黃白吉部落七千人

住牧河州西南三百里。南坐雅滾卜川。

勞藏部落二百人

其力根之弟。善為盜。游牧拜浪河。

河套部落

古祿王者。吉囊之後也。其族系無可攷。明崇禎間。為棟罕所侵。擾不能自支。河套地饒耕稼。中國其士卒募養久。不善弓馬。舉國之人。不能禦千騎。乃內附中國。謂之降夷。及李過攻榆林。舉義旗來援。乃畏賊鋒。逡巡不敢進。天下既平。始奉正朔。從征伐。所向有功云。今王以下皆錫之以祿。月王俸一百兩。公及貝

勒八十兩、貝子六十兩、其部分為六掌、撒猶之五軍也、王一掌

歲公一、古祿什貝子一、打兒仗貝子一、掃闌貝勒一、

古祿王、住牧神不縣之西、曰五奴故克、

古祿什貝子、住牧五奴故克、

捏克台吉、住牧五奴故克、

索鈴貝子、住牧黃浦之南、曰黑家坪、

掌歲公、住牧豫山堡之北、曰黃河畔、

打兒仗貝子

哈漢台吉、

引章耐台吉、俱住牧於高家堡外、曰五盤腰泉、

喇達達台吉、

彭松台吉、俱住牧於紅山寺之北、曰什喇百黎、

掃開貝勒

住牧寧夏邊外曰什喇漢里

黃台吉

挾丹台吉

住牧常樂堡之北曰克路漢才黨

聶克台吉

住牧格林堡之東曰耿流黨把漢沒黨

馬麻太台吉

住牧懷遠堡之北曰達蓋

捧速台吉

住牧達蓋

起羅代台吉

五榜式台吉

俱住牧波羅堡之北曰海流兔

欽列伯山且部落二萬

住牧寧夏橫城之北

阿兒墩素部落三千

住牧花馬池之西北

附蒙古四十八部落考畧

科爾沁

土謝圖王

草禮克圖王

東圖王

察薩克圖王

名布格齊

巴圖魯王

朱爾扎漢

沙津

人名計加領額駙官科爾沁中五旗事

都同噶爾公

按科爾沁一部在蒙古中為最勝然科爾沁一部又分十部。和土墨府亦非二部是也。凡稱四十八部從所分言之。非部落總名有四十八部也。科爾沁十部今可考者列於左。所未詳者姑闕之。

阿魯神爾沁

在俄阿魯亦不

朱爾扎哈漢

封多羅郡王

土墨特

在牧歸化城一帶

達爾漢貝勒

名額爾得木圖

滾記思扎布

封圖山貝子

翁牛特

達爾漢貝勒

名克色

多羅杜冷郡王

名華理漢達來

教漢

多羅郡王

名扎蘇

額林臣台吉

扎魯特

亦作扎額特

達爾漢貝勒名已達札

喀爾沁住牧業額三衛地

杜令郡王名札世一作札西

鎮國公名吳特已拉

多羅貝勒名札夫

巴林

多羅郡王名郭奔理

固山貝子名吳爾占

都兒本

圖思哈爾公

阿巴哈

○ 奈曼名紀作乃曼

多羅達爾汗

名郭齊理

吳主

本作烏朱

穆親

色冷額爾得足

郝齊得

喀爾喀

在俄國化城北

綽克扎布公

按喀爾喀今北方蒙古之通稱猶西夷之稱凡魯特也是時喀爾喀有五部作賓王家久矣今四十八部亦有喀爾喀者因其五部之外別有依墩大清一部未歸乃使之附庸於察喀而此數於四十八部也

杜爾伯特

塞冷達爾汗

札額特

蒙勝達爾漢

吳喇特

土門達爾漢

喀喇車里克

噶戶麻台吉

鄂爾多斯

古木哈談

四子

直爾札木

燕尼特

騰吉思墨爾根台吉

阿壩坡

額齊格

索倫

達與畢

厄魯得

附客爾喀七部七澤

札沙克圖汗

車陳汗

土謝圖汗

七清汗

一作金鹿

那木厄金汗

賽應汗

巴爾湖額勒得汗

鄂爾得蒙古

附記

阿克敦阿哈思渾額爾克代青那顏

達額代青那顏 長子渣薩克額爾克阿海台吉

西域土地人物畧

嘉峪關西八十里為

大草灘其地廣而多草西四十里為

回回墓以地有回回三大塚故名迤北鉢和寺西五十里為

柴城兒墓西四十里

扇馬城中有二水柱流西三十里為

三顆樹西五十里為

赤金城

明所設苦峪衛處也。東有河城。中有二墩。迤北五十里。

為王子莊。西二十里。則為

古墩子。

墩西有塔。西六十里至

阿丹城。

西北有河。河北為剌即戊卜隆吉兒。西南三十里為哈剌

兀達城。西北為大璫城。哈剌兀達入璫間有河。哈剌兀達

西南百里為瓜洲城。其大璫西南五十里為卜隆吉兒。西

南入中垣。爾會於西阿丹。又璫之西。卜隆吉兒之北。其南

路為恒力。為提乾卜剌。亞提觀卜剌。額失也。大則大溫。其

北路為模赤嘴水。為恒力。為哈剌哈剌灰。人為哈剌灰。西

阿母城。西為瓦兀兒。瓦為牙兒卜剌。陳。為答失卜剌。迤北

為王子莊。樹。西北為哈剌灰。為召溫虎都。訖失虎都。為偏

有為阿赤、為卜兒那、為哈卜兒嘴、為賽罕西阿丹、西二百
里為

沙州城

明設沙州衛、古所謂流沙城、西為虎不哥城、為谷失虎都、
為牙卜剌、為哈失剌卜西卜、為哥子爾、為阿赤、為引兒克、為
哈密頭壤、為刺木脫云、為乞兒色赤、為克兒華也思、沙州
西三百里為

哈密城

城東有河、河上有橋、有水磨、城北西十里為迷卜哈剌氏、
南三十里為畏兀兒把力、西十里為

阿思打納城

西北十里、有卜古兒、西五十里至

阿打納城

又西為

也帖木兒 又西五十里為

刺木城 又西有

把兒海子 雙山 簽把兒山 又西有

雙山兒

鉢和寺城 城西十里至

哈刺帖兒 刺木城至哈刺帖兒亦五十里自北而西有

察黑兒 有

川中雙泉城 又西一百里有

中中泉 又西百里有

雙泉兒 壤阿思打納 西為

脫合城兒 又西為

北昌 又西為

魯珍城兒

城南有剌土、有蘆葦草墩、有懶真城、有平截土墩、有把思湖山、北為羊黑城兒、西五十里為

哈剌火者、又西五十里、即漢之火州、今謂之哈剌火州是也、

我答剌城、城西百里為

土魯番、同回疆、田產各色果品、樹木、西北有婁魯母、西二百里為

俺石城兒、城南有俺鼻城兒、北有撥剌把、又西五十里為

蕓把赤、北有虎真城兒、又西二百里為

昆迷失、其南有白山兒、其山東至俺鼻城、行六日、其北有池、有

呂都剌城、西二百里為

阿剌木、又西百里為

火力失城、南有他林河、西百里為

哈刺哈失鐵城其南格卜城見拉力昌河北有苦池巴城見黑

松林河又西百里為

滾巴泉又西百里為

黑水泉泉北有察力失城丁城見泉見河其南為拉力昌城泉

西百里為

雙山兒城又西百里為

獨樹城兒城北有兀為河及撒力滾把河西有一畫夜川西百

里為

寨力察井井北有大矣山又西二百里為

淤泥泉泉南為克列牙城兒其城東至拉力昌城行八程泉西

百里為

察兀的河其河南北俱與山相接橋子河西十里為

古克兀城

城北有雅恩雅門城、南有湯池、又百里為普先城、又

西百里為

西牙河城

城北有隻山關、有阿恩馬力城、西北有迤西瀾城子、西

有沙的即哈、西南有花蛇河、河南有葉利店、西三百里為

阿黑馬力城

城西南百里為土力普紅城、其城東至擺城四十

里、西北百里為河達城、西二百里為

阿亦城里城

城北有也列河、南有阿丹城、西有泉、又西百里為

克力賓城

城南有二回內墓、及黑五河、北有石店子、又西百里為

乾泉

又四百里為

大井

井南有三築城、西二百里為

比長店子

城南有乾羊城兒、北有石城兒、又西二百里為

紅臺泉

其地土台上有二泉、南有清水石干城、西二百里為

根河

南為力子城北又有居城西五十里為

石子泉

泉西北力師南為店子井北為秦泥城見其城東至石

城行八程泉西二百里為河白丁城城南有額城河見南

南有海子北二百里為

亦的哈馬城

城西南為哈夫哈力城西五十里為

失哈力城

其南有未見阿都刺城其西有河有民運南為七力

灰為黑沙湖內思為哈剌北為黑夫哈城又西為內力又

我儼

西三百里為

我儼

其西為討順巴失西北為賽蘭城又西五百里為

土刺城

其城形圓四外屋廬羅之中有王子一人住同司不羅

頭帶白羊毛帽不獲田吃魚羊肉馬乳又西七百里為

牙思城

城頭同田出於羊馬地西四百里為

也失卜 其南有巴達兒有打下你俺的達北有他失干城西三

百里為

亦尔乞咱打班 其南有大熱水泉黑水泉亦有可達巴有黑石

城有賽蘭城又西二百里為

亦乞咱打班又西為

把力干城 城南為哈剌界為哈必打納思乞亦咱撒剌思咱力又

西五百里為

俺的干城 城北有馬兒思剌又西七百里為

我失城 城南有額濟有烏哈剌撒有大者阿力來百即努古力

又西三百里至

馬都城 其城引水七派灌于其中南有高山北有沙兒黑納馬

都 西南五十里故的把丹其西有咱力都有罕都有撒力

亦刺牙北三百里為黑馬至其西北為鹿帖城西四百里為

阿懶答

又西二百里至

阿力炊打思

其南有八魯兩身有阿科即力姐氏有西六也

水磨其西北三百里為河懶答西北為河達暖又西為

赤口赤城

其四面俱水出沙龍其南有答黑答奔有哈火者有

昆都思有利巴的東兒咱木卜利有哈兒斤有哈沙打有
戶衛振有達兒哈有珍思的其北有鐵門關有克力干城
有把黑里城有失把力城有俺的灰城又西為

黑樓城

至赤戲旦黑猪黑答蘭城兒四百里出獅子西為哈刺

苦木金銀寶石樓錦各色果品青缸棉花白紙糧田其南
有巴巴沙忽有赤戲黑猪黑答蘭城兒有利巴的刺阿力
阿城東北有馬力城又西為

阿倫城

城東有失黑山河又西為

火者阿刺黑鑾城

南有失黑山西北有刺扒的城又西為

阿力伯

有驢驘同肉其南有阿刺都伯有失黑有阿力店子而為

雜民城

城南有阿思民西五十里為

普哈城

有同同種田出果品養桑種馬罕克在城住其南刺巴

子火馬里麻撒刀瓦思北有卜刺撒刺思有克力干城又

西五十里為

撒兒罕城

有驢驘同同出驢子哈刺苦木大驢子寶石金鑽鐵

魚牙把刀帖骨皮養桑出項項葡萄各色果品木撒黑刺

棉花銀鼠青鼠豹皮剪絨草其北有阿力城有望日樓又

西五十里為

失刺思城

有驢驘同同種田又西三百里為

高山

其南有山北有馬土力西北有

撒子城兒

城西北為

把黑打帖

又西為

把答山城

出青金石其南為西河城北為阿沙把力又西一千

五百里為

怯迷城

有王子外邊使有四族番漢出金子金銅鑽其南有

兒

打兒有阿把的納都又西為

新旦城

有纏頭回回種田出棉花各樣果品其南有把答力山

城有回回種田有阿力伯城有回回出金子寶物又西百

里為

字思旦城

有回回種田養桑出各樣果品其南為阿力河伯城

中有回回為俺的灰城中有纏頭回回出五穀又為黑者

沙平城見李思且西五百里至

亦思他刺八城

有纏頭回同種田出糯米養桑其南為哈的于

城土鑲鉄獅子哈刺又為已已沙葱城又為戶倫城有回

同種田出葡萄又為刺已的咱兒答及喇叭的迷城兒刺
已的把尔斤亦思刺八西六百里為

失刺思城

有纏頭回同出魚牙把力有院有樂人有各色藥品

有長流水又西行五日至

亦思城

有纏頭回同出棉花列思骨出項幅各色鍛綾好手巾

花也子河兒阿芙蓉其南為阿已的納都打刺木用城為
夫卜城刺已的杜帖兒漢都兒城刺已的米納牙其西北
俱大川路行十餘日又西八百里為

殲力旦城

有纏頭回同種田出黑狐子其南為苦蘭城有回同

種田出稻米其北為市的城又西為

阿即民城四面環以屋廬有小王子出羊水種各色藥品阿木

又為距此列思城有小王子種頭種田出各樣花毯象至

阿力旦城行六日其東面為頗力城見其東北為征北城

見又西行兩個月為

苦思旦城有煙頭田同種田出各樹樹木其東南為也尔的其

西有水磨又西為

沙密城有煙頭田同出各色藥品項項葡萄哈剌骨馬又西行

一個月至

巴黑旦城其城引水七派灌于其中有同田二千家出獅子哈

剌普水金線豹三獲花布手巾其南為欠土城北為陟西

行城又西為

也的納城

有錠頭同、西一百不出產物、種田、又西百里至

飯店兒

又西行六程至

天方國

其城二重、有出家同、在城住、餘皆進城禮拜、其南有

梁子井、北有阿思納城、天方國、西行十五程為

迷的力城

有錠頭同、同種田、又西至

牙瞞城

有黑髮同、出馬、瑤琥珀、犀羊布、各色棉花、又西為

文谷魯城

俱漢兒人、蓬頭戴帽兒、種旱田、出珊瑚樹、眼鏡石、上

有七樣花草、城東有河、舟楫以渡、又西為

阿都民城

有田、同種田、出花布、手巾、各色菓品、又西為

也勒朶思城

其城四隅、環以屋廬、周圍有水、水有舟楫、俱漢兒

人、蓬頭戴帽兒、種稻田、出撒黑刺鎖鐵刀、各樣菓品

撒黑四塞

其城二重、俱漢兒人、蓬頭戴帽兒、出烏不銀木、白紫

垣本各樣藥材又西為

哈利迷城有野貍同同多養羊馬種旱田有水磨出黃葡萄及

今區軍品又西為

阿的納城為番達城登有同同種康子出棉花又西為

菲即城其城一重有小王子俱漢先人剪踪披髮戴帽先種稻

田養養織金蟒龍撒黑刺剪絨蟪出金子黑石珍珠又西為

安各魯城有蓮頭同同種旱田出廣幅各樣三梭織子綢羊毛

織綢子出大環環葡萄城西距山山上有巡檢司又西為

阿台城有蓮頭同同種田出白棉花夏布山下西大紅花城西

有同同有水磨又西

索羅撒城有同同種旱田出各樣藥品又西為

海城有同同種旱田出各樣藥品又西為

魯迷城

其城二重有自立王子有纏頭同子及漢兒人有通事

種旱田不出物產東至李羅撒城一千二百里

此書存目作四卷、不著撰人名氏、以此書首卷河州條註內有康熙十四年二十二年等事、定為康熙間人所作、荅孫按章實齋劉湘燊傳云、甯都梁懷葛著、秦邊紀略有書無圖、湘燊得圖以較其書圖合、疑即梁圖、而與方輿紀要頗有齟齬、湘燊合訂為秦邊紀略異同攷六卷、知此書為梁著、又按劉繼莊廣陽雜記云、梁質人留心邊事已久、遼人王定山燕贊為河西靖逆侯張勇中軍、與質人相與甚深、因之徧歷河西地、故得悉其山川險要、部落游牧暨其強弱多寡離合之情、著為一書、曰西陲今略、歷六年之久、寒暑無間、其書始成、書凡五冊、冊各百餘紙、蓋即此書、初名西陲今略、西域水道記引之、後改曰秦邊紀略耳、又按存目別集類有梁份懷葛堂文集十五卷、提要云、份字質人、南豐人、嘗學於甯都魏禧、實齋云甯都梁懷葛亦誤也、此本五冊、與

廣陽雜記所云相同、前有印曰石匏二字、朱文、後有印曰張開
福印四字、白文、石匏海鹽明經、嘗就諸城劉燕亭喜海之暇、燕
亭觀察延榆綏、石匏在其幕中、此蓋行篋中物、將以考西陲故
跡也、惜劉君異同攷已久佚、無從校證耳、

廣陽雜記卷三渠質人留心邊事已久遼人王定山諱燕贊
魯河西清道侯張勇中軍與質老相與甚深質人因之通
歷河西池河西番夷難皆請達以是病涉事皆中軍主之
故得美其山川險要部落游牧暨其驍弱多寡離合之
情皆洞若觀火美著為一書凡數十卷曰西陲今略歷六
年之久寒暑無間其書雖成前在都中余見其稿黑
否用之者書也方輿之學自古有之然近世始有
之方輿紀要為方輿之始作然詳於古而略於今以之讀
史固大資淺力而求之今日之情形為須歷鑑也此書
雖山西一隅然今日之要務敏者更過於此今在都
門無上之哀之為片刻之暇不得孫一過為恨蓋其書
規模雖定而系脫稿塗乙改竄端緒復余自難不為

傷乎他人也地於天南會合莫必無與宗夏主而恨之至
申之事余之友人通程星沙族珣和逢而其出也廣別來
一載省事安人心廣之通途未嘗改訂一字余自星沙為
省向能遊此境夜以繼日于此觀則河西五郡印為
我囊中物矣書凡五冊之有古語語共計五方語語思
前其意文據其綱要其少教方明其古四句語語
乃縮為韻語以草草之既形一語之指其四語之通
而語語有通舊語之華與日競先後收楚帝之繼
經始於辛未二月初一日至二十日近疆美地墮沙義以傳
時錄果矣為一冊乃西藏諸國及蕃番通方略以資
人未定稿如此則侯之異日解印語力亦不為罕而余亦
已感全璧矣其如之知懷天下事者寸印寸尺即足不

可因循也。若前此以為日多事不若勇智則此業後
當面終遂終而如衛大局已定繼而邊堡內地之國終
兩通經涉美全書之竟多要而可任業此即全明經
上子中所謂擲廢法如令已親證之矣

又卷二系竟上言湖南之沙宜上策為謹守地崇宋會
都庵舍田園之值甚江所焚四外之一人喜旅之以湖南
為半人謹為謬言只因崇宋賄不顧子孫焉宋果議論
以此者差矣

又卷二系三桂據湖南兵駐湘潭久已而之間和碩忠親王統
大兵自江西來州至趙湖南兵至長沙之志三桂聞移將軍
為戰將不敢拒敵而二月自湘潭退守長沙駐紮梁家
人自江西為釋詐名求援三桂之系先敗安王而後援者為

計於三月初一日合圍苗夷人曰汝在壘上觀多軍寧陽
以誰是方汝軍家傳世官山至長沙東南与瀏陽相值吳觀
王軍長沙亦三桂軍長沙西至瀏陽門接多人以三桂命立
賊上吳觀王營兵十九路三桂上營兵十九路以應王將軍王
先陷陣獲全勝而返伯將軍吳觀王由派兵所中費顯王國
出力戰收之馬安軍大獲三桂見應王傷潰憤大而去錄不
開由之書多事未要錄其

天差二美人云居軍子所祀鄂子張譚子龍江西南昌軍城
之同人

又差二美人云江西建昌省度濟上人率火自焚

又差二美人少時補漢大方師法病臥旁夢走荒山曠野
中忽遇大方修形貌殊私念我信多念以之同行復取

黃宗夏撰
楊寶瑞堂集卷一
在東京時與梁賢人
黃宗夏詩子約稿十
三陵不果而賢人宗夏
則往其三月之
也據國朝詩話
知為梁人

別道而直行亂草莽中席地而橫甚可哀通悔曰適因大
方走不而此今持素何如茅屋有人出曰汝死矣未也
以為若曰平生所願惟清動耳其人入屋持素出曰作牛
古遂失形大川狂走而覺此夢亦多先事當悟思之

楊寶瑞髮堂集卷一往在京師與梁賢人黃宗夏詩子約稿十
三陵不果而賢人宗夏則往其年月日往步往謁謁歸賢人畫
十三陵圖為之說而宗夏帝陵帝姓以啟夫國家全盛之日松
楸亭是誰後有過其地直以姓記其社主之適近一自陵谷變
遷誰為楊種真如之禍而後思繼火石馬嘶風表秀素誰不
堪回首一二隱居子往步出山記其廣狹短長纂錄以垂不朽
不亡唐王潛林景暉之派至我今賢人既為國說而宗夏又復
記姓補其缺漏昌年記數於足乎天備已

湘潭張璠豈石石漁詩鈔有七日送梁大質人往肅州詩云七載
不携楚小濱白頭吟若見交親重逢人日題詩地猶是天涯遠
客身老多筋骸還作健生來心事不憂貧行：眉鼻書還著
每把高文輒有神一毫先芒懷葛堂讀餘搜首望蒼：此上
有願事千古明日思君天一方金碗荒丘悲萬草鐵函良
史淳敘而岐陽此主應回首記聽歌聲是楚狂自注質人
著有懷葛堂諸書